

古今治平畧

古今治平畧卷之三十一

豫章

弟

鍾名臣鼎揚父較

桐溪

鍾名臣鼎揚父較

馭夷篇中

汴宋馭夷

宋興以仁厚立國守和戎爲國是歲金繒以爲奉胡
逆奉胡羗逆奉羗積衰約終其世其北狄日契丹其
西戎日拓拔夏云契丹之先日東胡至阿保機并室

韋女真奚靺諸小國而益大自號天皇帝號妻述律氏亦曰蕭氏爲地皇后死爲契丹太祖傳國其子德光當後唐時石敬瑭以晉陽反懼唐計遣使稱臣割山前後十六州古幽薊之地賂契丹求濟師于是契丹更幽州爲燕京更國號曰大遼而石晉輸歲幣三十萬匹于遼稱子男終事之至出帝立用景延廣計稍驚怠而德光傾國南寇分其衆爲三西出雁門攻并代東度河陷博州南攻貝是時晉旱蝗作而苦兵乃求和德光亦自厭兵欲許和而漢人趙德鈞子延

壽欲傾晉、謬爲好辭、報晉言、陷虜、思歸、求發兵爲應、
而契丹將高平瀚亦詐以瀛州降晉、君臣皆色喜、乃
出師挑敵、而契丹復南、遂入大梁、滅晉、廢其君而夷
狄之凌藉、中國極此矣、已遣其部酋爲諸州鎮刺史、
節度使括錢帛供軍、虜人馬不給餉、日遣數千騎分
出爲剽掠、而中國人怨憤四起、殺契丹守將相、嘯聚
莫能制、德光乃大悔、恨曰、我不意中國兒難制如此、
旣而歎曰、我有三失、宜中國兒之叛我也、我令諸道
括金錢、失一、令上國人打草穀、失二、不早遣諸節使

還鎮失三、我有三失、宜天下人之叛我也、我去矣、又時已熱、不復能自留、遂留其國舅蕭翰守大梁、自引軍從晉內諸司伎藝及宮女若諸軍將卒數萬人出塞去、所過屠滅、行至臨洛、殺胡林而死、會盛暑、尸腐國人剖其腹、割腸胃、實鹽者數斗、載之去、晉人謂之帝堯、蓋快之也、契丹既勝晉、雖得諸夏、不能有然、益驕、歷漢周世為中國患、迨宋祖興在位、明于經國之體、專擇用將帥、以折衝北方、自由西關南棣所屬任者、將皆天下武力之材、委任專而優勸厚、又置北漢

不攻令自爲守以當虜虜嘗以六萬騎入塞下而用
欽祚以卒三千人前擊破敗之邊人至作謠爲請笑
于是契丹主賢和開遣使奉書幣講好而和議始于
此其後太宗伐北漢北漢故役屬遼父事之遼遣使
來言曰何名而伐漢也天子曰河東逆命中國所當
討若北朝不救當和好如故不然惟所命于是遼將
耶律沙帥師來救漢前渡河都部署郭進及其未成
列進薄之遼師敗北去及太原旣下欲乘勝取幽薊
諸將以師罷餉匱不欲行崔翰獨曰所當乘者勝也

不可失者時也。帝遂發太原，以潘美知幽州行府事。契丹將多降耶律學古，時守燕悉力禦之，不能支。城中大懼，契丹遣耶律休哥救燕。時帝與契丹將耶律沙大戰于大梁河，沙敗。將遁，休哥兵適至，與耶律邪軫分左右翼以進，復戰。帝大敗，殲師南還。休哥追至涿州，帝惡乘驢車走免。乃命孟玄喆屯定州，崔彥進屯關南。劉廷翰、李漢瓊屯真定而還，以石守信、劉征失律貶之。自是而契丹之好遂絕。九月，契丹遣南京留守韓匡嗣、耶律沙、耶律休哥侵鎮州，報圍燕之役。

官軍詐降，匡嗣欲納之。休哥曰：「彼氣甚銳，疑誘我也。」可整衆待之。嗣匡不聽，俄而劉廷翰陣于前，崔彥進潛師躡其後。李漢瓊、崔翰、趙延進兵繼至，合擊之。契丹軍大潰，匡嗣棄騎鼓遁去。獨休哥整兵而退。五年，契丹兵十萬寇鴈門，楊業領麾下數百騎自西往出鴈門擊之。契丹兵大敗，殺其將蕭咄李。自是契丹畏業，每望見旌旗，卽引去。主將多嫉之，或譖上，謗書帝皆不問，封其書付業。冬十月，契丹主賢圍瓦橋關，耶律休哥帥精騎渡水而戰，官軍大敗。休哥追至莫州。

古今治平畧

八

卷三十一

十一月帝自將禦之時關南諸軍已被契丹帝次大明諸將復戰于漢州敗潰會契丹主引去帝欲遂取幽州李昉力陳其未可乃詔曹翰部署諸將而還帝既還京議者皆言宜速取幽薊張齊賢上疏曰聖人舉事動在萬全百戰百勝不若不戰而勝若重之謹之則戎虜不足吞燕薊不足取自古疆場之難非盡繇戎狄亦多邊吏擾而致之若沿邊諸寨撫御得人但使浚壘深溝蓄力養銳以逸自處寧我致人此李牧所以稱良將于趙也所謂擇卒未如擇將任力不

及任人如是則邊鄙寧邊鄙寧則輦運減則河北之
民獲悠息矣民獲悠息則田業增而蠶織廣務農積
穀以實邊用且戎狄之心固亦釋利避害安肯投諸
死地而爲寇哉臣又聞家六合者以天下爲心豈止
乎爭尺寸之事角夷狄之勢而已是故聖人先本而
後末安內以養外人民本也夷狄末也中夏內也夷
狄外也是知五帝三王未有不先根本者也堯舜之
道無他焉廣推恩于天下之民耳推恩者何在平安
而利之民旣安利則戎狄歛衽而至矣六年田錫言

曰臣聞動靜之機不可妄舉安危之理不可輕言利害相生變易不定取舍無惑思慮必精夫應動而靜則養寇以生好應靜而動則失時以收事動靜中節乃得其宜今北鄙繹騷蓋亦有以居邊任者規羊馬細利爲捷矜樵斬小勝爲功買怨結仇興戎致寇職此之繇前歲邊陲倏擾親迂輦輅戎騎旣退萬乘方歸是皆失我機先落其術內勞煩耗數可勝言哉伏願申飭將帥慎固封守勿尚小功許通互市俘獲蕃口撫而還之如此不出五載河朔之民得務農業亭

障之地可積軍。倘然後待其亂而取之。則克乘其衰。而兵之則降。既心服而忘歸。則力省而功倍。誠願考古道務遠圖。示綏懷萬國之心。川駕馭四夷之策。事戒輒發。理貴深謀。兵書曰。不能盡知用兵之害者。則不能盡知用兵之利。自國家開燕以來。連兵未解。財用不得不耗。人心不得不憂。願陛下精思慮。決取舍。無使曠日持久。窮兵極武焉。書奏。上嘉之。嗟乎。二人之論。其知本矣。然徒知遼未可伐。而不知燕薊在所當取。蓋一則中國之民陷于左袵。一則中國之險移。

于夷狄燕薊不收則河北之地不固河北不固則河
南不可高枕而卧也特太宗時未有其機耳久之契
丹主賢卒子梁王隆緒立母蕭太后者治國事而邊
屯將言契丹主少母專政廢倖用事宜可伐于是以
曹彬爲幽州道行營都部署出雄州田重進爲定州
路都部署出飛狐潘美爲雲應朔等州都部署出鴈
門陞辭帝召授方畧曰潘美第先趨雲朔卿等以十
萬衆聲言取幽州持堅重母急功虜聞大兵至必悉
衆范陽虜不暇援山後山後諸州克而方兵乘范陽

可克也。已而彬克固安新城，攻涿州，圍之，田重進敗契丹于飛狐。靈州取蔚州，潘美攻寰朔雲，應皆下之。每捷聞，帝訝其已速。及彬以大軍攻涿，而契丹將耶律休哥者壁不戰，獨晝暉精銳，夜掠單弱以怖師。而潛軍鈔饒道，居旬日而師果大困。彬以食盡，退援餉。欲復前，帝聞大駭，曰：敵在前，以師進退，尺寸爲勝負。安有前當勁敵而退？軍援糧餉者乎？亟遣使勅彬，急緣白溝河與米信軍合，勿復前。彬違制戰蛟溝而敗。夜濟河，追兵至，又敗。灝沙河而襲，追大至，又大敗于

是詔重造等屯定屯代州而班師徙雲應朔寰四州
民及吐谷渾部族降者寘京西河東而彬信等各貶
秩有差帝大愧悔獨河北租給復者三年是役也帝
獨與樞密院計興師中書不預議故悔蓋自是中國
將相士大夫益憚兵不敢復言幽薊事矣既而開國
諸宿將武力嘗習兵者又盡而吏士益罷憊憚于兵
楊業與虜戰于陳家谷敗劉廷讓與戰君子館又敗
士多失亡諸邊乘塞瘡痍之兵至不滿萬人虜時時
深入官吏獨依壁自固自鄴而北千里蕭然天子下

哀痛之詔而邊吏念不在練士顧獨請益兵于是始料河內民以實邊不足又料民河南猶不足號役兵爲振武軍以佐邊而防禦猶凜凜也時契丹與中國絕好使者久而李繼遷復叛數犯邊真宗嗣位賜邊臣詔頗諭以懷來之旨而契丹主隆緒大舉兵入寇天子爲戎衣濟河次大名虜乃退時孫何從幸大名詔訪邊事何跪曰陛下嗣位以來訓師擇將可謂至多以高祖之大度兼蕭王之赤心神武冠于百王精兵倍于前代分閫仗越者固當以身先士卒爲心賊

遺君父爲耻而列城相望堅壁自全手握強兵坐達
成筭遂使腥膻得計蛇豕肆行焚劫我郡縣係累我
黎庶陛下掩人神之忿怒憫河朔之生靈爰御六師
親幸澶魏天聲一振敵騎四逃雖鎮定道路已通而
德棣風塵未息此殆將帥或未得人邊奏或有壅閼
鄰境不相救援換糧須俟轉輸之所致也將帥者何
或恃勇無謀或忌功玩寇但全城堡不卹人民邊奏
者何護塞之臣固祿守位城池焚劫不以實聞老幼
殺傷託言他盜不救援者何緣邊州縣城堡參錯如

車居齒之相依若頭目手足之相衛託稱兵少不
出或待奏可乃行俟輦輪者何故騎往還疾馳易逝
羸糧景從萬兩方行迨平我來寇已遁去此四者當
今急務擇將相則莫若文武之內參用謀臣防壅閭
則莫若凡奏邊防陞見庭闕令汝援則莫若督以軍
令聽其便宜運糗糧則莫若輕齎疾馳角彼趨捷錢
若水又陳備邊之要有五一日擇郡守二日募鄉兵
三日積芻粟四日革將帥五日明賞罰何謂擇郡守
今之所患患在戰守不同心望選沉厚有謀諳邊事

者任爲邊郡刺史。令兼緣邊巡簡。許召勇敢之士。爲
隨身部曲。廩膳不充。則官爲支給。然後嚴亭障。明斥
候。每得事宜。密相報示。寇來則互爲救應。齊出討除。
寇去則不令遠追。各務安靜。苟無大過。勿爲替移。倘
立微功。就加爵賞。如此則戰守必能同心。敵人不
敢近塞矣。何謂募鄉兵。今之所患。患在不知敵情。望詔
逐州沿邊民。爲招收軍。給與糧賜。蠲其賦租。彼兩地
之中。各有親族。使其懷惠來布腹心。彼若舉兵。此必
預知。苟能預知。則百戰百勝矣。何謂積粟。今之所

患患在困民力。望令緣邊各廣營田。以州郡長官。集其使額。每歲秋夏較其課程。立鼓旗以齊之。行賞罰以勸之。仍縱商人入粟緣邊。倘鎮戍有三年之備。則敵人不致動矣。何謂革將帥。今之所患。患在重兵居外。輕兵居內。去歲傳潛以八萬騎屯中山。魏博之間。鎮兵全少。非鑾輅親征。則城邑危矣。望慎選將。在河北近鎮。仍依舊事。節制邊兵。未能削部署之名。望且成行營之號。有警則暫巡邊。徼無事則却復舊藩。豈惟不啓戎心。况復待勞以逸。如此則不失備邊之要。

又無舉兵之名、且使重兵不屯一處、進退靜無施、不可失、何謂明賞罰、今之所患、患在我卒驕惰、今侍衛殿前兩司、送到邊上亡命軍卒人數甚多、臣試稽之、皆以恩親爲言、此蓋令之不嚴也、平時尚敢如此、况臨大敵乎、且太祖臨御十七年間、未嘗生事疆場、而敵人往往遣使乞和者、以其任用得人、而備禦有方也、陛下苟思兵者凶器、戰者危事、而不倒持太阿、授人以柄、則守在四夷、而常獲靜勝、此備禦之上策也、咸平間契丹歲侵邊界、所在擊走之、六年上詔鎮

安軍節度李繼隆論邊事且議親征繼隆曰陛下
未制置邊備分任將帥悉令機要至戎人入寇蓋亦
常事上如太宗朝亦有城堡失陷然終不能爲害願
專責將帥不須戎輅親舉至景德元年閏九月虜主
與其母舉國入寇統軍順國王撻覽引兵掠威虜順
安軍保州三路攻保州不利別部寇岢嵐軍知軍賈
宗擊敗之十月戎王與母率衆至唐河三路都部署
王超按兵以待旣而不交鋒緣胡盧河而東虜遂南
熾攻圍瀛州詔威虜岢嵐軍保州莫州北平塞部署

入北境腹皆縱擊以分其勢既而大破虜衆捷奏連
上十一月虜衆擊攻瀛州晝夜鼓噪大設攻具負板
秉燭驅奚人乘城城上發礮石巨木擊之皆墜戎首
與母復鼓衆四面急擊矢發如雨虜爲戒兵所殺者
三萬餘人傷者倍之圍遂解獲鎧甲兵矢數百計又
以遣兵逼冀州城知州王興擊走虜衆猶二十萬詔
諸路兵會天雄軍方是時契丹內訌縱遊騎掠深祁
間小不利輒引去時寇準爲相曰是徂我也請練師
命將簡驍銳據要害以備之及虜衆過天雄犯德清

據漣邊書告急一夕凡五至中外震駭準飲笑自如
明日同列以聞帝大駭以問準準曰陛下欲了此不
過五日耳因請帝幸漣淵同列懼欲退準止之令候
駕起帝難之亦還內準曰陛下入則臣不得見大事
去矣請毋還而行乃議親征詔群臣問方畧旣而聞
莫升聞濂州直犯貝魏人情愈恟懼參知政事王欽
若臨江人請幸金陵陳堯叟閬州人請幸成都帝以
問準準曰爲陛下畫此策者可誅也陛下神武翦邦
協和若駕親征敵當自遁不然出奇以撓其謀堅守

以老其師勞逸之勢我待勝算矣。奈前棄廟社欲幸楚蜀。遠地人心崩潰。彼乘勢深入天下。可復保耶。帝乃決策幸澶州。二人蹊是怨。集庚午發京師。準以欽若多智。懼其妄。有關說疑泄大事。出欽若知天雄軍。契丹至城下。欽若閉門束手。無策修齋誦經而已。帝至澶州南城。望見契丹軍勢甚盛。衆請駐蹕。準固請曰。陛下不過河。則人心危。敵氣不懾。非所以取咸。夾勝也。且王超領勁兵屯中山。以距其吭。李繼隆石保吉分大陳以扼其左右。肘四方征鎮赴援者。日至。陞

下何疑而不進乎。過河衆議皆懼。準力爭之不決。數
前都指揮使高瓊仰奏曰。寇準言是。馮拯在旁阿之。
瓊怒曰。君以文章致位兩府。今虜騎充斥。如此君何。
不賦一詩退虜耶。卽麾衛士進。帝遂渡河。遠近望見。
御蓋諸軍皆踴躍呼萬歲。聲聞數十里。契丹相視驚。
愕。帝盡以軍事委準。準承制專決。號令明肅。士卒喜
悅。敵數千騎薄城下。詔士卒迎擊。斬獲大半。乃引去。
帝還行宮。畱準居北城上。徐使人視準。何爲準。方與
知制誥楊億飲。傳歌謠歡呼。帝喜曰。準如是。吾復何

憂相持十餘日。會契統軍撻覽爲下所射殺。乃請盟。而曹利用自契丹還。言契丹欲得關南地。帝曰。歸地事極無名。若欲貨財。漢以玉帛賜單于。有故事。宜許之。準不欲賂之。以貨財。且欲邀其稱臣。及獻幽薊之地。因畫策以進。曰。如此則可保百年無事。不然數十年後。戎且生心矣。準蓋欲擊之。使隻輪不返。帝方厭兵。乃曰。數十年當有杆禦之者。吾不忍生靈重困。姑聽其和可也。準尚未許。契丹遣使持書來請盟。準不從。會有諸準幸兵。以自取重者。準不得已。乃許其成。

復遣曹利用如契丹軍、議歲幣。帝曰：「必不得已，雖百萬亦可。」準聞之，召利用至，幄謂曰：「雖有敕旨，汝所許過三十萬，吾靳汝矣。」利用竟以帛二十萬匹、銀十萬兩定和議。南朝爲兄，北朝爲弟，交誓約，各解兵歸。自是南北弭兵，寇準之力也。方契丹主使王繼忠議和，擇可使契丹者，曹利用適奏事行在樞密院，以利用應。遼帝曰：「此重事也，毋輕用人。」明日，樞密使王繼英又薦利用，遂授閣門祗候、崇議副使，奉書詣契丹軍。利用憤契丹色不平，對曰：「彼若妄有所求，臣不敢生。」

還帝壯其言利用馳至軍中耶律隆緒母見利用車
上車既設橫板布食器召與飲食其從臣重行坐飲
食畢果議開南地利用拒之遣其臣韓杞來報命利
用再使契丹契丹母曰晉德我界我開南地周世宗
取之今宜還我利用曰晉人以地界契丹周人討之
我朝不知也若歲求金帛以佐軍尚不知帝意可否
割地之請利用不敢以聞其政事舍人高正遂錄前
日我引衆以來圖復故地若止得金帛歸則愧吾國
人矣利用曰子盍爲契丹熟計使契丹用子言恐連

兵結繫不得而息。非國利也。契丹度不可屈。和議遂
定。利用奉約書以歸。蓋是時中國全盛。有重相爲折
衝。諸規畫足措。勝契丹深入而挫。虞難復。故與和而
固。所謂可以戰而後可以。和也。然帝慈仁。憚兵許歲
幣。過適靡國力難繼矣。自是好使歲往來不絕。真宗
崩。契丹主隆緒集群臣爲罷市舉哀。詔沿邊州郡毋
作樂。毋犯真宗諱。祭奠吊慰有加。禮當是時。行旅交
通。邊城晏閉。黎民土著。終老不識兵革。自有和戎之
利。未有也。慶曆二年。契丹主宗真初立。謀欲得晉高

祖所與關南十縣聚兵幽涿聲言入寇遣其臣蕭英
劉六符來聘兵旣壓境而使來非時中外忿之仁宗
曰契丹吾兄弟之國未可素也其有以大鎮撫之命
宰相擇報聘者時虜情不可測群臣皆莫敢行宰相
舉右正言知制誥富弼應弼得命卽人對叩頭曰主
憂臣辱臣不敢愛其死帝爲動色先以爲接伴使英
等入境中使迎勞之英托疾不拜弼曰昔使北病以
車中聞命輒起今中使至而君不拜何也英髮然起
拜弼開懷與語英感悅亦不復隱其情遂密以其王

所欲得者告弼曰可從從之不可從以一事塞之足
矣具以聞進樞密直學士辭不拜曰國家有惡義不
辭勞奈何賂以官爵遂爲使報聘見契丹主曰兩朝
人主父子繼好垂四十年一旦求割地何也契丹主
曰南朝違約塞厲門增塘水治城隍藉民兵將以何
爲群臣請舉兵而南吾謂不若遣使求地求而不獲
舉兵未晚弼曰北朝忘章聖皇帝之大德乎澶淵之
役苟從諸將言北兵無得脫者且北朝與中國通好
則人主專其利而臣下無所獲若用兵則利歸臣下

而人主任其禍故勸用兵者皆爲身謀耳今中國提
封萬里精兵百萬北朝欲用兵而能保其必勝乎就
使其勝聽所亡士馬群臣當之歎抑人主當之歎若
通好不絕歲幣盡歸人主群臣何利焉契丹主大悟
首肯者久之弼久曰塞鴈門者獨元昊也塘水始于
何承矩事在通好前城隍皆修舊民兵亦舊闕非建
約也契丹主曰雖然吾祖宗故地當見遠耳弼曰晉
以盧龍賂契丹周世宗復取關南地皆異代事若各
求地豈北朝之利哉旣退劉六符曰吾王耻受命幣

堅欲十縣何如弼曰本朝皇帝言爲祖宗守國豈敢
妄以土地與人北朝所欲不過租賦耳朕不忍多殺
兩朝赤子故屈已增幣以代之若必欲得地是志在
敗盟假此爲辭耳明日契丹主負弼同獵引弼馬自
近謂曰得地則歡好可求弼言北朝旣以得地爲榮
南朝必以失地爲辱兄弟之國豈可使一榮一辱哉
獵罷劉六符曰吾主聞公榮辱之言意甚感悟今惟
有結姻可議耳弼曰婚姻易生嫌隙本朝長公主出
嫁齋送不過十萬緡豈若歲幣無窮之利哉契丹主

諭弼使還曰候卿再至當擇一事受之弼還奏帝復使弼持和親增幣二議及誓書往且命采口傳之辭于政府既行次樂壽謂副使張茂實曰吾爲使者而不見國書脫書詞與口傳異吾事敗矣啓視果不同疾馳還都入見曰執政故爲此欲臣致于死地臣死不足惜奈國事何帝憇召夷簡問故夷簡曰此誤耳弼語侵夷簡遂易書以行弼至契丹不復議婚事欲增幣契丹主曰南朝旣增我幣其辭當曰獻弼曰南朝爲兄豈有兄獻之于弟乎契丹主曰然則爲納字

弼曰亦不可契丹主曰南朝旣以厚幣遺我是懼我
矣則于二字何有若我擁兵而南得無悔乎弼曰本
朝兼愛南北固不憚更成何名爲懼或不得已而至
于用兵則當以曲直爲勝負非使臣之所知也契丹
主曰卿勿固執古有之矣弼曰自古惟唐高祖借兵
于突厥當時贈遺或稱獻納其後頡利爲太宗所擒
豈復有此禮哉契丹主知不可奪乃曰吾當自遣人
議之乃畱增幣誓書而使耶律仁先劉六符持誓書
與弼偕來具議獻納二字弼至入對因曰二字臣以

拒之彼氣折矣可勿許也帝用安殊議竟以納字
與之于是歲增銀絹各十萬與前共五十萬匹兩和
好復定而契丹平時契丹實願惜好幣特爲虛聲以
制喝中國而中國方困于西憚事許與彌過適而國
力益靡弊矣然是時天子仁澤周渥深結于民心賢
哲林立國勢鞏于磐石而外憂隨弭雖不至戰亦所
謂可以守而後可以和也已詔冊元昊爲夏國王且
行會契丹來言西事詔需虜使至乃發弼以樞副爭
之曰不可今先虜使未行至則恩自我出虜使至國

許和衡歸彼矣從之是歲契丹發卒來雲中受輸幣而元昊方伐呆兒族地迫于河東帝問弼虜得無與元昊計合乘我乎弼曰虜自得幽薊不復蹙河東入寇者以河北夷而饒河東險濇且虞我出鎮定擣燕薊之虛也今豈遽此出哉且兵出無名契丹大國亦不爲也就使妄動當出我不意豈宣言受澶雲中乎元昊與契丹本結約相左右爲中國患而契丹背之獲重弊是宜有怨心故築威塞州以備之而呆兒屢殺掠威塞以爲此役也安能合而謀我哉必不然矣

武請調發爲備善弼日以虜虛聲致而驟有調發正
墮其計中且令虜有以窺吾淺深也必虜入寇者臣
請伏罔上誤國之誅兵得無調嗚呼敵國之患起于
多求而不供供者有倦而求者無厭以有倦供無厭
而能久安于無事者天下未嘗有也故夫二虜之患
特有遠近耳而要以必至于戰敢問今之所以戰者
何也其無乃出于倉卒而備于一時乎且夫兵不素
定而出于一時當其危疑擾攘之間而吾不能自必
則權在敵國權在敵國則吾欲戰不能欲休不可進

不能戰而退不能休則其計將出于求和求和而自
我則其所以爲媾者必重軍旅之後而繼之以重媾
則國用不足國用不足則加賦于民加賦而不已則
凡暴取豪奪之法不得不施于今之世矣天下一動
變生無方國之大憂將必在此是故蘇洵之策有曰
中國內也四夷外也憂在內者本也憂在外者末也
夫天下無內憂必有外懼本旣固矣蓋釋其末以息
肩乎日未也古者夷狄憂在外今者夷狄憂在內釋
其末可也而愚不識方今夷狄之憂爲末古者夷狄

之勢大弱則臣小弱則遁大盛則侵小盛則掠吾與
良而食足將賢而士勇則患不在中原如是而曰外
憂可也今之蠻夷姑無望其臣與遁求其志止于侵
掠而不可得也北胡驕恣爲日久矣歲邀金繒以數
十萬計曩者幸吾有西羌之變出不遜之語以撼中
國天子不忍使邊民重困于鋒鏑是以虜日益驕而
賄日益增迨今凡數十百萬而猶慊然未滿其欲視
中國如外府然則其勢又何止數十百萬也夫賄益
多則賦歛不得不重賦歛重則民不得不殘故雖名

爲息民而其實愛其死而殘其生也名爲外憂而其
實憂在內也外憂之不去聖人猶且耻之內憂而不
爲之計愚不知天下之所以久安而無變也古者匈
奴之強不過冒頓當暴秦刻剝劉項戰奪之後中國
溘然矣以今度之彼宜遂入踐中原如決大河潰蟻
壤然卒不能越其疆以有吾尺寸之地何則中原之
疆固百倍于匈奴雖積衰新造而猶足以制之也五
代之際中原無君晉唐苟一時之利以子行事匈奴
割幽燕之地以資其疆夫孺子繼立大臣外叛匈奴

掃境來寇兵不血刃而京師不守天下被其禍匈奴
自是始有輕中原之心以爲可得而取矣及吾宋景
德中大舉來寇章聖皇帝一戰而却之遂與之盟以
和夫人之情勝則狃狃則敗敗則懲懲則勝匈奴狃
石晉之勝而有景德之敗懲景德之敗而愚未知其
所勝甚可懼也雖然數十年之間能以無大變者何
也匈奴之謀必曰我百戰而勝人人雖屈而我亦勞
馳一介使入中國以形凌之以勢邀之歲得金錢數
十百萬如此數十歲我益數百千萬而中國損數百

千萬吾日以富中國日以貧然後足以有爲也天生
北狄謂之犬戎投骨于地狷然而爭者犬之常也今
則不然邊境之上豈無可乘之隙使之來寇大足以
奪一郡小亦足以殺掠數千人而彼不以動其心者
此其志非小也將以蓄其銳而伺一隙以伸其所大
欲故不忍以小利而敗其遠謀古人有言曰爲虺弗
摧爲蛇奈何匈奴之勢日長炎炎今也柔而養之以
與其卒無大變其亦惑矣且其志不止犯邊而力猶
未足以成其所欲爲則其心惟恐吾之一旦絕其好

以失吾之厚賂也。然而驕傲不肯少屈者何也？其意日邀之而後固也。鷙鳥將擊，必匿其形。昔者冒頓欲攻漢，漢使至，輒匿其壯士健馬。故兵法曰：辭卑者進也，辭強者退也。今匈奴之君臣莫不張形勢以夸我，此其志不欲戰明矣。圍廬之入楚也，因唐蔡勾踐之入吳也，因齊晉匈奴誠欲與吾戰也。曩者陝西有元昊之叛，河朔有王則之變，嶺南有智高之亂，此亦可乘之勢矣。然終以不動，則其志之不欲戰亦明矣。吁！彼不欲戰而我遂不與戰，則彼既得其志矣。兵法曰：

用其所欲行其所能廢其所不能于敵反是。今無乃
與此異乎。且匈奴之力既未足以伸其所大欲而奪
一郡殺掠數千人之利。彼又不以動其心。則我勿賂
而已。勿賂而彼以爲辭。則對曰。爾何功于吾。歲欲吾
賂。吾有戰而已。賂不可得也。雖然。天下之人必曰。此
愚人之計也。天下孰不知賂之爲害而勿賂之爲利。
顧勢不可耳。愚以爲不然。當今夷狄之勢如漢七國
之勢。晁錯之始議削諸侯地以損其權也。天下皆曰。
諸侯必且反。錯曰固也。削亦反。不削亦反。削之則反。

疾而禍小。不劑則反遲而禍大。吾懼其不及今反也。天下皆曰晁錯愚。吁。七國之禍。期于不免。與其發于遠而禍大。不若發于近而禍小。以小禍易大禍。雖三尺童子皆知其當然而其所以不與錯者。彼皆不知其勢將有遠禍。與知其勢將有遠禍而度已不及見。謂可以寄之後人以苟免吾身者也。然則錯爲一身謀。則愚而爲天下謀。則智。人君又安可捨天下之謀而用一身之謀哉。今者匈奴之疆不減于七國。而天下之人又用當時之議。因循維持以至于今。方且以

爲無事而愚以爲天下之大計。不如勿略。則變疾而禍。小路之則變遲。而禍大。畏其疾。也不若畏其大。樂其遲。也不若樂其小。天下之勢。如坐弊船之中。駸駸乎將入于深淵。不及其尚淺也。舍之而求所以自生之道。而以濡足爲解者。是固大覆溺之道也。聖人除患于未萌。然後得轉禍而爲福。今也不幸。養之以至此。而近憂小患。又憚而不決。則是遠憂大患。終不可去也。赤壁之戰。惟周瑜呂蒙知其勝。伐吳之役。惟羊祜張華以爲是。然則宏遠深切之謀。固不能合庸人。

之意此晁錯所以爲愚也。雖然晁錯之謀猶有遺憾。何者錯知七國必反而不爲備。反之計山東變起而關內騷動。今者匈奴之禍又不若七國之難制。七國反中原半爲敵國。匈奴叛中國以全制其後。此又易爲謀也。然則謀之奈何。曰匈奴之計不過三。一曰聲二曰形三曰實。匈奴謂中國怯久矣。以爲終不敢與之抗。其心常欲固前好而得厚賂以養其力。今也遽絕之。彼必曰戰而勝不如坐而得賂之爲利也。華人怯吾可以先聲脅之。彼將復賂我。于是宣言于遠近。

我將以某日圍某所以某日攻某所如此謂之聲命
邊郡休士卒偃旗鼓寂然若不聞其聲聲既不能動
則彼之計將出于形除道剪棘多爲疑兵以臨吾城
如此謂之形深溝固壘清野以待寂然若不見其形
形又不能動則技止此矣將遂練兵秣馬以出于實
實而與之戰破之易耳彼之計必先出于聲與形而
後出于實者出于聲與形期我懼而以重賂請和也
出于實不得已而與我戰以幸一時之勝也夫勇者
可以施之于怯不可以施之于智今夫叫呼跳踉以

氣先者世之所謂善鬪者也。雖然蓄全力以待之。則未始不勝。彼叫呼者聲也。跳踉者形也。無以待之。則聲與形者亦足以乘人于卒。不然徒自斃其力于無用之地。是以不能勝也。方今匈奴之君有內難。新立意其必易與。隣國之難霸王之資也。天與不取。將受其弊。賈誼曰。大國之王。幼弱未壯。漢之所置。傳相方握其事。數年之後。大抵皆冠血氣。方剛。漢之傳相以病而賜罷。當是之時。而欲爲安。雖堯舜不能。嗚呼。是七國之勢也。蘇軾之策有曰。用兵有權權之所在其

國乃勝。是故國無大小，兵無強弱，有小國弱兵而見
畏于天下者，權在焉耳。千鈞之牛，制于三寸之童，彌
耳而下之，曾不如狙猿之奮擲于山林，此其故何也？
權在人也。我欲則戰，不欲則守，戰則天下莫能支，守
則天下莫能窺。昔者秦嘗用此矣，開關出征以攻諸
侯，則諸侯莫不願割地而求和；諸侯割地而求和于
秦，秦人未嘗急于割地之利。若不得已而後應，故諸
侯嘗欲和，而秦嘗欲戰。如此，則權固在秦矣。且秦非
能強于天下之諸侯，秦惟能自必，而諸侯不能是以

天下百變而卒歸于秦諸侯之利固在從也朝聞陳軫之說而合爲從暮聞張儀之利而散爲橫秦則不然橫人之欲爲橫從人之欲爲從皆使其自擇而審處之諸侯相顧而終莫能自必則權之在秦不亦宜乎向者寶元慶曆之間河西之役可以見矣其始也不得已而後戰其終也逆探其意而與之和又從而厚餽之惟恐其一日復戰也如此則賊常欲戰而我常欲和賊非能常戰也特恃其欲戰之形以乘吾欲和之勢屢用而屢得志是以中國之太而權不在焉

欲天下之安則莫若使權在中國。欲權之在中國則
莫若先發而後罷。示之以不憚形之以好戰。而後天
下之權有所歸矣。今夫庸人之論則曰勿爲禍始。古
之英雄之君豈其樂禍而好殺。唐太宗旣平天下而
又歲歲出師以從事于戎狄。蓋晚而不倦。暴露于千
里之外。親擊高麗者再焉。凡此者皆所以爭先而處
疆也。當時群臣不能深明其意。以爲敵國無釁而我
則發之。夫爲國者使人備已則權在我而使已備人
則權在人。當太宗之時四夷狼顧以備中國。故中國

之權重苟不先之則彼或以執其權矣而我又鯁鯁
焉惡戰而樂罷使敵國知吾之所忌而以是取必于
吾如此則雖有天下吾安得而爲之且古者甸奴之
衆不過漢一大縣然所以能敵之者其國無君臣上
下朝覲會同之飾其民無穀米絲麻耕作織紉之勞
其法命以言語爲約故無文書符傳之繁其居處以
逐水草爲常故無城郭邑居聚落守望之助其旃裘
肉酪足以爲養生送死之具故戰則人人自鬪敗則
驅牛羊遠徙不可得而破蓋非獨古聖人發度之所

不如亦其天性之所安者猶狙猿之不可使通乎虎
豹之不可被以羈縶也故中行說教單于無愛漢物
所得繒絮皆以馳草棘中使衣袴弊裂以示不如旃
裘之堅善也得漢食物皆去之以示不如醢酪之便
美也繇此觀之中國以法勝而匈奴以無法勝聖人
知其然是故精修其法而謹守之築爲城郭塹爲溝
池大倉廩實府庫明燧燧遠斥堠使民知金鼓進退
坐作之節勝不相先敗不相後此其所以謹守其法
而不敢失也一失其法則不如無法之爲便也故夫

各輔其性而安其生則中國與胡本不能相犯惟其不然故皆有以相制胡人之不可從中國之法猶中國之不可行胡人之無法也今夫佩玉服韍冕而垂旒者此宗廟之服所以登降揖讓折旋俯仰爲容者也而不可以騎射今夫蠻夷而用中國之法豈能盡如中國哉苟不能盡如中國而雜用其法則是佩玉服韍冕而垂旒而欲騎射也昔吳之先斷髮文身與魚鱉龍蛇居者數十世而諸侯不敢窺也其後楚申公巫臣始教以乘車射御使出兵伐楚圍廬大差又

遂其無厭之求、開溝通水與齊晉爭強、黃池之會、雖
自冠帶吳人不勝其笑、卒入于越、夫吳之所以強者、
乃其所以亡也、何者、以蠻夷之資而貪中國之美、宜
其可得而圖之哉、西晉之亡也、匈奴鮮卑氐羌之類、
紛紜于中國、而其豪傑間起爲之君長、如劉元海、符
堅、石勒、慕容儁之儔、皆以絕異之資、驅駕一時之賢
俊、其強者至有天下大半、然終于覆亡、相繼遠者不
過一傳、再傳而滅、何也、其心固安于無法也、而束縛
于中國之法、中國之人固安于法也、而苦其無法、君

臣相戾上下相厭是以雖建都邑立宗廟而其心岌岌然常若寄居于其間而安能久乎且人而棄其所得于天之分未有不亡者也契丹自五代南侵乘石晉之亂奄至京邑覩中原之富麗廟社宮闕之壯而悅之知不可以留也故歸而竊習焉山前諸郡既爲所併則中國士大夫有立其朝者矣故其朝廷之儀百官之號文武選舉之法都邑郡縣之制以至于衣服飲食皆雜取中國之象然其父子聚居貴壯而賤老貪得而忘失勝不相讓敗不相救者猶在也其中

未○能○革○其○犬○羊○豺○狼○之○性○而○外○牽○于○華○人○之○法○此○其○
所○以○自○投○于○陷○穽○網○羅○之○中○而○中○國○之○人○循○日○今○之○
匈○奴○非○古○也○其○措○置○規○畫○皆○不○復○蠻○夷○之○心○以○爲○不○
可○得○而○圖○之○亦○過○計○矣○且○夫○天○下○固○有○沉○謀○陰○計○之○
士○也○昔○先○王○欲○圖○大○事○立○奇○功○則○非○斯○人○莫○足○與○共○
秦○之○尉○繚○漢○之○陳○平○皆○以○樽○俎○之○間○而○制○敵○國○之○命○
此○亦○王○者○之○心○期○以○紓○天○下○之○禍○而○已○彼○契○丹○者○有○
可○乘○之○勢○三○而○中○國○未○之○思○焉○則○亦○足○惜○矣○臣○觀○其○
朝○廷○百○官○之○衆○而○中○國○士○大○夫○交○錯○于○其○間○固○亦○有○

賢俊慷慨不屈之士而詬辱及于公卿鞭朴行于殿
陛貴爲將相而不免囚徒之耻宜其有惋憤鬱結而
思變者特未有路耳凡此皆可以致其心雖不爲吾
用亦以間疎其君臣此繇余之所以入秦也幽燕之
地自古號多雄傑名于圖史者徃徃而是自宋之興
所在賢俊雲合響應無有遠遁皆欲洗濯磨淬以觀
上國之光而此一方獨陷于非類昔太宗皇帝親征
幽州未克而班師聞之謀者曰幽州士民謀欲執其
帥以城降者聞乘輿之還無不泣下且胡人以爲諸

郡之民非其族類故厚歛而虐使之則其思內附之心豈待深計哉此又足爲之謀也使其上下相猜君臣相疑然後可攻也語有之曰鼠不容穴衙窠藪也彼僭立四都分置守宰倉廩府庫莫不備具有一旦之急適足以自累守之不能棄之不忍華夷雜居易以生變如此則中國之長足以有所施矣然非特如此而已也中國不能謹守其法彼慕中國之法而不能純用是以勝負相持而未有決也夫蠻夷者以力攻以力守以力戰願力不能則逃中國則不然其守

以形其攻以勢其戰以氣故百戰而力有餘形者有
所不守而敵人莫不忌也勢者有所不攻而敵人莫
不備也氣者有所不戰而敵人莫不憚也苟去此三
者而角之于力則中國固不敵矣尚何云乎蘇轍策
有曰北狄之民其性譬如禽獸便于射獵而習于馳
騁生于斥鹵之地長于霜雪之野飲水食肉風雨飢
渴之所不能困上下山坡力百倍輕死而樂戰故
常以勇勝中國至于其所以擁護親戚休養生息畜
牛馬長子孫安居佚樂而欲保其守領者蓋以異于

華人也而中國之士常憚其勇畏避而不敢犯。瓊裘之民亦以此恐喝中國而奪之利。此當今之所謂大患也。昔者漢武之世匈奴絕和親攻當洛塞天下震恐。其後二十年之間漢兵深入不憚死亡捐命絕幕之北以決勝負。而匈奴孕重墮壞人畜疲弊不敢言戰。何者勇士壯馬非中國之所無有而窮追遠逐雖匈奴之衆亦終有所不安也。故夫敵國之盛非鄰國之所深憂也。要在休兵養士而集其勇氣使之不憚而已。方今天下之勢中國之民優游緩帶不識兵革

之勞騎奢怠情勇氣消耗而戎狄之賂又以百萬爲計轉輸天下甘言厚禮以滿其不足之意使天下之士耳熟所聞目習所見以爲生民之命寄于其手故俯首柔服莫敢抗拒凡中國勇健豪壯之氣索然無復有者矣夫戰勝之民勇氣百倍敗兵之卒沒世不復蓋所以戰者氣也所以不戰者氣之畜也戰而後守者氣之餘也古之不戰者養其氣而不傷今之士不戰而氣已盡矣此天下之所大憂也昔者六國之際秦人出兵于山東小戰則殺人大戰則割地兵之

所至天下震慄然諸侯猶帥其渙散之兵合縱以擊秦砥礪戰士激發其氣長平之敗趙卒死者四十萬人廉頗收合餘燼北推栗腹西抗秦兵振刷磨淬不自屈服故其民觀其上之所爲日進而不挂皆自奮怒以爭死敵其後秦人圍邯鄲梁王使將軍新垣衍如趙欲遂帝秦而魯仲連慷慨發憤深以爲不可蓋天下之士所爲奮不顧身以抗強虎狼之秦者爲非其君也而使諸侯從而帝之天下尚誰能出身以事非其君哉故魯仲連連非徒惜夫帝秦之虛名而惜夫

天下之勢有所不可也。今尊奉夷狄無知之人交歡
納幣以爲兄弟之國。奉之如驕子。不敢一觸其意。此
適足以壞天下義士之氣。而長夷狄豪橫之勢耳。愚
以爲養兵而自重。卓然特立。不聽夷狄之妄求。以爲
民望。而全吾中國之氣。如此數十年之間。天下摧折
之志復壯。而北狄之勇非吾之所當畏也。雖然。天下
有二病。好戰則財竭。而民貧。畏戰則多辱。而無威。欲
民之無貧。則無疾。夫無威。欲君之無辱。則無望乎財
之不竭。此二患者。天下未嘗兼有也。古之人君各從

其所安而處其偏是以不獲全享其利而亦未嘗兼
受其病者。昔匈奴之于漢可以見矣。文景之世天下
治安民至老死不知征役之勞府庫盈溢其賦于民
者三十而取一可謂至盛矣。然而匈奴傲慢侵侮至
甚不遜輸金繒納錦繡天子之至辱也。而文景不以
爲意以求全其民。至于武帝不忍數世之忿盡天下
之銳而攻之開地千里斬馘百萬匈奴之民死者大
半洗除先祖之宿耻而夸大中國之氣得志滿意無
以加矣。而內自疲敝中民之家大抵皆被無復千金

之戶此二者皆有所就其成功是以有所忍而不顧而得者之論已謂非中國之長算矣今者中國之獎在于畏戰畏戰固多辱矣而民又不免于貧無所就其利而徧被其害重賦厚歛以爲二邊之賂國辱而民困蓋今世之病已極矣賢人君子竭其智慮以求安其民而民常爲夷狄之所擾天子欲使其澤下布四海而海內常爲夷狄之所困此其弊蓋有原矣二邊之賂不絕是以天下之賦歛雖知其甚重而不可輕天下之賦歛甚重而不可輕是以天下之民雖知

其甚困而不可得而安也。蓋方今天下之議莫不以爲二邊之賂不可去。獨其勇者則曰寧戰而無賂。戰未必敗而賂必至于乏。因臣竊以爲此古之漢武帝唐太宗堅忍而不顧者足以行之。然亦所犯天下之至危何者。吾民之不戰久矣。用不戰之民而待必戰之敵。竊恐世俗之難之也。夫古者霸王之臣因敗而成功。轉禍而爲福。若反覆手之間耳。方今二虜之賂雖有所不得已而然者。然其勢偶有似夫戰國之際以謀相傾而陰相漬者。是故臣欲因而成之以潛破。

二虜之國古語有之曰將欲取之必固與之昔者晉之取虞越之取吳冒頓之取東胡石勒之取王俊此四者皆其子之之力也夫鄰國之患惟其相忌而相伺以不敢相易是以其慮詳密而難圖今夫中國之不競亦已久矣彼其相視以爲無能爲者非一日也然猶未肯釋然而無疑夫惟釋然而無疑而後其國可取今吾猶有所齟齬于其間彼以吾爲猶有不服之心是以君臣相視而未敢懈蓋古之英雄能忍一朝之恥而全百世之利臣以爲當今之計禮之當加

恭待之當加厚。使者之往無求以言勝之。而其使之
來者亦無求以言犯之。凡皆務以無逆其心。而陰墮
其志。使之深樂于吾之賄賂。而意不在我。而吾亦自
治于內。蒐兵練馬。擇其情銳而損其數。以外見至弱
之形。而內收至強之實。作內政以寓軍令。凡皆務以
自損吾強大之勢。而見吾衰弱之狀。使之安然無所
顧忌。而益以怠傲。不過數年。彼日以無備。而吾日以
充實。彼猶將以吾爲不足與也。而有無厭之求。彼怠
而吾奮。彼驕而吾怒。及此而與之戰。此所謂敗中之

勝而弱中之強者也。嗟夫方今之事其勢亦有二而已矣。能奮一朝之勞而盡力以攻之則其後可以大安。而其始也不免有歲月之勤。能忍一朝之辱而自損以驕之則其後可以驟勝。而其始也不免有歲月之耻。此二策者皆足以謀人之國敗人之兵而有勝矣。而臣竊謂今世之所安者必其予之而驕之者也。嗟夫智能攻之則以洗天下之大慙。不能攻之則驕之而圖其後。未有不能攻之又不能驕之而拱手以望其成功者。方今每歲委百萬之資以予人而不能

使人無疑其有不服之心。罄竭四海而其終不能以成事。特幸其一時之安。而欲得其間隙之際以治天下。天下安可得而治哉。

拓跋夏者。故党項部戎種也。本拓拔氏。貞觀中歸唐。賜姓李。唐末拓跋思恭鎮夏州。統銀夏綏宥靜五州之地。討黃巢有功。四傳至繼捧。當宋太宗時。以家難入朝。時吳越王旣獻地。而夏自上世來未有入獻見者。繼捧至。帝大喜。厚遇之。繼捧乃自陳其諸父兄弟相爲怨。願納土畱京師。帝愈益喜。授繼捧彰德節度。

使曲赦所部遣使者護其總麻以上親赴闕而弟繼
遷入于地斤澤以叛邊吏不能擒制天子乃用相普
計遣繼捧還令圖之賜姓名趙保忠投夏銀等州觀
察處置使然繼捧本以不能制蕃族而來卽復還繼
遷視之蔑如也繼至鎮繼捧謬上書言繼遷今悔禍
歸款乞恩貸詔授繼遷銀州觀察使賜姓名趙保占
而繼遷爲寇暴自若已繼捧復使來乞師詔命將往
討則繼捧以中國爲不足全恃已遣使如契丹乞降
得封西平王矣聞宋師至先舉其母妻徙野外乃上

言業與繼遷解怨獻馬乞罷師帝怒其反覆趣進師
得繼捧獻闕下責授右千牛衛將軍而繼遷自有銀
夏綏宥靜之地時窺邊咸平三年涇原經畧使張齊
賢言自清遠軍陷青岡砦燒棄而來靈武一郡援隔
而勢孤此繼遷覲所必至者也以事勢言加討則
不足防邊則有餘臣觀蕃部大族首領類多與虜隙
宜可致誠能封其首先歸義者王之結以恩則蕃族
稟命而緣邊之勢張鄜延環慶之淺蕃原渭振戎之
熱戶必且歸化而賀蘭可漸至矣臣所領十二州現

軍二萬餘人緣邊料揀○尚可○得○三○萬○人○令○招○致○蕃○部○
各○分○守○信○地○爲○聲○援○彼○出○則○我○歸○東○備○則○西○擊○使○奔○
走○不○暇○雖○其○狡○獷○亦○何○敢○復○爲○靈○州○患○哉○若○不○然○冬○
春○之○交○我○兵○未○聚○虜○必○併○兵○靈○武○則○靈○武○孤○勢○必○難○
固○靈○武○失○則○賊○勢○益○猖○後○聚○兵○費○財○未○有○艾○也○會○學○
士楊億唱議棄靈州判永興軍何亮等爭以爲靈州
地方千里表裏山河唐資之以中興不可棄帝以問
宰相李沆沆曰繼遷不死靈州非朝廷有也昔漢捐
珠厓矣若遣使密召州將部軍民空壘歸關右民庶

息肩乎議未決而靈州陷繼遷以爲西平府徙居之
蓋宋士守和戎息兵爲國是雖天子亦悔以爲不前
用沆言及繼遷死子德明立恐中國襲之請內附知
秦州曹瑋上書言繼遷擅河南地使兵不解甲中國
有西顧憂者十年今國危于弱而不以時定後必蔓
蔓難圖也願假臣精兵數萬出不意擒之復河西爲
郡縣不報而德明連表言父有遺命奉誓書請藏盟
府天子嘉其意授時進簡較太師西平王責質子而
德明以質子非先世故事不遣獨獻馬駝謝恩久之

德明死子元昊代立而黠多智習兵元昊幼時嘗諫其父母臣宋德明日吾用兵疲矣吾族三十年衣錦綺此宋恩何可忘元昊曰衣皮毛畜牧自天性下錦綺何有英雄之主當霸王豈顧疲哉于是侵吐蕃取瓜沙肅遂盡有靈鹽會勝之境地方數千里阻河居興州依賀蘭山以爲固僭號改元張官吏寇邊自河西至于臘窮山屯十萬人備契丹白豹安甯天都山宿五萬人備環慶鎮戎原宥路屯五萬人備鄜延府右廂甘州軍三萬人備西蕃而開紇賀蘭靈州興慶

各宿重兵爲鎮防與諸豪酋歃血結約而表請自帝
詔削官爵罷互市而元昊亦遣人齎書納旌節及
上所授敕告委之邊而去時天下承平久憚言兵而
狂易者又以爲小醜易與慮不顧其難于是元昊拔
慶州破安遠塞開永平諸砦圍延州延州當夏人出
入之衝地濶巖踈土兵寡弱又無宿將時知州范雍
聞之懼甚元昊詐遣人通款于雍雍信之不設備旣
而元昊盛兵攻保安軍鄜延副總管劉平石元孫屯
慶州雍以書召之平與元孫趨土門元昊乘勝至延

州城下雍閉門堅守平元孫聞之督騎兵晝夜倍道而前夜至三川口四十里止營遣騎兵先至延州爭門時鄜延都監黃德和巡簡萬侯政郭遵分屯外境雍皆召還爲援平與之合步騎萬餘結陣東行五里許與賊遇賊蔽盾爲陣官軍擊却之平中流矢日暮賊以輕兵薄戰官軍小却黃德和居陣後望見軍却率麾下走保西南山衆從之平遣軍較杖劍遮甬得千餘人轉鬪三日賊退平率餘衆保西南山立柵自固夜四鼓賊環營呼曰如許殘兵不降何待平旦賊

西舉鞭麾騎自山西出、合擊絕官軍爲二、平遂與元
孫等皆沒于賊、會大雪賊解去、延州得不陷、中外大
駭、天子爲肝食、相夷簡勸帝收用韓琦、范仲淹二人、
倚以西事、于是以夏竦爲陝西經畧安撫使、琦、仲淹
副焉、時西邊新失大將、延州危、仲淹請身往守、延命
兼知延州、初制邊邊將總兵鈐轄都監、兩下出禦寇、
不料敵不擇帥、獨以官卑尊爲先後、仲淹曰、是趣之
敗也、于是大閱州兵、得萬八千人、分六將將之、將各
三千人、日大蒐使更出禦賊、又招收前後作奸犯科

經略配者團結之號龍猛軍兵益稍振以民遠輸將
費苦請建鄜城爲軍以河中同華中下戶租稅就輸
之春夏徙兵就食可省糴十二三他所減不與詔以
爲康定軍于是招流亡立堡寨嚴保甲通斥堠羌漢
之民相踵歸業使夏竦上攻守二策帝取攻策魏公
琦亦言賊傾國入寇衆不過四五萬吾諸路屯重兵
自守勢分力寡遇敵輒不支若并兵一道鼓行而前
可破也于是諒鄜延涇原皆會師仲淹諍以爲今邊
城之備十有五七關中之備十無二三若賊乘關中

之虛深入阻潼關。兩川貢稅則朝廷不得高枕而
臥矣。爲今之計。戒邊城使持久可守。實關內使無虛
可乘。寇至清野使戰無所獲。攻無從入。而許臣等稍
以威信招來之。一三年間。彼將自困。此萬全計也。今
必五路並進。暴師于外。臣恐承平之久。國無宿將。兵
無選鋒。而僥倖于危事。一蹉跌。則平定之期益遠矣。
琦又令尹洙至延州。與議仲淹執不可。于是詔寢兵。
會元昊詣延州約和。琦聞之曰。無約而和者謀也。勒
兵行邊。元昊果遣衆寇渭州。薄懷遠城。琦乃趨鎮戎。

軍盡出其兵又募勇士萬八千人命環慶副總管任福將之琦令福并兵自懷遠趨德勝砦至羊牧降城出敵後諸砦相距纔四十里道近糧餉便度勢未可戰卽據險置伏要其歸路戒之再三且曰苟違節制有功亦斬福引輕騎數千趨懷遠禁龍川遇敵戰于張家堡南斬首數百敵乘馬羊橐駝徂北福等易之薄暮與都監桑懌合軍屯好水川約翌日會兵川口必使夏人匹騎無還然不知已陷其穴中矣路旣遠芻餉不繼士馬乏食者三日時元昊自將精兵十萬

營川口候者言夏人有寨數不多兵乃益進福與釋
循好水川距羊牧隆城五里與夏軍遇遂前格戰于
道旁得數銀泥合封襲謹密中有動躍聲疑莫敢發
福至發之乃懸哨家鴿百餘自合中起盤飛軍上于
是夏兵四合釋馳犯其鋒福陳未成列賊縱鐵騎突
之自辰至午陣動傳等皆欲據勝地俄而夏人陣中
忽樹鮑老旗長二丈許釋等莫測及旗左麾左伏兵
起右麾右伏兵起士卒多墮崖塹相壓積死釋及福
沒焉時乃自劾貶知秦州仲淹以擅與元昊通書亦

奪官知耀州于是元昊陷豐定州掠渭州而去議者
欲以金縢啖契丹使攻元昊以緩師初趙元昊欲叛
而未有以發也則爲嬖書求大名以怒朝廷規得譴
絕以激使其衆張方平以謂朝廷自景德以來旣與
契丹盟天下忘備將不知兵士不知戰民不知勞蓋
三十年矣若驟用之必有喪師蹶將之憂兵連民疲
必有盜賊意外之患當含垢匿瑕順適其意使未有
以發得歲月之頃以其間遑將厲士堅城銳器爲不
可勝以待之雖元昊終于必叛而兵出無名吏士不

直其上難以決勝小國用兵三年而不見勝負不折
則破我以全制其後必勝之道也是時士大夫見天
下全盛而元昊小醜皆欲發兵誅之惟方平與吳育
同議議者不深察以二人之論爲出千姑息遂決用
兵天下騷動方平獻平戎十策大畧以心城千里我
分而賊專雖屯兵數十萬然戰至常以一擊十必敗
之道也既敗而圖之則老師費財不可爲已宜及民
之完屯重兵河東示以形勢賊入寇必自延渭而興
州巢穴之守必虛我師自麟府渡河不十日可至此

所謂攻其所必救。形格勢禁之道也。宰相呂夷簡見之。謂宋綬曰。君能爲國得人矣。終不果用其策。方是時。禁兵皆西。而諸路守兵多。棟赴闕。郡縣無備。命調額外弓手。方平在睦州。條上利害八事。有旨遣使于陝西河東京西四路。刺弓手爲宣毅。保捷。指揮方平連上疏。爭之甚力。不從。宣毅十四萬人。保捷九萬人。皆市人不可用。而宣毅驕甚。所在爲寇。自是民大困。國用一空。識者以不從方平言爲恨。時夏竦并護四路劉平石元孫任福之敗。皆貶主帥。而竦獨不問賊。

圍麟府詔竦出兵牽制竦逗畱不出使賊平豐州夷
靈遠而去方平極言之詔罷竦節制自是四路各得
專達人人自效邊備修完賊至無所得無何安撫使
王堯臣言琦仲淹忠義智勇不當置散地惟天子亦
以涇原傷夷遣使喻仲淹欲移鎮仲淹謝曰涇原重
地臣弗堪卽用臣臣願與韓琦同任得並駐涇州許
琦兼秦鳳臣兼環慶涇原有警臣與琦合秦鳳環慶
之兵犄角而進若秦鳳環慶有警亦得帥涇原之師
赴之卽聲勢合而首尾之形成仍詔櫜籍領環慶文

彥博領秦滕宗諒孫沔領慶乃渭州一武臣足矣。于是置陝西五路安撫經畧招討使各開府如其言。于是琦仲淹愛撫士卒。延接諸羗降者。咸感恩畏威。士勇邊實。時京師所遣兵從宿衛來。曾不能苦勞。賊易之。而士兵勁悍善戰。琦奏增士兵以抗賊。而稍減屯戍。實京師。又以籠竿城蔽蕭關。鳴沙孔道實要地。請以爲德順軍。廖院喉乃在橫山。請于鄜延渭三州各練士兵三萬爲一軍。軍別屯而耳目相通。爲視聽候虜所不備。出互搆之。破其和市。離其種落。以其間招

來○橫○山○之○人○橫○山○隙○則○平○夏○不○支○平○夏○下○則○俯○視○典○
靈○如○穴○中○兔○可○攫○而○得○矣○于○是○與○仲○淹○定○攻○取○計○益○
堅○西○人○爲○之○語○曰○軍○中○有○一○韓○西○賊○聞○之○心○膽○寒○軍○
中○有○一○范○西○賊○聞○之○驚○被○膽○其○憚○惜○如○此○初○元○昊○自○
怙○其○狡○習○兵○取○臣○屬○中○國○又○以○中○國○承○平○久○不○習○兵○
也○故○啓○釁○已○而○中○國○繕○守○備○益○完○與○攻○戰○勝○負○亦○往○
往○相○當○而○國○中○死○亡○瘡○痍○者○日○衆○會○大○旱○鼠○食○稼○財○
力○困○憊○國○中○至○爲○十○不○如○之○謠○以○怨○之○于○是○大○困○沮○
而○天○子○益○厭○苦○兵○密○詔○經○畧○使○龐○籍○招○納○事○有○端○而○

朝議幸元昊自歸將一切惟所欲從之也。經畧使琦上書言。今朝廷信賞必罰。帥臣得便宜制置。一二年間。訓兵數萬。號令齊一。陳伍精整。而熟戶蕃兵日漸可指臂而使。賊若傾國而來。則清野守塞。令其坐困。若偏師稍至。則據險乘便以要之。得當而後已。待其退散。我兵以其間歲三五出入擾之。元昊諸廂兵多在河外。必且疲于奔命。形立勢制。將山界蕃部必勢窮自歸。因厚撫其酋豪。而元昊之手足自折矣。願朝廷以平定大計爲期。當軍行時。不以小勝小衄爲意。

則二五年間大功可集。豈遠爲觀耶。契丹身國家深
長之謀如此。必懼而保盟。不復敢輕動。此中國之長
策也。若處置失宜。生其意侮。他時爲中原禍。豈止今
日之邊患而已哉。臣等早蒙拔擢。預玷清班。竊下三
年憂勞。備極。豈不願罷戍。冀少自休。誠見西戎強梗。
未衰挾以變詐。宜慎其處置。爲聖朝長久之畫。誠不
敢以身圖而後國事也。帝嘉納。嗟大古之豪傑。命世
者其計畫亦憂憂乎不相入哉。夫元昊雖善兵。何嘗
不畏人攻。乃常使得氣去。非力不勝。諸將常惴惴自

完也。法曰：無所不備，無所不實。又善戰者制人而不
制于人。斯二者，乃自吳操之，而中國能與論勝負耶？
倘中國有能制吳，令吳亦備我，吳徒蕞爾，必不支，必
折而入我。斯韓公琦之所爲計也。范相持重，有體專
務經理內地，行漸攻之術。余觀其在環慶時，條約諸
羌如搏黍戲。小兒卒爲中國用，城大順城及細腰葫
蘆諸砦，附明珠滅臧等族，環鎮道得不梗，悚讐柔順。
善乎其熟策之也。可謂經國之老成，庶幾哉金城之
師乎！然好水之役，雖將失律，安得謂勿與知也。而

偏裨爲解大抵承平之後論戰固難之矣茲范相之
早睹者哉乃若次第稍定武備漸修斯又減此朝食
之時而令夏竟行請和夫不若則能避之終操制勝
之權者吳也坐失機宜可謂歎息夫始如處女敵人
開戶後如脫兔敵不及距今不可戰而戰可以戰而
不戰無一當之者天耶嗚呼惜哉踰年元昊議約降
獨上書稱男定固兀卒上書父大宋皇帝更名而不
臣經畧使龐籍致之闕下且言羌久不通和國人愁
怨今必有改事中國之心請謹所以御之者使至司

諫蔡襄言元卒者譯云吾祖也吾祖猶我翁令朝廷
賜之詔而亦曰吾祖是何等語耶學士弼亦言契丹
臣元昊而我不能臣則契丹爲無敵于天下矣不可
許乃却其使卒臣之許歲賜二十有五萬封夏國主
而和成乃元昊帝其國中自若也始元昊之作難也
上師屢撓常有并吞闕中之意其將野利天都二人
實爲之腹心環慶都鈴轄种世衡計以二人者不去
中國之難未已也有王嵩者本青洲僧世衡察其堅
朴表授官力經營其家恩厚之以忽怠已更挫辱其

之。無。尚。終。衡。思。無。少。望。乃。召。對。勞。苦。之。曰。吾。已。試。若。也。若。幾。能。成。我。事。乎。尚。泣。對。曰。惟。將。軍。之。所。使。之。于。是。乃。草。遺。野。利。書。爲。隱。辭。如。嘗。有。私。約。而。遽。其。行。者。以。蠟。置。袖。衣。中。密。縫。之。勅。非。濱。死。必。勿。出。而。尚。至。野。利。所。致。將。軍。命。出。橐。一。部。龜。一。幅。以。爲。信。乃。無。書。野。利。不。敢。匿。上。之。元。昊。元。昊。痛。楚。之。幾。死。終。不。言。命。曳。斬。之。乃。號。哭。日。始。將。軍。遺。尚。遺。野。利。王。書。戒。必。獨。致。野。利。王。野。利。王。乃。庭。見。尚。尚。所。以。恐。死。者。冀。得。聞。投。野。利。王。也。今。死。矣。吾。負。將。軍。吾。負。將。軍。于。是。乃。出。書。

而元吳果大疑野利遣所信謬爲野利使使世衡所
世衡謬爲不知也者而結之于是元吳殺野利世衡
知謀已行乃設奠境上爲文言野利與天都皆有意
本朝而惜其無成天都亦以此得罪元吳既失二將
羽翼鍛而勢孤遂定和本元吳所爲和者世衡間二
將之力焉後元吳據國十有六年而死子諒祚立英
宗初諒祚使失辭救懲約而諒祚不奉詔願援邊失
利去會發賜歲幣知延州陸詵曰朝廷積習姑息故
虜益悖驚不稍抑則國威不止置不遣而上書言此

于是韓魏公琦相國議停歲賜絕和市遣使問狀樞
密使文彥博難之舉寶元康定時事以爲餒琦曰諒
祚狂童也非有元昊智計勇力而今日邊備過異時
遠甚亟詰之必服于是詔說牒宥州問狀諒祚果大
沮謝罪時歐陽修亦上言曰伏見諒祚狂僭釁隙已
多不越歲年必爲邊患臣輒以外料敵情內量事勢
鑒往年已驗之失思今日可用之謀雖兵不先言俟
見形而應變然坐而制勝亦大計之可言所謂外料
敵情者國家自寶元慶曆以後一方用兵天下騷動

國虛民弊如此數年元昊知我有厭兵之患遂復議和而國家待之恩禮又異于前矣號爲國主僅得其稱臣歲與之物百倍德明之時半于契丹之數今者諒祚雖曰狂童而習見其家世所爲蓋繼遷一叛而復王封元昊再叛而爲國主今若又叛其志可知是其欲自比契丹抗衡中國以爲鼎峙之勢耳此臣竊料敵情在此也夫所謂內量事勢者蓋以慶曆用兵之時視方今邊備較彼我之虛實強弱以見勝敗之形方今甲兵雖未精利不若往年之磨朽也城壘粗

嘗修緝不若往年之墮頽也。土兵藩落增添訓練不若往年之寡弱驕怠也。大小將較曾經戰陣者。往往尚在不若往年。魏昭炳夏隨之徒。膏梁子弟也。一二執政之臣。皆當時宣力者。其關心西事熟矣。不若往年大臣茫然不知所措者也。蓋往年以不知邊事之謀臣。馭不識干戈之將。用驕兵。執朽器。以當桀黠新興之虜。此所以敗也。方今謀臣城壘器械。不類往年。而諒祚狂童。不及元昊遠甚。往年忽而不思。今又已先覺。可以早爲之備。苟不叛則已。若其果叛。未必不

爲中國利也。此臣內量事勢，謂或如此，所謂鑒歷年已驗之失者。夫夷狄變詐，兵交陣合，彼佯敗以爲誘，我貪而追之，或不虞橫出而爲其所邀，或進陷死地而困于束手。此前日屢敗之戒。今明習兵戰者亦能知之，此雖小事也，亦不可忽。所謂大計之謬者，攻守之策皆失耳。慶曆禦邊之備，東起麟府，西盡秦隴，地長二千餘里，分爲路者五，而分爲州爲軍者二十有四，而軍州分爲寨爲堡爲城者又幾二百，皆須列兵而守之。故吾兵雖衆，不得不分，所分旣多，不得不

寡而賊之出也。常舉其國衆合聚爲一而來。是吾兵雖多分之而寡。彼衆雖寡聚之爲多。以彼之多擊吾之寡。不得不敗也。此城寨之法。旣不足自守矣。而五路大將軍所謂戰兵者。分在二十四州軍。欲合而出。則懼後空而無備。欲各畱守。備而合其餘。則數少不足。所以此當時所以用兵累年終不能一出者。以此也。夫進不能出。攻退不能自守。是謂攻守皆無策者。往年已驗之失也。所謂思今日可用之謀者在。定出攻之計耳。必用先起制人之術。乃可以取勝也。蓋

列兵分地而守敵得出而撓于其間使我處處爲僭
常如敵至師老糧匱我勞彼逸昔周世宗以此策困
李景于淮南昨元昊亦用此策以困我之西鄙夫兵
分傳寡兵家之大害也其害常在我以逸待勞兵家
之大利也其利常在彼所以往年賊常得志今誠能
反其事而移我所害者予敵奪敵所利者在我則我
當先爲出攻之計使彼疲于守禦則我亦可以得志
凡出攻之兵勿爲大舉我每一出彼必呼集而來拒
彼出于東則別出其西我歸彼散則我復出而又集

我以五路之兵。番休出入。使其一國之衆聚散奔走。無時暫停。則無不用虜矣。此臣所謂方今可用之謀也。蓋往年之失在守。方今之利在攻。昔至道中。亦嘗五路出攻矣。當時將相爲謀不審。蓋欲攻黠虜方強之國。不先以謀困之。而直爲一戰。必取之計。大舉入深。所以不能成功也。夫用兵難事也。故謀既審矣。則其法也。果故能動而有成功。凡用兵之形勢。有可先知者。有不可先言者。願遣一重臣出而巡撫。徧見諸將。與熟圖之。以定大計。凡山川諸路。番漢步騎出入。

所宜可先知悉圖上方畧其餘不可先言付之將帥
使其見形應變因敵制勝至諒祚之所爲宜先屈意
含容而曲就之旣以驕其心亦少緩其事以待吾之
爲備而且嚴戒五路訓兵練將利器甲蓄資糧具軍
行之計待其反書朝奏則王師暮出以駭其心而奪
其氣使其支吾不暇則勝勢在我矣已邊吏言夏將
蒐名山者欲以橫山之衆取諒祚自歸詔許招納中
丞司馬光爭曰向者諒祚雖時有假寢禮節不備然
猶稱臣奉貢未敢顯然自絕也今乃誘其叛臣以圖

之縱使誠臬諒祚之首復靈夏之士以王者之兵言之猶可耻也况其成敗未可知乎恐邊事之興生民之苦歸此而始也王者之于諸侯叛則討之服則撫之是以諸侯懷德畏討莫不率從去歲諒祚攻大順城殺畧士民今春朝貢之使不以時至當是時不能討也今朝廷旣赦其罪與其使物受其獲者納其貢獻又從而誘其叛臣激其忿心是常欲其叛而不欲其服也信義賞罰將安在乎議者或以爲彼誘我民我誘彼臣何爲不可是特閭閻小人之語非知國家

大體者也。彼僻陋小羌竊誘我民以益其衆，仍欲以天子億兆之富而效其所爲。耶譬如鄰人竊已之財，已以正意責之可也，豈可復竊彼之財以相報耶？且諒群陰蓄奸謀爲日固久，招納不逞之人以爲謀主，誘脅熟戶以徹中國之藩籬，常有據關中窺河東之心。雖未必能然，若縱其毒蠱亦足以爲亭鄣之患，未可以小種之羗孱弱之人待之也。國家不幸比遭大憂，帑藏空虛，關中之民自經西事以來，仍苦鐵錢財力凋弊，熟戶屢經殺掠，亡失大半，縱其在者亦懷二

心非復得如景祐寶元之時也。當此際深詔邊吏。崇
信誓。保分界。嚴守備。明斤埃以待之。猶懼諒祚狼子
野心。不識恩義。乘我釁隙。侵噬疆場。又况彼不動而
擾之。不來而召之乎。或者諒祚久懷逆計。以朝廷待
之恩禮優厚。無因而發。故遣其部將詐降。以卜之。若
朝廷受之。則將歸曲而責直。得以爲背叛之名。或者
使其部將詐言勢孤力弱。不能獨置諒祚。乞朝廷遣
將出師爲助。而陰設伏兵。以徼大利。此二者皆未可
知也。若萬一有之。則今日受之。正墮其計中矣。縱使

名山實有降心○蓋亦私有忿恨○或別負罪惡○反側不安○欲倚大國之威○以逼其主○其所部之民○未必肯盡從也○雖其自言權勢之強○甲兵之盛○有謀善戰○爲民所附○蓋欲自誇○以求售耳○未必然也○借令實能舉兵○以與諒祚爲敵○戰而勝之○則是滅一諒祚○生一諒祚也○若其不勝○必引其餘衆○南奔中國○諒祚悉其境內之兵○以追之○怒氣直辭○長驅入塞○當是之時○非口舌文移所能解也○臣恐朝廷不惟失信于諒祚○又將失信于名山矣○若名山餘衆無幾○猶可以縛而送之以

緩諒祚之兵。然形迹已露。諒祚必叛無疑。若餘衆尚
多。還北不可。入南不受。窮無所歸。必不肯如山遇東
手就死。將突據邊城以救其命。更爲中國之患。未有
涯也。陛下不見侯景之事乎。疏奏不聽。而夏人始惑。
神宗初。諒祚卒。子秉常立。天子用相安石言。欲強兵。
建昌軍司理王韶詣闕上策言。西北自武威以南至
于洮河蘭鄯。皆故漢郡縣地。可耕而食。民可役而使
也。故欲取西夏。當復河湟。欲復河湟。當先以恩信招
撫沿邊諸羌種。今諸羌種族分散。莫相統一。此其時

可併而撫也。且唃氏子孫寔征差盛爲諸羗所畏。若
撫而用之。使糾合宗黨。制其部族。于漢有肘腋之助。
而于夏人爲斷兵左臂也。天子異其言。下兩府文彥
博難之。而王安石大喜。以爲奇謀。力王之。請卽以詔
任其事。詔至。秦請築渭涇上下兩城。立屯宿重兵。以
撫納洮河下。秦鳳帥議經畧使李師中言。今議修築
必廣發兵。廣發兵則聲勢張。臣恐西蕃及洮河武勝
軍諸部族生疑也。不若先招撫青唐武勝及洮河諸
蕃族。以畔夏。必乞修城砦。因所欲量發兵助築。則斷

絕夏人鈔畧之患而部人歸心計之得者也唐于西
域每得其地輒建爲州後皆陷失至以清水爲界蓋
根本之計未實腹心之患未除而勤遠畧貪土地者
未有不弊者也安石以爲沮撓不聽詔又言今群臣
疑洮河不可復者以無財也渭源至秦中良田不耕
者萬頃願置市易司假官錢爲之本頗收商賈之利
取其贏以治田異時田易息多以措置洮河軍可無
乏興帝召中書議安石大喜之彥博曰陛下未聞工
師之造屋乎初必小計冀人易興作及工旣動知不

可已乃漸增多臣竊慮其後之難繼也帝不以爲然
曰屋誠壞亦何得無修王安石面訾之曰王者誠善
計有成屋于胸中何得欺其所欺者其無成屋胸中
者耳彥博語塞乃詔師中以川交子易物貨給之師
中又以爲詔所指田乃極邊弓箭手地耳又移市易
司于古渭僻不宜商恐異時得不償所失安石怒奪
一官知舒州而遣竇舜卿知秦州與宦者李若愚按
閑田僅得地一頃業又有訟者舜卿若愚奏其欺又
爲謫舜卿而令韓績附會成其事詔旣主洮河安撫

司事以蕃部龕龍珂左青唐最大因按邊引數騎直抵其帳諭降之兩種內附者十二萬人于是名占渭若爲通遠軍使詔知軍事以圖武勝部引兵築訖神平堡而蕃酋抹耳結水巴等族人寇部率兵度竹牛嶺逼之斬首百餘級焚其廬帳洮西震動會木征渡河來寇抹耳復依其聲勢係集抹邦山知德順軍景思立以涇原兵南路分遣諸將一擊抹耳于南甲一擊木征于鞏令城制二酋使不得動部將大軍從東谷徑趨武勝未至數里賊迎戰敗還追至城首領瞻

藥系城遁餘衆出降遂城武勝建爲鎮洮軍名熙州
已進復河岷于是得宕洮疊三州并前內附者爲州
五斬首數千級獲馬牛羊萬計帝御紫宸受朝賀輟
玉帶賜安石然熙河雖名一路實無賦入而軍食仰
于他路西人疲焉時帝銳意開拓希功者兢逢指言
內附六年冬章惇擊南江蠻平之湖北蠻各以其地
降遂置沅州後徽州蠻酋楊光富亦率其族姓二十
三州峒歸附因置靖州其明年熊本討瀘夷降之本
嘗通判戎州習夷中俗及至部以爲彼能擾邊者介

十二柯陰爲鄉導耳乃以計致百餘人梟之潰其
徒股栗願矢死自贖而柯陰一酋不至本進討敗之
盡籍丁口土田及其重寶善馬歸之官于是烏蠻羅
氏鬼主諸夷皆願世爲漢官本還帝勞之曰卿不傷
財不害民一旦去百年之患至于檄奏詳明近時鮮
儼摧集賢殿修撰西南用兵自此始久之本又擊渝
州僚降之置南平軍停又招降下溪州詔築城賜名
會溪戍以兵自是五溪皆平于時廣西亦屯兵以備
邊交人畏之劉蕤聽偏較言以爲安南可取乃大治

戈船交人來互市率皆遇絕表疏亦不得達于是遂
分二道而寇連陷欽廉二州事聞以郭逵老于邊事
將兵討之趙尚爲副仍詔占城占臘合擊交趾逵自
將西進至富良江蠻以精兵乘船逆戰官軍不能濟
趙尚分遣將吏伐木治攻具機石如雨蠻船皆壞因
設伏擊之斬首數千李乾德懼遣使奉表請軍門納
款群臣稱賀詔以廣源爲順州赦乾德罪初熙寧中
王安石憤國力弱而歲糜金幣于二虜無爲也增城
堡圍保伍欲外攘以爲功至是契丹主洪基遣蕭禧

來言疆事時洪基立日久改國號曰大遼矣帝手詔
諸老臣博謀條議上韓魏公琦上議言臣觀近年朝
廷舉事不以大敵爲恤而示之以可疑之形故虜人
見形謂我有圖復燕南之意造此釁以發難名理地
界實以觀中國之俯仰今所爲致虜之疑者七端高
麗臣屬契丹絕朝貢者久矣乃因商舶招來之于國
家無分毫益而契丹謂將以圖我一也吐蕃部族不
相君長初未嘗爲邊患而強取其地建熙河殺老弱
萬計契丹聞之謂行將及我二也近西山邊縣地勢

高仰可爲塘濶而遣使部兵徧植榆柳以制虜騎三
也往義勇民兵將較甚整教習亦精但以時訓練于
僻禦不啻足矣而忽創團保甲一道紛然義勇之人
十去其七破可用之成法得增數之虛名四也河北
城池工築並興增置守具檢視器械內外騷然五也
制都作院頒降方刀新式大作戰車費財殫力先自
困斃六也置河北三十七將各專軍政州縣不得關
預聲言出征又深見可疑之形七也夫北虜素于我
爲敵國形見疑起勢不得不探其所繇然橫使再至

姑示輕蹙而代北雄州素有定界若優容而與之卽
虜情無厭浸淫不已若終不許虜遂恃此以爲已直
縱未大舉勢必漸擾諸邊臣竊伏歎以爲爲陛下始
謀者大誤也始爲陛下謀者將必曰自祖宗以來因
循苟簡治國之本當先富強然後可以鞭笞四夷盡
復漢唐之土宇而制作禮樂以文太平故散青苗錢
爲免役法置市易務以次第取錢監司督吏競刻爲
明而違者不以赦降令農夫怨于畝畝商旅嘆于道
路官不安其職民不安其生夫欲攘斥四夷以興大

平而先使邦本困搖衆心離怨是爲陛下始謀者大
誤也又奸進之人不顧國家利害但得邊事將作以
爲富貴可圖必曰虜勢已衰特外示驕慢幽燕之地
一舉可復夫河朔累歲災傷民力困乏將帥靡勇寡
謀保甲未經訓練若驅重兵頓之堅城之下糧道不
繼腹背受敵雖曹彬米信名德宿將猶以此致岐溝
之敗况今日平臣愚爲陛下計第宜遣使報聘具言
朝廷向來興作乃修備之常與北朝通好之久自古
所無豈有他意且疆土素定當如舊界宜命邊吏退

近者侵占之地將官員冗冗而罷去以釋虜疑陛下
益愛養民力選賢任能疎遠奸諛進用忠鯁使天下
悅服邊備日充虜果敗盟然後一振威武恢復故疆
快忠義不平之心雪祖宗累朝之憤于計爲長也弼
彥博公亮亦皆有言大抵度上以虜爲憂故深備時
事云七年吐蕃木征寇河州圍之其勢方甚詔自京
師還之興平聞之乃與李憲日夜馳至熙州熙方城
守詔命徹之諸將欲趨河州詔曰賊所以圍城者恃
有外援也攻其所恃則圍自解乃直趨定羌城破西

蕃結河川族、斷夏國通路、進臨寧河、木征知援絕、拔
柵去、詔還熙州、以兵循西山、繞踏白城、後焚賊八十
帳、斬首七千餘級、木征窮蹙、率酋長詣軍門乞降、詔
受之、送木征赴京師、初思立之覆師也、羗勢復熾、朝
議欲棄熙河、帝爲之肝食、數下詔戒詔持重勿出、及
是帝大喜、以木征爲榮州團練使、賜姓名趙思忠、
八年遼人復來、議驅車遣知制誥沈括報之、時劉忱
等與蕭素三議不能決、虜初指蔚、朔、應三州分水嶺
土壠爲界、及忱與之行視、無土壠、乃但云以分水嶺

相持久之至是遼主復遣蕭禧來致圖書以忱
等遷延爲言乃命韓縝代忱等與遼使議縝與禧爭
辯禧執分水嶺之說不變爾館不肯辭曰必得請而
後反帝不得已先遣知制誥沈括報聘括請樞密院
閱故牘得頃歲所議疆地書指石長城爲分界今所
爭乃黃嵬山相遠三十餘里表論之帝喜曰大臣殊
不究本末幾誤國事乃遣括行括至遼遼相楊益戒
與議不能屈乃還括在道圖其山川險易迂直風俗
淳龐人情向背爲使契丹圖上之秋七月詔韓縝如

河東割地以界遼遼使爭議疆事不決會安石再相
帝問之安石度不能難乃謬爲大言曰將欲取之必
姑與之于是詔于分水嶺爲界禧乃去至是遣天章
閣待制韓縝如河東割析疆與之凡東西失地七百
里遂爲異日興兵之端嗚呼安石爲神宗變法大取
民財與力而用之也在干兵兵之所用至于破遼而
志願畢矣然畏遼之人故將用于遼必先干夏又先
干群小夷狄自小至大嘗試以圖之安石君臣相與
深謀密議而悉掃異已者之論無非此心也于是王

韶試于黑河章惇試于湖北熊本試于瀘夷郭逵試
于交趾皆能尚有所得而試于夏則得不償其失彼
遼不待其試而先求地安石爲欲取之必與之之說
卒割與七百里之地無得而有失蓋安石之技窮而
神宗漸以沮悔矣然所援引共事之人固在也踵其
故智以用于哲徽之時適值遼有釁躍然攻之以卒
安石之所圖而遽以國斃焉故前宋之亡本于安石
爲神宗謀破遼而已

八年董氈將鬼章聚兵洮岷脇新附羗多叛歸之帝

遣內侍押班李憲乘驛往秦鳳熙河措置邊事詔諸將皆受節制御史彭汝礪等極論其不可且言鬼章之患小用憲之患大憲功不成其患小功成其患大章再上不聽十年春二月王韶免韶與王安石有隙且以勤兵遠界歸曲朝廷帝亦不悅數以母老乞歸乃出知洪州時蘇軾代張方平諫曰臣聞好兵猶好色也傷生之事非一而好色者必死賊民之事非一而好兵者必亡此理之必然者也夫惟聖人之兵皆出于不得已故其勝也享安全之福其不勝也必無

意外之患後世用兵皆得已而不已故其勝也則變
遲而厲大其不勝也則變速而禍小是以聖人不計
勝負之功而深戒用兵之禍何者與師十萬日費千
金內外騷動殆于道路者七十萬家內則府庫空虛
外則百姓窮匱飢寒逼迫其次必有盜賊之憂死傷
愁怨其終必至水旱之報上則將帥擁衆有跋扈之
心下則士衆久役有潰叛之志變故百出皆繇用兵
至于興師首議之人冥謫尤重蓋以平民無故緣兵
而死怨氣充積必有任其咎者是以聖人畏之重之

非不得已不收用也。自古人主好動干戈，蹂敗而亡者，不可勝數。漢唐用兵于寬仁之後，故勝而僅存，秦隋用兵于殘暴之餘，故勝而遂滅。臣勿讀書至此，未嘗不掩卷流涕，傷其計之過也。若使此四君者，方其用兵之初，隨卽敗衄，惕然戒懼，知用兵之難，則禍敗之興，當不至此。不幸每舉輟勝，故使狂于功利，慮患不深。臣故曰：勝則變遲而禍大，不勝則變速而禍小，不可不察也。昔仁宗皇帝覆育天下，無意于兵，將士皆媮兵革朽鈍。元昊乘間竊發，西鄙延安、涇原、麟府

之聞敗者三四所喪動以萬計而海內晏然兵革寧
已而民無怨言國無遺患者何天下臣庶知其無好
兵之心天地鬼神諒其有不得已之實故也○今陛下
天錫勇智意在富強卽位以來繕甲治兵伺候鄰國
群臣窺見此指多言用兵其始也弱臣執國命者無
憂深思遠之心樞臣當國論者無慮害持難之議在
臺諫之職者無獻替納忠之議從微至著遂成厲階
旣而薛向爲橫山之謀韓降效深入之計陳升之呂
公弼等陰與之協力師徒喪敗財用耗屈較之寶元

慶曆之敗不及十一○然而天怒人怨○邊兵背叛京師○
發○然○陛○下○爲○之○肝○食○者○累○月○何○者○用○兵○之○端○陛○下○作○
之○是○以○吏○士○無○怨○敵○之○意○而○不○直○陛○下○也○尚○賴○祖○宗○
積○累○之○厚○皇○天○保○佑○之○深○故○使○兵○出○無○功○感○悟○聖○意○
然○淺○見○之○士○方○且○以○敗○爲○耻○力○欲○求○勝○以○稱○上○心○于○
是○王○韶○構○禍○于○熙○河○章○惇○造○孽○于○梅○山○熊○本○發○難○于○
渝○潼○然○此○等○皆○戕○殺○已○降○浮○紫○老○弱○獎○腹○心○而○取○空○
虛○無○用○之○地○以○爲○武○功○使○陛○下○受○此○虛○名○而○忽○于○實○
禍○尅○強○砥○礪○奪○于○功○名○故○沈○起○劉○蕤○復○發○于○安○南○使○

十餘萬人暴露瘡毒死者十而五六道路之人斃于
輸送貨糧器械不見敵而盡以爲用兵之意必且少
衰而李憲之師復出于涪州矣今師徒克捷銳氣方
盛陛下喜于一勝必有輕視四夷陵侮敵國之意天
意難測臣實畏之且夫戰勝之後陛下可得而知者
凱旋捷奏拜表稱賀赫然耳目之觀耳至于遠方之
民肝腦屠于白刃筋骨絕于餽餉流離破產鬻賣男
女薰眼折臂自經之狀陛下必不得而見也慈父孝
子孤臣寡婦之哭聲陛下必不得而聞也譬猶屠殺

牛羊割鬻魚鼈以爲膳羞食者甚美死者甚苦使陛下見其號呼于提刃之下宛轉于刀几之間雖八珍之美必將投筯而不忍食而况用人之命以爲耳目之觀乎且使陛下將卒精強府庫充實如秦漢隋唐之君則既勝之後禍亂方興尚不可救而况所任將吏罷軟凡庸較之古人萬萬不逮而數年以來公私窘乏內府累世之積掃地無餘州郡征稅之儲上供殆盡百官廩俸僅而能繼南郊賞給久而未辦以此舉動雖有智者無以善其後矣且飢疫之後所在盜

賊蜂起京東河北。尤不可言。若軍事一興。橫歛隨作。民窮而無告。其勢不爲大盜。無以自全。邊事方深。內患復起。則勝廣之形。將在于此。不聽。元豐四年。夏人幽其主秉常。知慶州俞克知。帝有用兵意。屢請西伐。又有謀報云。夏將李清水。秦人說秉常以河南地來歸。秉常毋梁氏知之。遂誅清。奪秉常政。而幽之。宜興師問罪。此千載一時。帝然之。遂詔熙河經制李憲等大舉征夏。而召鄜延副總管种諤入對。諤至。大言曰。夏國無人。秉常孺子。往持其臂以來耳。帝壯之。乃決。

意西伐方議出師孫固諫曰舉兵易解兵難不可帝曰夏有殽不取則爲遼人所有不可失也固曰必不得已請聲其罪薄伐之分裂其地使其酋長自守帝笑曰此真酈生之說耳時執政有言便當直渡河不可畱行固曰然則孰與陛下任此者帝曰朕已屬李憲出熙河种諤出鄜延高遵裕出環慶劉昌祚出涇原王中正出河東分道並進又詔吐蕃首領董氈集兵會伐九月李憲復蘭州种諤克米脂城冬十月高遵裕復清遠軍十一月劉昌祚率蕃漢兵五萬受邊

唐管制令兩路合軍以進既入境而慶兵不至昌祚
遇衆十萬扼險大破之遂薄靈州城兵幾入門達祿
嫉其功馳使止之昌祚按甲不進達祿至圍城十八
日不能下夏人決黃河七級渠以灌營復鈔絕餉道
士卒凍溺死遂潰而還餘軍纔萬三千夏人蹕之復
敗焉昌祚亦還涇原种諤留千人守米脂而自帥大
衆進攻銀石夏州遂破石堡進至夏州會大校劉歸
仁以衆潰而軍食又乏復值大雪乃引還死者不可
勝計王中正自宥州行至奈王井糧盡士卒死者二

萬人亦引還。初，詔憲師五路兵直趨興靈。憲總師東上營于天都山下，焚夏之南牟內殿并其館庫，遂班師。五路兵皆至靈州，獨憲不至。五年春正月，貶高遵裕等官。以李憲爲涇原經畧安撫，制置使。初夏，人聞朝廷大舉，毋梁氏問策于廷。諸將少者盡請戰。一老將獨曰：「但堅壁清野，縱其深入，聚勁兵于靈夏而遣輕騎抄絕其餉，運不可戰而困也。」梁氏從之。師卒無功而還。帝曰：「朕始以孫固言爲迂，今悔無入矣。」至是，討敗師罪。帝以憲有功，但令誥其增還之跡。憲以

僂僂不接爲辭釋弗誅憲復上再舉之策帝以訪輔
臣王珪對曰向所患者用不足朝廷今捐錢鈔五百
萬緡以供軍食有餘矣王安禮曰鈔不可數必變而
爲錢錢又變爲芻粟今距出征之期纔兩月安能集
事帝曰李憲以爲已有備彼宦者能如是卿等獨無
意乎唐平淮蔡唯裴度謀議與主同今乃不出公卿
而出于闕寺朕甚耻之安禮曰淮西三州耳有裴度
之謀李光顏李愬之將然猶引天下之兵力歷歲而
後定今夏氏之強非淮蔡比憲才非度匹諸將非有

光顏懇章臣懼無以副聖志也已而种諤西討不能
如志知延州沈括欲盡城橫山下瞰平夏使虜不得
絕磧爲寇諤遂上其策于朝且言興功當自銀州始
帝以爲然遣給事中徐禧內侍李舜舉往鄜延議之
舜舉退請執政王珪謂曰朝廷以邊事屬押班及李
昉後無西顧之憂矣舜舉曰相公當國而以邊事屬
二內臣可乎內臣止宜供禁廷灑掃之職耳豈可當
將帥之任耶聞者代珪發懇禧至鄜延上言銀州故
城東南已爲河水所吞其西北又阻天塹不如永樂

之形勢險阨請先城永樂永樂依山無水泉種諤極
言其不可帝從禮議乃詔禧獲諸將往城之而命括
移府並塞總兵爲援陝西轉運判官李穰王觀餽禧
以譟販扈奏晉譟守延州自率諸將往築十四日而
成距故銀州治二十五里賜名銀州若禧等退還米
脂以兵萬人屬曲珍守之禧等旣城去九日夏人以
數千騎來攻曲珍使報禧禧遂與李焯舉李穰往援
之晉沈括守米脂北抵永樂夏人傾國而至進薄城
下珍兵陳于水際將士皆有懼色珍白禧曰今衆心

已搖戰必敗請收入城禧曰君爲大將奈何遇敵先
自退耶乃以七萬人陳于城下夏人縱鐵騎渡河珍
曰此鐵蹄子軍也當其半濟擊之乃可以逞得地則
其鋒不可當也禧不從鐵騎旣濟震盪衝突大衆繼
之珍銳卒敗奔還夏人乘之珍衆大潰珍收餘衆入
城夏人圍之且據其水砦珍士卒晝夜血戰城中乏
水已數日掘井不及泉渴死者十六七括與李憲援
兵及饋餉皆爲夏人所隔不得前裨諤怨禧不遣救
師城中大急會夜半大雨夏人環城悉攻城遂陷廩

屏舉稷永能皆爲亂兵所害惟珍裸跣走免將較死者數百人喪士卒役夫二十餘萬夏人耀兵米脂城下而還自熙寧以來用兵得夏葭蘆吳保義合米脂浮屠塞門六堡而靈州永樂之役官軍熟羗義保死者六十萬人事聞帝痛悼爲之不食贈禧等官而貶括爲均州團練副使隨州安置降珍爲皇城使自靈武之敗天下企望息兵而括譟進攻取之策禧素以邊事自任狂謀輕敵遂致覆敗自是帝始信邊臣不可倚信深自悔然無意于西伐而夏人亦困弊矣初

帝之遺禧也。王安禮諫曰：禧志大才疎，必悞國事。帝不聽。及敗，帝曰：安禮每勸朕勿用兵，少置獄，蓋爲是也。六年春夏，入數十萬圍蘭州。已奪兩關門，鈴轄王文郁夜集死士，縋城擊走之。未幾，夏人復分道入寇，亦多爲諸路所敗。中丞劉摯言：熙河經畧使李憲貪功生事，一出欺罔，避典靈會師之期，頓兵以城蘭州。遺患至今。詔貶憲爲熙河安撫經畧都總管，而夏人亦斃于兵。移書示經原劉昌祚，乞逆好如初。昌祚以聞。帝諭昌祚答之，及人寇屢敗，國用益竭，乃上表帝。

許之復詔陝西河東經畧司其新復城砦徼循毋出
二三里夏之歲賜悉如其舊未幾夏主上書乞還侵
疆帝不許哲宗初卽位秉常遣訛囉聿求蘭州米州
等五砦司馬光言靈夏之役本繇我起今許其內附
若靳而不與彼必以爲恭順無益不若以武功取之
小則上書悻慢大則攻陷新城此時不得已而與之
其爲國家耻無乃甚于今日乎願勿惜此無用之地
使兵連不解文彥博與光合太后將許之光又欲併
棄熙河安燾固爭之邢恕亦言此非細事當訪之邊

人光乃召前通判河州孫路問之路挾輿地圖示光曰自通遠至熙州纔通一徑熙之北已接夏境若捐以與敵一道危矣光乃止會秉常卒遣使來告詔自元豐四年用兵所得城砦待歸我永樂厝執民當書以給還尋遣使封其子乾順爲夏國主夏人自得聞砦連歲以畫界未定侵擾邊境且遣使欲以蘭州一境易塞門二砦朝廷不許四年夏主乾順乃奉其母率衆五十萬入鄜延自長城一日馳至金明列營環城乾順子卬親督桴鼓縱騎四掠邊將悉兵掩擊不

退金明遂陷。初帝聞有夏寇，泰然笑曰：「五十萬衆深入吾境，不過十日，勝不過一二砦，須去已而果破金明，引退知渭州。」章奏以夏人猖獗，上言：「城葫蘆河川據形勝，以偏夏朝廷許之，遂合熙河秦鳳環慶鄜延四路之師，陽繕理他砦數十，所以示怯而陰具板築守戰之備。」出葫蘆河州築二砦于石門峽江口，好水河陰。夏人聞之，帥衆來爭，秦迎擊敗之。城成，賜名曰平夏城。靈平砦章惇因請絕夏人歲賜，而命沿邊諸路相繼築城于要害，以進拓境土。凡五十餘所，惠卿

乞諸路出兵乘便討擊詔河東環慶並聽惠卿期約
惠卿遂遣將官王愍攻破宥州尋又奏築威戎威遠
二城加惠卿銀青光祿大夫時章惇開邊隙故諸興
役進築夏人圍平夏章惇禦之獲其勇將嵬名阿理
斬獲甚衆夏人震駭捷至帝禦紫宸殿受賀時元符
元年也秦在涇原日久嘗言夏嗜利畏威不有懲艾
邊不得安息宜稍取其土疆如古割地之制以固吾
圉然後諸路出兵擇要害不一再舉勢將自蹙矣章
惇與秦同宗言多見采繇是屢敗夏人而諸路多建

城以逼夏人不復振于是求援于遼遼王遣蕭德崇來爲夏人議和詔郭公章待之復書謂若果出至誠悔謝罪當徐度所宜開以自新之路二年置西安州從經畧使章奏請也

初吐蕃阿里骨死子瞻征嗣瞻征性嗜殺部曲睽貳錢羅結奔河州說知州王瞻以取青唐之策瞻言于朝章惇許之至是瞻引兵趨邈川守者以城降瞻晉屯之瞻征自知其下多叛乃脫身自青唐來降于瞻詔胡宗回師熙河以節制之蓋元豐中雖合蘭會與

熙河爲一路而會州實未復至是始城會州以西安
城六砦隸之瞻征旣降于王瞻而瞻總管王愍爭功
交訟于朝于是青唐大酋心牟欽氈立木征之子隴
拔爲主其勢復張瞻征大懼熙河帥胡宗回督瞻進
師急攻隴拔及心牟欽氈等皆立降瞻入據其城詔
以青唐爲鄯州瞻知州事邈川爲湟州王厚知州事
夏人屢敗遣其臣鬼名濟等來謝罪且進誓表詔許
其通好自是西陲民少安

景德初蔡京復開邊還王厚前秩會羌人多羅巴奉

谿賒羅撒謀復國趙懷德畏偏奔河南種落更挾之以令諸部朝廷患衆羗扇結遂命王厚安撫洮西合兵十萬討之京又與童貫善因言貫嘗使陝右審悉五路事宜與諸將之能否請以貫用李憲故事監其軍帝從之右正言任伯雨上疏曰神宗所以能用兵取熙河者不獨英謀睿斷委用得人蓋以承仁宗數十年天下富庶之後紹聖之初所以能五路進築者亦以承元佑十年休息之後今日邊隙視紹聖之初爲益廣財用視紹聖之初爲益乏勁兵健馬視紹聖

之初爲益、甚、謀、臣、將、帥、視、紹、聖、之、初、爲、益、少、加、以、鹽、池、損、壞、歲、失、財、用、三、百、餘、萬、關、中、累、年、荒、旱、物、貴、人、飢、生、齒、流、移、十、減、六、七、今、年、雖、豐、物、價、猶、五、倍、平、日、以、此、觀、之、邊、事、不、可、復、生、亦、明、矣、去、年、邊、臣、邀、功、召、寇、強、欲、兼、并、湟、鄯、二、州、自、去、藩、屏、覆、軍、殺、將、已、失、其、一、今、湟、州、雖、存、勢、又、孤、絕、荒、山、窮、谷、地、不、可、耕、道、路、險、阨、又、難、餽、運、得、之、無、用、徒、耗、中、國、又、湟、鄯、二、州、均、爲、隋、氏、之、地、鄯、大、湟、小、唇、齒、相、依、旣、已、棄、鄯、湟、州、勢、難、獨、守、國、家、守、之、且、有、五、患、朝、廷、前、年、取、天、都、山、置、

西安州取葭蘆寨置晉寧軍無所不可何者此夏賊之地吾讐敵之國取之有名也今湟州乃唃氏之地唃氏世效忠順有功國家真宗仁宗繼嘗封爵乃朝廷與國因與國之亂而食其土地失信背義取之無名絕夷狄向化之意一患也國家征伐夏賊所以無熙河以西之憂者唃氏爲籬落也今旣取湟州則唃氏餘族不爲吾助吾必有西邊費財用師之備三患也國家買馬歲萬二疋而責青唐十居七八今旣爲讐則馬不復至二年一疋不買亦可見矣西北無馬

大失邊備三患也。河南有郎阿章族，河北有瞎養呢族，平日與咱氏同輔國中。今吾旣與咱氏爲讐，則彼畏吾有吞并之心，必與夏賊連結以抗中國，四患也。萬一夏賊因咱氏之困，掩取其地，則勢力益強，永遠爲腹背之害，五患也。不聽賢至，遼州適禁中，火帝下手札驛止，貫毋西兵，貫務視遼納韓，中原問故，貫曰：「上趣功成耳。」遂行多羅，集衆以拒，厚聲言駐兵而陰戒行，羌備益弛，乃與偏將高承年異道而進。多羅三子以數萬人分據險要，厚擊殺其二子，唯少子阿蒙

中流矢去道遇多羅巴與俱遁厚遂拔湟州捷聞進
蔡京官三等蔡卞以下二等降德音于熙河蘭會路
論棄湟州罪三年王厚復鄯廓州五月封蔡京爲嘉
國公以厚爲武勝節度晉後厚將大軍趨廓州老酋
落以衆降遂入廓州詔加京司空封爵而超拜厚武
勝軍節度觀察晉後嗚呼吐番之裔守護西塞爲不
侵不叛之臣固嘗宣力王家奮擊夏虜而王安石主
土部章惇主王瞻蔡京主王厚三用師于其國噶氏
子孫無罪而就覆亡功雖訖成邊患不息及金人得

秦隴乃能求其後而續其血食。孰謂夷無人哉。初蔡京在陶節夫帥鄜延。節夫誕妄。每進築一城寨。卽奏云。此西人要害。必爭之地。未一年遷至樞密直學士。然未嘗遣使一騎一卒出塞。蓋與虜戰則有勝負。獨進築則無虞。又遠靈武數百里之地。虜所不爭。故皆得就功論賞。而京力主之。奏使經制五路時。京使王厚招夏監軍保忠。厚言保忠雖有歸意。而下無附者。章數上京。責厚愈急。厚乃遣弟誚保忠。還爲夏選者所獲。遂迫保忠赴牙帳。厚以保忠縱不爲夏所殺。亦

不能復領軍政、使得之一匹夫耳、何益于事、京怒、必
令招致之、夏乃黜兵延渭慶三路、各數十騎、出沒聲
言、假兵于遼、而朝廷用京計、又命西邊能招致夏人
者、毋問首從、賞同斬級、令陶節夫在延安大加招誘、
夏人遂入鎮、戎畧數萬口、與羌酋谿賒羅撒合兵、逼
宣威城、知鄯州高永年出禦之、爲羌人所執、多羅巴
謂其下曰、此人奪我國、使吾宗族漂落無處、所遂殺
之、已而羌衆復焚大通河橋、以叛新疆、大震事聞、帝
怒、敕御史侯蒙往秦州、逮治蒙至五路、將帥劉仲等

囚服聽命。蒙曰：君輩皆侯伯，無庸辱歛。吏第以實對。獄既具，蒙還奏言。漢武帝殺王恢，不如秦穆公赦孟明子士綏，而晉侯喜孔明亡，而蜀國輕。今羗殺吾一都護，而使十八將繇之以死，是自戕其肢體也。欲身不病，得乎？帝恆釋不治。唯王厚生逗遛，降授郢州防禦使。四年，遼人來聘，遣翰林學士林橈報之。橈之使遼也，蔡京使其激怒以啓蒙。蒙遂恣情不遜，遼人大怒。空客館絕煙火三日，乃遣還歸。而復命議者以爲怒隣生事，猶除禮部尚書。遼人以失禮來言，始出知

潁州五年許夏人平廢銀州爲銀城罷五路經制司徙陶節夫知洪州大觀元年南丹州地與宜州及西南夷接壤世爲莫氏所居自署刺史王祖道欲取之乃誣其酋莫公佞阻文蘭州不令納土發兵討之擒公佞以南丹州爲觀州公佞弟公晟結溪峒報復侵掠城邑殺刺史蔡京匿不以聞特置黔南路京以功加太尉而召祖道爲兵部尚書祖道在桂四年厚以官爵金帛挑諸夷建城邑調兵鎮戍輦輸內地錢布鹽粟無限時廣南西路轉運副使張莊與祖道表裏

遂以代其任祖道莊旣鑒空超取顯美跡是麗恭孫
趙適程邈相與效之邊壤益多故矣久之麗恭誘涪
州夷內附以其地爲珍承州夏五月童貫復洮州詔
加貫簡司空而知桂州張莊奏安化上三州一鎮諸
蠻納土幅員九千餘里又奏寬樂州安沙州諸州四
州七原等州納土計五十餘州幅員萬里蔡京帥百
官表賀詔莊兼黔南經畧安撫使于是渝州蠻內附
以其地爲秦州南平夷內附以其地爲遵義軍及播
州二年林藪有罪免久之自楊州徙大名道過闕下

爲帝言頃使遼見其國中勢賦若兼而有之勢無不
可蓋欲報其辱也帝繇是始有北伐之意政和元年
童貫旣得志于西羌遂謂遼亦可圖因請使遼以覘
之乃以鄭克中充賀遼王生辰使而以貫副之或言
以宦官爲上介國無人乎帝曰契丹聞貫破羌故欲
見之因使觀其國策之善者也遂行當是時女直已
蹙遼僭號稱大金矣

女真者渤海國黑水部也古肅慎之地元魏時有五
部唐初二部而其在南役屬契丹者號熟女真在北

不屬契丹者號生女真其地跨混同江長白山而居
混同江亦曰黑龍江所謂白山黑水者也已避遼興
宗諱改號女直至烏古乃而慧黠多智能遼聶部反
將討之烏古乃恐遼兵深入具得其山川險易爲後
患也乃遣使告曰聶部多山阻險卽用兵非歲月可
破獨可以計擒請寬之得命以獻毋需軍遼主喜從
之已果會而獻遼燕賜有加禮授生女真節度使蓋
始有官屬遼天祚好畋獵嬖女嗜酒歲遣使市名鷹
于青海上道出生女真使者貪縱多徵索女真厭苦

之始叛遼至是阿骨打屢勝遼稱帝而遼亦內亂宗
真第四子耶律淳自立有上京中京遼西六路而國
分矣時燕人馬植故仕遼爲光祿卿行污不齒聞貫
以大闢使至盧溝則見夜其待史自言有滅燕之策
貫與語大奇之與俱歸易姓名曰李良嗣薦諸朝良
嗣獻策言女直恨遼人刺骨而天祚失道國必亡本
朝若自登萊浮海詣女真與結約夾攻遼遼可圖也
帝悅之蔡京故治王安石言中國失燕雲爲大辱與
王黼力主其事于是遣武義大夫馬政使女真結好

金報聘賜良嗣國姓以右文殿修撰名市馬實約夾
攻遼請石晉故所棄地以爲分朝散郎朱昭上書言
遼不可攻金不可倖倖之必爲中國患兩國之誓曰
敗盟者禍及九族九廟祖宗之靈實臨之陛下以孝
理天下其忍忘列聖之靈乎今承平日久民不識兵
而兵端自我始陛下以仁覆天下其忍置河北之民
于塗炭之中使川關塗地乎乞斬黼黻良嗣以已難
京怒編管海外金報命如約熙河將趙隆有武力貫
欲籍以圖功撫其背謂之曰若與我共此封拜可得

也○隆○日○隆○武○夫○豈○敢○干○一○時○功○賞○敗○祖○宗○二○百○年○勝○
好○乎○今○啓○釁○恐○異○時○萬○死○莫○贖○也○貫○默○然○樞○密○鄭○居○
中○于○政○府○而○質○京○日○公○不○爲○國○守○盟○約○而○輕○造○此○端○
何○也○京○日○上○厯○歲○幣○五○十○萬○故○耳○居○中○日○公○壹○不○問○
漢○世○和○戎○用○兵○之○費○乎○今○啓○釁○卽○異○時○百○萬○生○靈○肝○
腦○塗○地○將○何○以○居○之○京○亦○默○然○惟○帝○亦○以○爲○睦○寇○初○
平○憚○用○兵○悔○之○也○獨○王○黼○欲○攘○以○爲○功○爲○帝○言○中○國○
與○遼○盟○雖○久○實○敵○國○也○何○損○于○信○今○不○取○則○燕○雲○故○
地○爲○金○有○後○于○何○復○之○于○是○詔○童○貫○爲○河○東○北○宣○撫○

使蔡攸爲副使勦兵十五萬以應金都統制种師道
曰師直爲壯曲爲老今日之舉如盜入鄰家不能救
又乘之分其室也曲甚矣蓋已諸賢不聽遼使來言
曰女真之叛本朝亦南朝之所惡也今射一時之利
棄百年之好結豺狼之鄰基他日之禍竊爲大國不
取也救災卹鄰古今通義惟大國圖之賢不能對會
遼將郭藥師率所部以涿易二州來降詔授恩州觀
察使導攻燕而貫遣劉延慶將兵十萬出雄州渡白
溝師亂次濟藥師曰今大軍跋隊行而不設備有如

敵設伏掩擊，殆必危者也。不聽。至良鄉而敗。延慶遂
壁，不敢前。藥師曰：「燕晉守兵度不滿萬人，今悉師來
矣。燕內虛，願得奇兵五千人從間道襲之，誠可得也。」
延慶曰：「善。」藥師因請延慶子光世簡師爲後繼，許之。
于是藥師帥所部夜半發盧溝，倍道進，質明先登奪
迎春門入。而光世淪約，不敢前。藥師勢孤，縋城下走。
而免。于是遼將分兵斷懷道，得漢卒二人，繫帳中，傳
令曰：「吾師三倍漢軍，可克也。」明舉火，則分左右翼而
精兵衝其中，必殲之。乃逸其一人，還言之。延慶以爲

信卽自燒營遁。士卒相蹂踐者百餘里。自熙豐所造新樣弓刀械器幾盡。當是時中國承平久。天下耗弊業枵然。有外強中乾狀。而將怯士頓。帥伐遼輒舛。藥師還進安義軍承宣使。然亦知中國不足恃。中懷悔懼降矣。雖京亦私內憂之。童貫以伐燕再不勝而懼。則密遣使如金。求如約夾攻燕。金許之。分道疾進攻。居庸關闕墮。遂克燕。而中國師失期不出。于是燕五京悉爲金有。而中國一戰未嘗勝。尺土未有得也。金乃遣騎送趙良嗣還自燕。且獻俘。先是約克燕日。割

石晉故所賂契丹地爲分而平營灤三州非晉賂及
劉仁恭獻後唐求援者也至是朝議欲得之遣良嗣
往請而金人見中國數敗舛輕之又以燕本以攻取
得宋失期爲負欲背約謂良嗣曰營平灤吾要害地
吾欲作邊鎮何可得也今獨與若燕薊景檀涿易凡
六州燕京亦本朝兵力攻得之其租稅當輸之本朝
宋必欲營平灤卽燕薊不與矣良嗣曰往所約者山
前後十七州今云然如信義何且租稅地產當隨地
豈有與其地不與其租稅者粘沒喝曰燕自我得之

當歸我今以與若國所謂取諸懷而與之者也于租
稅何有大國熟計如不許則涿易吾土也請速迫涿
易之師無久留我疆良嗣還報命而中國憚兵一聽
之不復以負約爲責而以銀絹代租徃報命金終顧
吝燕又知中國不足忌而王黼欲其功速成盡許之
要增歲幣則許遼舊歲幣四十萬要增租稅又增燕
京代稅錢百萬要歸叛人則許簿送諸叛人求糧餉
又許二十萬石饋之于是金意滿乃遣使以誓書及
燕六州來歸而天子論復燕前功京黼攸皆進位貫

爵徐豫二國公已援神宗詔復全燕地者昨土錫王
貫進廣陽郡王時燕職官富民金帛子女皆爲金人
所驅掠而北獨空城于是悉河北河東山東之力以
餉軍又徧率天下府州縣各悉科免夫錢以佐之海
內困弊轉運使呂頤浩言今開邊遠雖悉力竭財懼
後終難繼且條燕山河北危急者五事以上帝怒奪
一官初粘沒喝欲渝燕雲之約金主曰海上之盟自
我許之何可忘也我死汝自爲之會金主卒其國所
謂完顏太祖者也弟吳乞買嗣而張數以平州來歸

欲嫁禍王黼復勸帝納之金以納叛人來責函穀首
界之當是時金使數往返中國諸山川道路險易迂
直阨塞及朝廷虛實治亂業盡得其要領粘幹喝與
幹離不者勸金主必南伐毋後時于是粘幹喝帥諸
將自雲中趨太原幹離不捷頗帥諸將自平州入燕
山時童貫爲金人所紿云許割蔚應飛狐靈丘徃受
地聞粘沒喝自雲中南下則遣使好逆之使至軍責
庭參畢前議割地事粘沒喝曰爾尚欲此諸要塞膏
美地耶地信美然不可得也今山前山後皆我有未

論策別割數城來贖罪可也使還以告貫謾言曰金
初立國何敢爾未之信勸爲備不應而粘沒喝遣使
持嫚書來責渝盟曰必速割河東河北地以大河爲
界川存宋宗社乃報國也貫聞之膽落不知所爲卽
以赴闕稟議爲名欲還汴時貫以郡王太尉兼宣撫
使督師矣太原守張孝純止之曰金渝盟王當會諸
路將士力捍之太原險可守也王去則人心搖是以
河東與金也河東失河北亦未易保願少畱貫絕然
曰貫受命宣撫非守土也必畱貫置帥臣何爲遂宵

遁孝純歎曰平生童大師作許大威塋卒有變乃奉
頭鼠竄何面目復見天子乎先是郭燕師以殺張穀
而懼曰金人欲得穀卽與穀脫令欲燕師燕師能自
保乎于是諸降將士皆解體而燕師專制一路兵朝
論頗疑之以太尉召入朝辭不至帝令童貫行邊陰
察其去就燕師迎拜帳下父事之貫大喜歸爲帝言
燕師必可倚蔡攸亦從中力主之至是遂以燕版降
金燕州縣盡陷金旣得燕師益益宋虛實因以爲鄉
導懸軍深入矣乃大恐始下詔罪已求直言太學生

陳東上書曰今日之事蔡京壞亂于前蔡師成陰賊
于內李彥結仇于西北朱勔聚怨于東南王黼童貫
又從而開隙于燕此六賊者也異名而同罪惟肆諸
市朝謝天下邇英殿說書楊時言今事勢如積薪已
然當自奮勵以作遠近之氣若示以怯懦不振之形
則大事去矣諸要害地當嚴爲守備近邊州軍宜堅
壁清野勿戰使自困而擊之敵攻城邑遣援兵外襲
令腹背受敵使無適都鄙若因仍不圖敵深入內薄
都城殆而已矣且言今日事以收人心爲先人心不

附○雖○高○城○深○池○堅○甲○利○兵○不○足○守○也○免○夫○之○役○毒○被○
海○內○京○城○工○作○東○南○花○石○其○害○尤○甚○欲○致○人○和○必○先○
去○此○三○者○于○是○罷○花○石○綱○及○內○外○製○造○局○罷○道○宮○及○
行○幸○諸○局○而○金○師○深○入○避○狄○東○南○之○議○起○矣○時○天○子○
溺○宴○安○之○日○久○忠○賢○入○黨○籍○禁○錮○國○無○君○子○公○卿○皆○
京○黼○所○引○用○並○邪○佞○庸○賈○獨○謾○誕○爲○侈○驕○左○右○贊○太○
聞○師○命○卽○震○懾○奪○氣○欲○南○避○一○籌○未○能○展○于○是○帝○傳○
位○于○太○子○太○子○卽○位○是○爲○欽○宗○上○皇○東○行○幸○亳○以○避○
敵○而○天○子○居○守○金○濟○河○宰○執○請○南○幸○襄○鄧○以○紓○難○兵○

部侍郎李綱以行營參謀官請對曰信如是宗社危矣道君皇帝以宗社委陛下庸得而棄之太宰白時中曰都城單弱如此何可守綱曰盡天下城池深堅寧復有如都者都不可守孰爲可守且宗廟社稷百官萬姓咸在今捨此安歸惟勵將士撫民心與固守待勤王策之上也語未卒內侍巡城還言城樓櫓不具城東壕淺不可守帝顧綱曰卿試往觀朕于此俟卿綱循視訖亟還請曰城堅且高諸樓櫓誠未備然守得其道卽不具無損壕池惟樊家岡而下以禁地

毋開鑿誠淺狹然精兵強弩據之保無虞也帝問誰
可將者綱言朝廷平日以高爵厚祿養大臣者固將
以用之也時中邦彥等雖書生未知兵然籍其位號
撫將士以抗敵其職也時中勃然曰綱自料能將兵
否綱奮曰陛下不以臣庸懦使治兵臣其敢違難乃
以綱爲右丞兼親征行營使已帝入時中邦彥語欲
決幸襄樊而命綱留守綱力陳不可且言唐明皇聞
潼關失守卽幸蜀使宗廟朝廷碎于賊手累年僅乃
復之此殷監也陛下初卽位中外欣載四方勤王兵

不日雲集虜深入可坐得廟勝之策荷六飛朝發京
師夕亂雖臣等百十人畱守何益願爲社稷故自勉
內侍奏中宮已行帝色變降御榻泣曰朕不能畱矣
綱泣拜以使邀之帝意稍定俾中使追中宮還因諭
綱曰朕爲卿畱今治兵禦敵之事一委卿毋踈虞可
也綱皇恐受命是夕綱宿尚書省詰旦朝則道路洶
洶太廟主已出寓太常寺矣至祥曦門禁衛已振甲
乘輿已駕六宮襍被升車矣綱皇遽厲聲謂禁衛士
曰汝等願守宗社乎願從幸乎皆呼曰願死守綱拉

殿帥王從濬入見曰陛下昨許臣畱今戒行何也今
六軍父母妻子皆在城孰肯捨之去者萬一中道散
亡孰與爲衛且虜騎已逼彼知乘輿去未遠以健馬
疾追何以待之帝感悟命輟行宣敕諭六軍六軍皆
拜呼萬歲已綱治守戰之具日集而分遣使督諸道
兵入勤王癸酉幹離不軍抵汴城據牟駝岡李邦彥
力請割地爲和以紓難而金帥亦謬以議和緩四方
勤王弛中國防禦許遣親王宰相詣軍前更誓書結
好和可符也于是邦彥贊和議益力帝求大臣可使

者綱請行帝不許曰卿性剛往且有激不可命左丞
李悅往綱爭之曰虜氣盛吾大兵未集固不可不款
以和然所爲和者得策則全安不然禍愈甚無益也
悅柔懦恐悞國因反覆言祖宗土地尺寸不可妄與
人許金幣過適後且不可繼且北狄婪悅往必張聲
勢厚要求覘中國俯仰如有求輒得彼益肆無憚矣
願陛下熟察而李悅竟遣至金師幹離不者南向坐
悅北面拜膝前行皇怖失所言幹離不謂之曰汝京
城破在頃刻吾所爲歛兵不攻者徒以少帝故歛存

趙氏宗社耳。今議和須犒師金五百萬銀、五千萬兩、牛馬百萬頭、幣百萬匹。尊國主爲伯父、割中山、大原、河間三鎮地以和。遣宰相親王爲質、送大軍渡河。幾可得耳。稅唯唯退。與金使來索賂。邢彥等勸帝悉從之。李綱言：金所需金幣竭天下力且不足。况都城乎？太原、河間、山中號三鎮，實十餘郡。地塘灤險阻皆在。割之何以立國？又保塞軍莫順。僖三祖陵寢在焉。何可棄也？至遣質，卽宰相當往親王不當往。不若遣輅士前與之議，所爲可不可者，遲留數日，大兵雲合戰。

則○尅○卽○不○戰○而○與○盟○亦○且○俾○中○國○而○和○和○可○久○矣○
那○彥○曰○都○城○破○在○旦○夕○何○有○于○三○鎮○况○金○幣○乎○綱○不○
能○奪○固○求○去○帝○慰○諭○之○曰○卿○第○出○治○兵○此○事○當○徐○圖○
之○綱○退○則○誓○書○已○成○稱○伯○姪○及○金○幣○割○地○遣○質○更○盟○
一○依○其○言○以○張○那○昌○爲○計○議○使○奉○康○王○構○往○金○軍○爲○
質○以○求○成○初○那○昌○與○那○彥○等○力○主○和○議○不○意○身○自○爲○
質○及○行○乃○邀○帝○署○御○批○無○變○割○地○議○帝○不○許○賴○四○方○
勤○王○之○師○漸○至○于○是○金○人○始○懼○遊○騎○不○敢○傍○出○而○京○
城○以○南○之○民○稍○安○已○而○靖○難○軍○節○度○使○种○師○道○承○宣○

使姚平仲以涇原秦鳳路兵至師道至洛開幹離不
已屯東城下或止師道言賊勢方銳願且駐杞水以
謀萬全師道曰吾兵少若遲則不進形見情露祇取
辱焉金鼓行而進彼安能測我虛實都人知吾來士
氣自振何憂賊哉揭榜沿道神武保領西兵百萬來
遂抵京西趨汴水南徑通敵營令人懼徙砦稍北歛
游騎但守牢驢關增壘自衛時師道年高天下稱爲
老种帝聞其至甚喜開安二門命李綱迎勞師道入
見帝問曰今日之事卿意若何對曰女直不知兵豈

有○孤○軍○深○入○人○境○而○能○善○其○歸○乎○帝○曰○紫○以○講○好○矣○
對○曰○臣○以○軍○旅○之○事○事○陛○下○餘○非○所○敢○知○也○遂○拜○同○
知○樞○密○院○事○姚○平○仲○爲○都○統○制○師○道○時○被○病○命○毋○拜○
許○肩○輿○入○朝○金○使○王○洎○在○廷○頭○頭○望○見○師○道○拜○跪○稍○
如○禮○帝○顧○笑○曰○彼○爲○卿○故○師○道○請○緩○給○金○幣○于○金○侯○
彼○情○歸○扼○而○殲○諸○河○計○之○上○也○李○邦○彥○不○從○時○朝○廷○
日○輸○金○幣○于○金○而○金○人○需○求○不○已○日○肆○屠○掠○四○方○勤○
王○兵○益○集○李○綱○言○金○人○貪○婪○無○厭○克○恃○日○甚○其○勢○非○
用○師○不○可○且○敵○兵○號○六○萬○而○吾○勤○王○之○師○集○城○下○者○

已二十餘萬。彼以孤軍入重地。猶虎豹自投陷穽中。當以計取之。不必與角。一旦之力。若扼河津。絕餉道。分兵復畿北諸邑。而以重兵臨敵營。堅壁勿與戰。俟其食盡。力疲。然後以一檄取誓書。復三鎮。縱其北歸。半渡而擊之。此必勝之計也。帝深然之。因遣使趣師。道戰會姚平仲。忌功名。獨歸。仲氏乃先期擊之。兵敗亡去。李綱率諸將出救。遂與金人戰于幕天坡。以神臂弓射却之。師道復言。劫寨已誤。然兵亦有出其不意者。今夕再遣兵分道攻之。亦一奇也。如猶不勝。然

後每夕以數千人擾之不十日賊遁矣李邦彥等畏懦皆不果用金幹離不召諸使者詰責用兵違誓之故張邦昌恐懼涕泣康王不爲動金人異之乃遣王訥來致責且請更以他王爲質訥至李邦彥語之曰用兵乃李綱姚平仲且非朝廷意也因罷李綱以謝金人而以蔡懋代廢親征行營司翌日帝令肅王往代質康王張邦昌還尋以太學生疏畱乃復綱右丞充京城四壁防禦使旣而都人又言願見种師道詔趨師道入城彈壓師道乘車而至衆褰簾視之曰果

我公也。相與聲喏而散。方蔡懋代綱時。金人近城。令不得施放。有引砲及床子弩者。皆杖之。將士憤怒。及綱至。施放自便。中賊者。賞城上爭發。霹靂砲擊賊。賊薄城射却之。京師不逞之徒。乘機殺傷內侍。取其金帛。而以所藏器甲弓劍。納官請功。綱命集守禦使司。以次納訖。凡二十餘人。各言名姓。皆斬之。并斬殺傷部隊將者二十餘人。及盜衲襖一領者。強取婦人絹一匹者。妄砍傷平民者。皆卽斬。以徇。故外有強敵。月餘日。而賊中竊盜無有也。然金人自平仲劫寨及封

丘門接戰之後頗有懼意既得三鎮及肅王爲質卽不俟金幣數遣韓光齊來辭退師綱奏上曰澶淵之役雖與盟而退猶遣重兵護送恭恐其無忌肆行擄京故也今宜速遣大兵護之出境京師解嚴師道謀乘其半濟擊之帝不許師道曰異日必爲國患御史中丞呂好問亦進言于帝曰金人得志輕中國秋冬必傾國復來禦敵之備當速講求又不聽俄而姚古种師中及府州師折彥質等各以兵勤王至汴城下而幹離不已退李綱請詔古等追之且戒俟其間

可擊則擊而三省乃令護送出之勿輕動以啓釁時
大臣政令矛盾故迄無成功而師道旣復罷矣中丞
許翰言師道名將沉毅有謀不可使解兵柄帝謂其
老難用翰曰秦始皇老王剪而用李信兵辱于楚漢
宣帝老趙充國而卒能成金城之功自呂望以來以
老將收功者難一二數師道智慮未衰雖老可用也
帝不納翰又言金人此去存亡所繫當令一大創使
失利則中原可保四夷可服不然將來再舉必有不
救之患宜遣師邀擊之帝亦不聽已而粘沒喝攻太

原悉破諸縣。獨城中以張孝純固守不下。乃于城外
矢石不及之地築城防守。使內外不相通。及聞幹離
不議和。亦遣人來求賂。宰臣以勤王兵大集。拘其使
而不與。粘沒喝怒。乃分兵趨汴京。折可求到光世軍
皆爲所敗。平陽叛卒導金兵入南北關。粘沒喝嘆曰
關隘如此。而使我過之。南朝無人矣。旣過之。威勝軍
李植以城降。遂攻下隆德府。知府張確死之。進屯澤
州。澤州奏金粘罕兵已次高平。朝廷震懼。恐其復渡
河而南。宰臣咎綱綱曰。幹離不知師旣退。自當遣兵

護送粘罕雖來聞既和亦當自罷必無復渡河之理
又太行懸車之險已遣統制官郝懷將兵二萬屯河
陽控扼險道矣決無他慮也而宰臣獨密啓上于是
悉追還諸將之兵綱聞之復力爭雖復得旨再進與
金人相及于滹沱河然將士知朝廷議論不一不復
有邀擊之意矣于是金人復旁出抄掠深祁恩冀間
而粘罕之兵果退還雲中畱軍圍大原如綱言乃詔
金人要盟終不可保今粘沒喝深入南陷隆德先敗
元約朕夙夜追咎已黜罷原主和議之臣其太原中

山河間三鎮保塞廢寢所在誓當固守于是復命种
師道爲河北河東宣諭使駐滑州姚古爲河北川置
使种師中副之古總兵援太原師中援中山河間而
師道實無兵自隨乃請各關河卒屯滄衛孟滑脩金
兵再至朝廷以大敵甫退不宜勞師示弱格不用師
中渡河上言粘沒喝至澤州臣欲繇邢相間提出上
黨構其不意當可以逞朝廷疑不用幹離不至中山
河間兩鎮皆固守不下師中因進兵以擊之幹離不
遂出境姚古以兵復隆德威勝扼南北關于是詔綱

迎太上皇于南京既還入見上奏曰金人退師交割
三鎮三鎮官吏軍民不肯陷沒虜廷欲爲朝廷堅守
臣恐秋高馬肥虜必再至以責前約宜及今飭武備
修邊防以待之于是爲上條具八事其一謂唐之藩
鎮所以拱衛京師故雖屢有變故卒賴其力爲今之
計莫若于太原真定中山河間建爲藩鎮擇帥付之
許之世襲以捍金人又滄州與營平相直隔黃河下
流及小海其勢易以侵犯宜分瀆隸德博建橫海軍
一道如諸鎮之制上俾宰臣共議而其間所論異同

綱力爭之不能得。夏五月，太原圍不解。詔种師中、孫
井徑與姚古相犄角。師中進次平定，軍乘勝復壽陽。
榆次等縣留屯，直定時粘沒咄避暑還雲中，留兵分
就畜牧。覘者以爲將遁，告于朝。許翰信之，數遣使趨
師中山，戰責以逗撓。師中曰：「逗撓，兵家大戮也。吾結
髮從軍，今老矣，忍爲此受罪乎？」卽日辦嚴約。姚古及
張顥俱進而輜重犒賞之物皆不以從。行，師中抵壽
陽，爲金將完顏括女所襲，五戰三勝，回趨榆次。至殺
熊嶺，去太原百里。姚古將兵至威勝，統制焦安節妄

傳枯沒喝將至故古與顯皆失期不至師中兵甚饑
敵知之悉衆攻右軍右軍潰而前軍亦奔師中獨以
麾下死戰自卯至巳士卒發神臂弓射退金人而賞
賚不及皆憤怨散去所留僅百人師中身被七創力
疾鬪死師中老成持重爲時名將旣死諸軍無不奪
氣金兵乘勝迎古遇于盤佗古兵潰退保隆德事聞
李綱召安節斬之安置古于廣川而贈師中少師大
抵自賊馬旣退道君還宮之後朝廷恬然遂以爲無
事防邊禦寇之策皆置不問李綱獨以爲憂數上備

邊禦敵之策。不見聽用。每有謀議。復爲耿南仲等所沮。及姚古种師中敗潰。師道以病丐歸。南仲等請棄三鎮。綱言不可。會太原圍急。帝將遣援。南仲因曰。欲援太原。非李綱不可。乃以李綱爲宣撫使。以劉韜副之。以代師道。又以解潜爲制置副使。以代姚古。綱言臣書生。實不知兵。在圍城中。不得已爲陛下料理兵事。今使爲大帥。恐誤國事。拜辭不許。或謂李綱曰。公知所以遠行之意乎。此非爲邊事。欲緣此以去。公則都人無辭耳。許翰復書杜郵二字。以遺綱。綱不得已。

乃受命帝手書裴度傳以賜之綱入對帝曰卽爲朕
巡邊便可還朝綱曰臣之行無復還理臣以愚直不
容于朝旣行之後進而死敵臣之願也萬一朝廷執
議不堅臣當來去陛下宜察臣孤忠以全君臣之義
上爲之感動綱畱河陽十餘日練士卒修整器甲之
屬進次懷州造戰車期兵集大舉而朝廷降詔罷所
起兵綱上疏言秋高馬肥敵必深入宗社安危殆未
可知防秋兵盡集尚恐不足今河北河東日告危急
未有一人一騎以副其求奈何甫集之兵又皆散遣

止以軍法勒諸道起兵而以寸紙罷之臣恐後時有所號召無復應者矣疏上不報趨赴太原綱乃遣解潛屯威勝軍劉韜屯遼州王以寧與折可求張思正等屯汾州范瑗屯南北關皆去太原五驛約三道並進時諸將皆承受御書事皆專達進退自如宣撫司徒有節制之名多不遵命綱常具論之雖降約束而承受專達自若于是劉韜兵先進金人併力禦之韜敗潛與敵遇于關南亦大敗思正等領兵與張灝夜襲金婁室軍于文水小捷明日戰復大敗可求師潰

于子夏山于是威勝軍隆德府汾晉澤絳民皆渡河
南奔州縣皆空綱以張顥等違節制而敗又上疏極
論節制不專之弊且言分路進兵及范世雄以湖南
兵至因爲宜撫判官方欲會合親率擊虜會以議和
止綱進兵綱亦求罷遂代還于是金幹離不粘沒喝
復分道南侵而遣其使王訥等以書來詰責索親王
請軍前陳謝仍要割地且求金帛及加其王徽號時
金人復至大臣不知所出遣使講解金人佯許而攻
畧自如諸軍以和議故皆閉壁不出中丞呂好問請

王集滄滑邢相之戍，遇奔衝，列勤王之師于幾輔，衛京邑，不省金，陷真定，攻中山，而耿南仲、唐恪等獨懼，請割地，好問率臺諫劾之。貶知袁州，詔南仲如幹離不軍，聶昌如粘沒喝軍，且議割地，昌爲絳民所殺。南仲至衛州，怯不前，名謁康王，奔相州。初，南仲爲東宮官十年，謂當得柄用，而吳敏、李綱越次位已上，心不平，故每事異議，力阻戰守，與吳開堅請割地以成和好。故朝廷戰守之備皆罷，而金將幹離不自真定兼行至汴都，屯劉家寺，粘沒喝自河陽至屯青城時。

天下援兵爲唐恪耿南仲罷遣無至者城中唯衛士
及弓箭手七萬人皆募市傭以充乃募死士以蠟書
間行出召兵拜康王構爲天下兵馬大元帥令帥諸
道師入援南仲恪猶以和爲解獨開封尹何鼎稍果
得中無計慮獨引蘇軾議東遷失計勸上爲堅守南
道都總管張叔夜將三萬人冒圍轉戰至帝御南薰
門見之叔夜言唐自天寶後屢失屢復者以天子在
外下號召四方易也虜勅甚願暫請襄陽規幸雍帝
習見泰初以城守獲全又見金人薄城下恐出亡不

默然者久之。詔叔夜將兵入都城。時執政孫傳何
衆信衛士郭京言能施六甲六丁法。可生擒金帥。掃
蕩之法。用七千七百七十七人。無間技擊。能否。但擇
年命合丁甲者。將之。藉丁甲神力。足抗敵。所得皆市
井游惰。旬日而足。朝廷深信。命以官賜金帛。或謂傳
自古未聞以丁甲法成功者。不可聽。卽聽之。姑少付
之。兵俟有功。乃任。今專倚之。懼必爲國家羞。傳惑京
言。以爲自古大將成戰功。未有不繇丁甲法而得者。
獨秘不露耳。汝何知。于是京師妄人募衆稱六丁力。

士稱北斗神兵稱天關大將以應京京懼情得浮與
相。唯。諾。而。宣。言。非。危。急。吾。不。出。大。率。本。世。主。信。道。教。
人。習。倚。鬼。神。爲。姦。欺。而。然。也。會。天。大。風。雨。雪。連。日。夜
不。止。帝。徒。跣。禱。雪。彌。甚。士。不。能。穀。弩。何。果。趨。郭。京。出
師。徒。期。者。再。三。不。得。已。乃。令。守。禦。人。盡。下。云。作。法。忌
竊。視。啓。宣。化。門。以。出。京。與。張。叔。夜。坐。城。樓。上。以。觀。金
分。四。翼。躁。而。前。我。兵。走。京。自。叔。夜。日。非。自。下。作。法。不
可。矣。因。下。城。引。餘。衆。南。遁。走。襄。陽。誅。死。統。制。何。慶。言
陳。克。禮。中。書。舍。人。高。振。力。戰。死。而。城。陷。帝。聞。慟。哭。曰。

不用种師道言。至于此。以前金師退時。師道請邀擊。扼之河爲衆阻。故也。金旣入城。患中國獨恇怯失守。非百戰所克也。懼都下人悉力巷戰。猶宜言許和。邀上皇出郊。帝曰。上皇驚憂成疾。必欲行。朕當親往。遂如青城。勸降表請降。畱二日。金粘沒喝以爲是机。上肉不足慮。不如聽還。括金帛厭乃後執之。帝還宮。士庶及太學士迎掩面哭曰。宰相誤我父子。觀者流涕。金遣使來索金千萬錠。銀二千萬錠。帛三千萬匹。于是大括金銀遺金。以陳過庭折彥質等爲割地使。如

河東金人度金帛盡不可復乃邀帝再至營帝有難
色何桌李若水勸之行宣贊舍人吳華白桌言天文
帝座傾車駕出必墮宗不聽命孫傳輔太子監國而
與桌若水如青城畱不遣桌慙不食死金通帝易服
若水抱持哭不屈死金吳乞買得降表廢帝及大皇
爲庶人于是拈沒喝命翰林學士承旨吳开吏尚書
莫儔人議立異姓而邀上皇如軍衛將范瓊劫上皇
與太后御犢車出宮鄆王楷及諸妃公主駙馬若大
宮有位號者皆從金懼諸王諸宗室有畱者且遣出

督開封尹徐秉哲致之。秉哲令坊巷五家爲保，母藏匿，括三千餘人，綴衣袂，令相聯屬。如金軍孫傳、爾太了不遣，宜贊舍人吳革欲以所募士微服衛太子，潰圍出，傳不可，欲匿之。民間別求狀類太子者，併宦豎數人殺之，給金人謀五日不定。而开儔督脇急，璦劫太子、皇后共車出，如金軍士庶走隨太子。哭太子亦哭，呼百姓救我，哭聲震天。孫傳從死，革遇害已，議立異姓衆相視，莫敢發。相時雍私于开儔，問之二人微言敵意在張邦昌，時雍未信也。適尚書員外郎宋齊

愈自金軍至衆問之齊愈取片紙書張邦昌三字示之時雍乃決以張邦昌入議狀閉百官尚書省環之兵諭之衆唯唯時雍首署狀衆從之獨簽書密院張叔夜不署狀太常寺主簿張浚開封士曹趙鼎司門員外郎胡寅皆逃入太學中不署名而御史馬伸奮與御史吳給中丞秦檜共爲議願復立趙氏後且論邦昌傾危不可立金人怒執叔夜檜北去而以冊寶命邦昌爲帝國號楚邦昌入尚書省北向拜舞受冊寶升文德殿設位御床西受賀閣門傳令勿拜時雍

率百官遽拜。邦昌東面拱立受。是日風霽日無光。百官慘沮。邦昌亦變色。唯時雍、開、傳、瑗等欣然以爲有佐命功。于是幹離不遂。臚上皇太后與親王、皇孫、駙馬、公主、妃嬪及康王母韋賢妃、王夫人、邢氏、孫、潯州去粘沒喝以帝后太子妃嬪宗室及張叔夜、陳遵庭、司馬禮、秦檜等。繇鄭州去。叔夜扼吭死。邦昌率百官還辭二帝于南薰門。有勸哭仆絕者。凡法駕、鹵簿、皇后以下車輅、鹵簿、冠服、禮器、法物、大樂坊、樂器、祭器、八寶、九鼎、圭、璧、渾天儀、銅人、刻漏、古器、景靈宮供器。

大清樓秘閣三館書天下府州圖及官吏內人內侍
伎藝工匠優倡之屬及府庫蓄積爲之一空嗚呼自
古夷狄爲中國患所以待之者不過三策曰和曰戰
曰守而已長驅深入吾城池堅而人心固則可守陵
犯無已吾士卒勇而形勢利則可戰虜氣旣懾吾辭
理直而威力強則可和故能守而後可戰能戰而後
可和三者雖殊其致一也真廟景德中契丹百萬人
寇廷臣之議有欲幸江南及蜀以避之者賴寇準一
言而決遂幸澶淵渡河而親征旣殺其酋撻撻虜情

震怖遣使請和捐金幣三十萬而約成是景德之集
非獨能守而于戰與和兩得之所以盟好之圖踰百
年而兩國生靈皆賴其利也至靖康初金人稱兵以
犯中原當時亦有爲避狄之計者而後卒堅守虜騎
簞城攻圍連日殺傷甚衆賊氣挫矣而吾之援師日
集和非所難朝廷主謀之臣苟欲脫一時之禍而不
爲長久之計其所邀求一切許之既割三鎮又質親
王又取犒師之物金銀幣帛不可勝計千倍于澶淵
之時而歲賂之數又不與也有以死爭之而弗能得

者追援師之集既衆士氣勇銳可以施周亞夫困七國之策以與之再盟而朝廷懲姚平仲刼寨小衄遂寢用兵之謀及其退也又不復邀擊遂使金人志得氣滿有輕中國之心是靖康之事止于能守而于和與戰兩失之也其後三鎮之兵民爲國堅守朝廷始以保塞陵寢之故遣使計議願以租賦代割地之約金人唯欲造爲釁端以寇邊而許和猶自若也王議者信之以爲其和必成而凡欲治兵設備者皆以爲害于和議而沮罷之虜將渡河猶以爲割河北河東

之地奉之以袞冕輅車尊號而師可解及既登城矣
猶逼朝廷降詔假和議遂定之說以款勤王之師至
盡取都城之子女玉帛然後却質二聖六宮宗室百
官以行然則自今觀之所謂和議者果何如也夫金
人自用兵以來專以和議疑敵人以取勝其與契丹
二十餘戰每戰得地輒和既和復求弊端以戰而卒
滅之今于中國復用此策中國信之而不悟至于禍
敗如此豈不大可痛哉或謂宋之兵力不追金人遠
甚靖康之初雖欲坐困邀擊必無成功徒結深怨故

不得已而信其和。此殆不然。夫論兵當論其機會。一失機會弗可爲也。靖康之初。金人初無犯關之意。兵不過六萬。大半雜種。而北河邊郡。帥府既不設。舊沿河又無控扼之兵。是以乘勢直擣都畿。而吾之守禦。既嚴。援帥既集。進不能攻。退不能卻。以重兵臨之。而以餘軍待其抄撈。卽行掩擊。則糧餉絕而虜可圖矣。既歸渡河。驅掠婦女。輜重徧野。半濟擊之。其法必勝。而朝廷皆不以爲然。且上下遽爾相慶。以爲無復可虞。于是迎上皇于東南。散西兵于關陝。勤王之師。

歸諸道。堅守之詔徧告四方。忽李綱種師道之言。曾不數月。再致金師太原真定咽喉已塞。而猶議三鎮棄守之利害。豈非一失機會。不復可返也哉。夫夷狄者。小人之類。猶之盜賊也。小人無以制御之。而欲乞憐以望其側隱之心。不可得已。盜賊白晝入主人之室。探匱發篋。得其所欲。曾不爲之捍敵。則何憚不再來。何爲不盡取哉。若夫將士習于軍政。久廢之後。固難得人。然以忠義激其心。以賞罰作其氣。豈無可用者。將士猶手足也。朝廷猶心腹也。今與人鬪。腹心怯。

而○望○手○足○之○强○必○無○此○理○朝○廷○議○論○二○三○而○望○將○士○
之○用○命○蓋○亦○難○矣○故○金○人○常○語○宋○使○曰○待○汝○家○議○論○
定○時○我○已○渡○河○蓋○當○是○時○廟○堂○之○相○方○鎮○之○將○皆○出○
于○童○蔡○王○梁○之○門○無○可○以○係○天○下○之○望○者○如○李○邦○彥○
張○邦○昌○吳○敏○唐○恪○耿○南○仲○惟○以○割○地○請○和○爲○言○未○聞○
有○出○一○計○與○之○抗○者○是○以○金○人○之○來○如○破○竹○然○及○圍○
城○逾○月○外○援○不○至○竟○以○妖○術○取○敗○吁○可○恠○哉○

南宋馭夷

建炎六年高宗卽位于南京、宋
間親見耿南仲、唐恪等庸懦悞
勇聞天下、于是竄南仲等、主和悞國罪、而召相綱、綱
人見涕泗交橫、下言曰、今日待夷狄之策、所謂和戰
守者、當何所從而可也、欲和平、則前日之和、其效如
此、而金北歸、雖宗室亦盡徙、以行其意、爲如何、而二
聖之辱、實不共戴天之讐、和豈可復信、欲守乎、則朝
廷已失河北河東兩路、士民之心、或爲金人之所得、

或爲豪傑之所據密邇畿甸易爲侵陵守豈復易圖
欲戰乎則去冬將佐卒伍乏人撫御皆散而爲盜賊
兵力益弱經此禍亂士氣益衰所謂勤王之師多募
之于田畝之間不習兵革戰豈可必勝三者今日國
論以何爲宗願臣日夜思之以今日之國勢而望靖
康之初其不相侔豈止相什伯哉然而猶有可爲者
祖宗德澤在人者深陛下英明天下仰望以謂必能
濟大業轉危而爲安也且嘗舊之臻國家代有或多
難以興或將墜復續况陛下之明而臨御九有之師

哉○夫○人○君○大○正○始○故○于○卽○位○之○初○立○政○用○人○必○有○以○
大○慰○天○下○之○望○者○况○于○國○勢○削○弱○天○步○艱○難○其○刻○忽○
哉○恭○儉○者○人○主○之○常○德○也○英○哲○者○人○主○之○雄○材○也○繼○
體○守○文○之○君○則○恭○儉○足○以○優○于○天○下○至○于○興○衰○撥○亂○
之○主○則○非○英○哲○不○足○以○當○之○惟○其○哲○故○見○善○明○足○以○
任○君○子○而○不○爲○小○人○之○所○間○惟○其○英○故○用○心○剛○足○以○
斷○大○事○而○不○爲○小○故○之○所○搖○在○昔○人○君○體○此○道○者○惟○
漢○之○高○祖○光○武○唐○之○太○宗○本○朝○之○藝○祖○太○宗○爲○然○臣○
願○陛○下○深○考○漢○書○二○帝○與○藝○祖○太○宗○之○所○以○創○業○中○

與大過人者了然于胸次物至而應之則天下之事雖未底績固已定于心術之中矣尋以綱兼御管使人對言國勢不逮靖康間遠甚然猶有可爲者曰陛下英斷于上群臣輯和于下庶幾靖康之弊可革而與可圖然非規模先定而真知先後緩急之序則不能以有成也夫修軍政變士風寬民力省冗官而擇帥臣以任方面選監司郡守以行新政俟吾之內治已修然後可問罪金人迎還二帝此規模也至所當急而先者則在于料理河北河東蓋河北河東者

國之屏蔽也。二方完而後中原可保。中原保而後東南可安。今兩路士民皆效死爲朝廷守。而朝廷不以時置司遣使以援其危急。臣恐糧盡力疲。使忠義之民肝腦塗地。而遺民憤怨懷恨。捐之心。敵得撫而用之。皆精兵矣。今宜于河北置招撫司。河東置經制司。擇人以爲帥。諭宣天子不忍棄兩河于敵之意。有能復州若郡者。卽以爲節度防禦團練使。自爲守。非惟絕其從敵之心。抑可資其捍禦之力。最今日先務也。帝善其言。問誰可使者。綱念方棄三鎮時。御史張所

以蠟書募兵河北河北爲響應卽欲遣招撫計非所
不可而所以論黃潛善謫鳳州難之又他無可使者
乃過潛善私諭意令掩瑕推用潛善陽許諾明日乃
以所及傳亮對詔所以直龍圖閣撫河北而亮經制
河東會開封尹缺綱言安定舊都非宗澤不可以爲
東京留守于是澤以恩厚拊循軍民以忠義激勸群
盜按舊都形勢依阻險固各列砦駐軍往來較試之
于是京輔間聲靈羅絡河東北山砦民兵各團結聽
節制金來犯輒歸而故都可守振振乎有興復勢矣

綱又言祖宗懲唐方鎮之失創弱州郡奪其權治息
諸路外雖名藩大府無慮皆撤防去兵處無事可也
一旦有夷狄盜賊之警遂弛而無支是唐方鎮之弊
固尾大不掉而今日之弊乃至爲手足者不足捍頭
目也今莫若于沿河沿海沿江諸路各置帥其諸要
郡置總管鈐轄都監許辟寮佐以便宜治兵如馬燧
之鎮太原李抱真之鎮澤潞庶有振也于是諸路置
賞功司明旌賞制戰車防虜奔衝置戰艦江淮河習
水關而軍政緒修時朝議復遣使如金綱曰陛下以

二聖遠狩食不甘寢不安思迎致以就天下養此堯舜之心也。然今日之事惟當枕戈嘗膽修安攘之策。則二聖不迎請而自復。不然雖冠蓋相望朝暮迎請無益也。今遣使但當奉表通問兩宮致思慕之意。每爲議和于是進左僕射而黃潛善亦並用。顧主和日夜爲上言。熙陵九葉上皇子三十二人。僅陛下。一身又未有儲嗣。奈何輕試一擲。猶蹉跌當如宗廟何。此謀國者之慮淺不忠也。萬一虜爲不道將二帝母后甘心于邊境。又何以待之。帝深入其言。遂有感志。會

譚有虞警潛善伯彥交臂帝幸東南綱以爲此廢興
所係入見言自古中興之主起西北則足以據中土
而有東南漢光武唐肅宗是也起東南則不足以復
中原而有西北晉元帝是也今上策必起幸關中爲
首矣縱曰未能猶當駐蹕襄鄧選將列屯係天下之
心如順流東南則中原日遠勢難復還積久成衰形
削勢弱雖保一隅未易也而帝幸東南之意已決不
可復強綱尋去國而招撫制置二司皆罷諸規畫咸
廢東京留守澤憤恹卒命杜充代盡反其所爲于是

群盜充斥金復入駕東幸而兩河郡縣相繼淪陷不復矣當是時潛善伯彥並爲左右相日嬖阿爲蒙蔽而潛善妒媚甚諸言事者擯不用請兵者匿不聞壺專于議和遺粘沒喝書願去尊號奉正朔錄用張邦昌親屬還受僞命被竄斥者惟前相綱不赦而金益驚恚兩河青齊州郡盡陷已遂入淮泗陷天長軍二年春二月天子在揚州聞之大震駭卽被甲乘騎徑往瓜州渡江惟護聖卒王淵張俊數人及內侍康履從暮至鎮江時潛善伯彥方率同列聽浮屠說法

會食堂吏大呼曰虜至駕行矣二人相顧倉皇出及乘馬南走居民爭門出死者枕藉無不憤怨恨二人誤國者司農卿黃錡至江上軍士以爲潛善也罵之曰誤國誤民皆汝之罪錡方辨其是非而首已斷矣時朝廷儀物皆委棄太常少卿季浚奉太廟主以行帝次杭州以臺諫交論乃罷潛善知江寧汪伯彥知洪州已而傳正彥爲逆帝失位僅閱月反正而金分道入日迫命劉寧止充江淮荆湖制置使奉太后如洪州命李邴滕康權知三省樞密院事扈駕指揮楊

惟中將萬人宿衛。召群臣議所向。或請自鄂岳幸長沙。呂頤浩曰。金師來必以陛下所至爲邊面。雖鄂岳幸庸愈乎。今當且戰且避。奉陛下于萬全。臣守死。帝曰。朕左右豈可無相。乃以右僕射杜充兼江淮宣撫使。守建康。韓世忠爲浙西制置使。守鎮江。劉光世爲江東宣撫使。守太平。池州皆受充節度。而天子還臨安。當是時。金自知中國于胡俗異。治以北狄帝中國。恐不安。而二帝及宗室子盡北遷。存者獨帝與隆祐太后。欲覘兩宮所在。以輕兵分道歲深入。必得之而

趙氏可滅因立異姓王爲藩輔遂撫有之也及是聞
知天子在臨安則分兵自滁和入江東規蹙天子知
隆祐太后在洪州則分兵自蘄黃入江西蹙之天子
念太后在洪州詔劉光世移屯江州爲控扼而光世
不設備金師入則亡之南康金入江州繇大冶趨洪
州太后如吉州金陷洪吉袁三州屠洪州太后徑秦
和如虔州以免而兀朮東渡江入建康留守杜充叛
降金帝恐問計相顧浩進曰敵多驕計不能乘舟楫
與我競江浙地熱勢亦難久淹今航海俟其退復反

彼出我入、彼入我出、此上之權也。于是自臨安如越、如明州、金、陷、臨安、帝、航海、金、陷、越、屠、明州、蹙、帝、舟于海、帝復如溫州、移台州。是歲四京盡沒于金、而兩宮幾殆。然是時天下熊羆之士不二心之臣、憤國耻深痛、以武力自奮。又喪亂久、狎于戰、人輕死、敢鬪而中國兵以益精。先是帝在浙東、召韓世忠入扈。世忠以敵不能久、當北歸、請畱江上、得扼其歸。迨兀朮襲帝舟于海、不得屠明州、焚臨安、比屠平江、欲北還。韓世忠已督銳軍屯鎮江、逆之矣。兀朮遣使爲期、日會。

戰世忠報許謂諸將曰江中地勢高可瞰形勝者惟金山敵必登以覘我乃遣蘇德將百人伏龍王廟中百人伏廟下戒之曰聞江中鼓聲則起及敵至果有從四騎趨龍王廟者廟中兵鼓而出伏奮起疾擊獲其兩騎其三騎急策馬而馳中一人紅袍玉帶驚墜馬復跳身上乃得遁詰獲者則兀木也已接戰江中世忠妻梁氏親執桴鼓鼓士士殊死戰所俘斬甚衆敵終不得渡于是兀木請盡歸所掠以假道不許請益以名馬又不許遂自鎮江沂流西上世忠軍連艦

出金師前後者數里、擊柝之聲達旦、兀木大患之、或謂之曰、老鶴河故道雖涸、塞若鑿之、秦淮可通也、通秦淮可絕江而北矣、兀木從之一夕而渠成、先是兀木自建康趨廣德、江淮統制岳飛率所部自建康憚之于廣德、六戰皆捷、擒將俘所簽中土軍首領四十餘、釋不殺、飲食之、語之曰、若吾人也、恐爲敵用乎、與結約遣還、令夜斫營、縱火因縱擊、大破之、駐馬鍾村、金所籍中原兵呼岳爺、爺爭降附、及是兀木趨建康、飛設伏牛頭山、夜遣百人衣黑衣、砍營、金軍驚自相

擊至旦次龍灣邀擊于新城又大敗之兀木乃復自
龍灣出江中會撻懶自瀾州遣孛董太一引兵來濟
師于是二酋軍江北兀木軍江南而世忠以海艦泊
金山下控其中豫以鐵纜貫大鈎授撻懶者以待敵明
旦敵舟謀而前世忠分海舟爲兩道出其背每纜一
纜則沒者鈎一舟曳沒之兀木窘甚求會語祈請甚
哀世忠曰還我兩宮復我疆土者聽矣兀木語塞又
數日再會言不遜世忠引弓欲射之亟馳去謂其下
曰南軍使船如使馬奈何于是有閩人教之曰南船

重不得風不行火攻之可破也今第于小舟中實土
縮平板鋪之穴船板以擢漿俟風息則出而以火箭
射其箬蓬卽不攻自破矣兀木然之刑白馬祭天是
日風止兀木以小舟出江世忠絕流擊之海舟無風
不能動而舟上皆有五繒兀木令善射者乘輕舟以
火箭射之五繒皆自焚烟焰蔽天師遂潰士焚溺自
救敵得絕江去而世忠收餘卒還鎮江是役也世忠
僅以八千人拒兀木十萬衆凡四十八日乃敗兀木
既濟江而北別將在建康者縱焚掠渡宣化而去統

制岳飛邀擊于靜安鎮大敗之金人自是亦聞聽易
慮不復敢輕渡江矣是歲金徙二帝于五國城立叛
人劉豫爲齊帝明年兀朮遂自六合引兵西赴陝張
浚聞兀朮至召熙河劉錫秦鳳孫傑涇原劉錡環慶
趙哲四經畧使及吳玠之兵四十萬迎擊之王彥諫
曰今陝西兵將情未之通也一不利卽五路俱失不
若屯利閬興洋固根本敵入境則檄五路兵共擊之
捷卽蜀完卽不捷未大失也子羽玠亦力言其未可
不聽進次富平而婁室兵驟至吳玠欲據高阜以待

敵諸將曰我衆彼寡又前阻葦澤虜有騎不得施何
以徙爲而虜輿柴囊土平行進薄諸營劉錫力戰劉
錡率將士薄敵陳殺獲頗衆趙哲軍先奔衆遂潰浚
退保興元已奔閬輜重焚棄殆盡關隴六路盡陷惟
階成岷鳳洮五州及鳳翔之和尚原隴州之方山原
存川蜀大震浚召趙哲斬之竄劉錫合州上書待罪
帝手詔慰勉金乘勝規蜀有建策徙治夔州者子羽
叱之曰孺子可斬也四川全盛虜欲寇之日久矣
以川口有鐵山棧道之險故未敢遽窺今不堅守險

縱使深入而吾乃僻處夔峽與關中聲勢斷絕不復
相聞後豈可悔哉惟當畱興州招集散亡召諸將守
阨塞繫關中之望而內安全蜀心浚曰善子羽卽請
以單騎前至秦召諸亡將諸亡將皆來會得軍十餘
萬人稍復振命吳玠爲陝西諸路都統制收散卒扼
和尚原聚涇原鳳翔兵于階成鳳三州固蜀口玠命
弟璘別屯原上爲犄角或謂玠宜退屯漢中保全蜀
玠曰我保此敵不敢越我而西是所以保蜀也初玠
軍鳳翔有恩至是鳳翔陷民感其遺惠夜相與輪芻

粟助軍珍償以金帛民愈益喜來輸者日益衆金穀
之令保伍相連坐不能禁也乃引去明年金將沒立
自鳳翔別將烏魯折合自階成出散關約日會和尚
原折合軍先至陣北山索戰玠命諸將堅陣以待更
戰迭休金敗去沒立方攻箭箬關玠復遣將擊破之
兩軍終不得合金自起海上征常勝無北及與玠戰
屢敗憤甚于是兀木會諸酋兵十萬期必取之造浮
梁跨渭自寶鷄結連珠若夾澗前進薄和尚原玠與
諸將選勁弩分番射敵不得間玠度其道遠餽餉難

繼則以奇兵抄絕之。虜果困欲走。乃設伏于神全面。
待虜退伏發軍大亂。縱擊大破之。兀木中流矢亟刺。
其鬚髯而遁。是役也。玠與璘以敗卒數千駐原上。朝。
問隔絕人無固志。玠召諸將歃血矢盟。勉以忠義。皆。
感泣願盡死。故能有成功。又明年金欲出奇爲功用。
叛將駐秦州。睨仙人關。以綴玠。令游騎出熙河。綴別。
將關師古而撒離喝。自商于取道上津。攻金州。趨梁。
洋。時劉子羽守興元。命田晟守饒風關。以驛書招玠。
赴難。玠自河池一日夜馳三百里疾驅至。以黃柑遺。

敵曰大軍遠來其無乃渴乏用止渴撒離喝大驚以杖擊地曰爾來何神也已大戰金人披重鎧仰關攻一人先則二人擁其後先者死後者繼凡六晝夜不得間玠軍弓弩壘石伺間發金死者山積已乃覘得祖溪間道繞出繞風關後下關軍遂潰敵入洋州玠邀子羽去子羽不可留玠同守定軍山玠難之退保興元之西縣子羽亦焚興元保大安之三泉而撒離喝入興元子羽從兵不滿三百與士卒取草芽木甲而食之遺玠書與訣玠時以仙人關亦忌欲毋行其

愛將楊政立軍門大呼曰節使不可負劉待制節使
負劉待制政等亦舍節使去矣玠謝不敢乃聞道會
子羽子羽留其守三泉玠曰關外蜀門戶不可棄也
復往守仙人關子羽以潭毒山形斗拔上寬平有水
築壁壘移軍未成而金師至子羽據胡床坐壘口諸
將泣告曰此非待制坐處也子羽曰吾今日必死此
于是諸將與共守虜不能奪而去時張浚欲退保潼
川子羽亟書止之日子羽在必不使金人得南浚乃
止初子羽聞有金兵豫徙梁洋之積金深入餉不繼

殺馬及兩河所食軍以食而子羽玠腹背邀擊之金
卒死傷者十五六又疫癘作乃退玠躡擊大破之金
墮崖澗死者甚衆子羽謀邀之武休不及餘不能自
拔者悉降是役也敵雖入三郡而得不償失于是金
知蜀不可猝得據鳳翔營田爲持久計不復謀入蜀
本蜀所以全者玠子羽二人力也當是時相顧浩以
顯忒罷已復召與秦檜並相而檜欲傾顧浩專政會
顧浩信秦仲言屢請身督軍北伐規恢復檜乃風臺
臣言周宣王以內修外攘成中興起王勾踐以蠶種

公職成霸則委任專而責之成也。今二相宜分職任
內外用成恢復功。于是願浩出開府鎮江。辟文武吏
士七十餘人以從。而檜獨居中用事。多引用天下名
賢。列清要以爲名。已。願浩知爲檜所賣。大憾欲去之。
坐檜以植黨專權。罷臺諫二十餘人。坐檜安國黨。皆
罷。榜檜罪朝堂云。不復用。而願浩薦朱勝非復相。蓋
願浩主恢復而疎檜主和。而險檜罪狀未暴著。海內
名賢士又舉以爲檜黨。糾之。檜愈藉資。得自附于仁
賢。中外莫能明也。樞使浚在川陝。用賢簡將以新集

兵抗虜雖時挫衄而蜀完安亦其功朝議浚殺趙沔
曲端爲非辜任劉子羽趙開吳玠爲非是召浚還命
王似代鎮浚以金方伺蜀未敢遽離鎮疏似不在而
遷延不行于是中丞辛炳以宿憾率臺臣劾浚喪師
失地跋扈不臣落職奉祠居福州願浩柄國時越法
有縱舍爲臺臣所糾罷奉祠而朱勝非獨相忌參政
趙鼎除知樞密院都督川陝荆襄諸軍事而故輕其
權鼎條便宜復爲所沮會劉豫以金師寇淮南報沓
至舉朝震駭鼎陛辭帝曰卿豈可遠去當遂畱相朕

矣。于是勝非去位而鼎以尚書右僕射平章事兼知樞密院事。群臣勸帝他幸。散百司避敵。鼎爭曰。累年退○屈○敵○氣○已○驕○。今○避○將○安○之○。惟○親○帥○六○師○。趨○常○潤○。督○諸○將○乘○未○集○而○擊○之○。勢○或○可○捷○也○。卽○不○捷○。敵○遠○來○。深入○勢○豈○能○久○。陛下○堅○壁○臨○之○。臣○等○督○諸○將○或○扼○其○首○。或○搗○其○要○。或○擊○其○尾○。縱○未○能○盡○殲○。必○不○使○得○自○肆○。如○前○日○也○。參○政○沈○與○求○力○贊○之○。帝○乃○奮○曰○。朕○以○二○聖○之○故○。屈○已○請○和○。而○彼○肆○侵○暴○如○此○。朕○臨○江○矣○。一○不○能○復○隱○忍○也○。以○孟○庾○爲○行○宮○。畱○守○張○俊○爲○浙○西○江○東○宣○撫○。

使王玢爲江西沿江制置使胡松年撫江上劉光世
軍建康其百司非在軍務者各自便避兵遣後宮自
溫州泛海如泉州○請既定鼎賓佐喻樗謂鼎曰度此
舉勝乎鼎曰六師臨江兵氣自倍殆勝也曰萬全乎
鼎曰中國累年退避不振義不可更屈故贊上行若
事之濟否何可豫計唯死生以之耳樗曰然則當思
歸路耳張德遠有重望使宣撫江淮荆浙簡諸道兵
入援則其來路固朝廷歸路也鼎大喜稱善卽入
見白帝以樞密使召浚于福州于是韓世忠勒騎兵

大敗金于大儀。先是帝手詔召世忠守備。旨切甚。世忠感泣曰。主憂如此。臣子何以生爲。使統制解元守承州。亟引兵趨大儀。當之伐木爲柵。自斷其歸路。示士卒必死。會遣魏良臣如金。世忠欲致敵。卽下令撤炊爨。移軍良臣問故。世忠曰。適有詔移屯平江耳。良臣去世。忠度行已出境。卽上馬命軍中日。抵吾鞭所。嚮于是引軍出大儀。勒五陣。伏二十餘所。約開鼓共起。擊良臣至金師。金前軍將聶兒孛堇問南動息。具以所見對。孛堇大喜。卽引兵出江口。距大儀五里而

軍別將擁鐵騎過五陣而東世忠傳小麾鳴鼓伏兵
四起旗色與金人雜金軍駭亂我軍持長斧上搃人
胸下斫馬足敵騎蹈泥淖中師疾前覆之人馬俱斃
擒其酋世忠所遣將董牧亦敗金人于鴟口解元至
承州北遇敵設水軍夾河陳一日十三戰未決世忠
遣將往援又大破之追至淮而還帝聞安至平江
欲渡江決戰相鼎曰不可敵遠來利速戰今兵未集
而遽與爭鋒非策也且逆豫繼然不自來獨遣其子
來寧當煩至尊與角耶帝乃止下詔暴劉豫罪于六

師會張浚以諸道師來會命知樞密院事赴江上視
師師大振時捷頓屯泗州兀朮屯竹塾鎮爲韓世忠
所拒不得進分軍圍廬州守臣仇念嬰城守荆湖制
置使岳飛遣將牛皋擊敗之兀朮憤以書幣約戰世
忠方宴飲命兩伶人以橘茗報許之且言張樞密在
鎮江兀朮曰張樞密貶嶺南何得復在此出浚所下
文書示之兀朮嘗爲世忠浚所挫折僅免者則氣奪
色變會雨雪餉不繼野無所掠遂宵遁世忠追敗之
高坂而豫衆亦遁浚還見鼎執其手曰此行舉措甚

合人心鼎笑日喻子才之功也。時朝議于邊江空闕處增設兵爲後事防。浚曰如此則備多而力分。昔楚漢交兵時漢駢兵散浚間楚不敢越境而西。前大原未陷粘罕兵不敢卽渡河。卽其事也。豈必環數千里之地盡守之以兵而後爲快哉。于是命韓世忠屯楚州。圖淮陽劉光祖屯合肥。招北軍張浚楊沂中練舟。建康規盱眙岳飛屯襄陽。窺中原而浚時四出視師。撫循之。明年浚視師潭州。制置使飛破楊天洞庭湖。湘平。又明年視師鎮江。命帥俊屯盱眙沂中屯泗州。

時浚鼎並相驪然相得也。諸政事先後及人才當用者。條之座右。次第奏行之。列要津任職者。率天下之望。時號爲小元祐。金退時。詔前宰執各議攻戰備禦。措置綏懷之畧。以上前相綱提舉崇福宮。具疏言。臣竊觀六朝之所以能保有東南者。以強兵巨鎮盡在淮甸。荆襄間也。今當于淮甸及荆襄置三大帥。屯重兵以臨之。東路以楊州爲帥府。以江東財用給之。西路以廬州爲帥府。以江西財用給之。荆襄以襄陽爲帥府。以湖北財用給之。開營屯田。假以歲月而攻戰。

之務悉委之。淮東西帥責以收復京東西路。荆襄帥責以收復京南北路。川陝帥責以收復陝西五路。規模先定。軍政既修。合戰守爲一事。則以弱爲強。取威定亂。可坐而致也。夫萬乘所居。必擇形勝。爲駐蹕之所。然後能居中制外。以興起事。功建康。自昔號帝王之宅。江山雄壯。地勢寬博。舉天下形勝。固莫如關中。而舊都未復。駐蹕東南。則必建康矣。願詔守臣治城池。修宮闕。立官府。營壁粗成規模。以待巡幸。蓋有城池而後。人心不恐有官府。而後政事可修。有營壁而

後士卒可用此措置之所當先也西北人民皆陛下
赤子祖宗涵濡休養百數十年其心豈嘗一日忘君
上哉特制于強敵陷于塗炭而不能自歸耳今天威
所臨中原震動當必有襁負而歸願爲內應者惟陛
下給之土田予以爵賞優加撫納使陷溺之民知所
依怙此緩懷之所當先也臣竊觀陛下有聰明睿智
之資有英武敢爲之志然自臨御迄今九年閒暇則
以和議爲得計而以治兵爲失策倉卒則以退避爲
愛君而以進禦爲誤國故國不闢而日蹙事不立而

日壞將驕而難禦卒情而未練國用匱民力困而中
興未效則和議之爲術踈而退避之爲禍烈也幸天
啓宸衷頓悞前失六飛一奮將士霆發北軍數十萬
之衆震壘宵奔而不敢南向則和議之與治兵退避
之與進禦其效槩可觀矣故知退一步則失一步退
一尺則失一尺往自南都退至維揚則河北河東關
陝失矣自維揚退至江浙則京東西失矣敵騎南牧
如復退避不知何所適而可乎航海之策遠冒風濤
憂險萬端此又不可之尤者也古者敵國善隣則有

和親仇讐之邪鮮復遣使金人造譽之深知我必報
此其處心措慮爲何如者卽我卑辭厚幣屈體以求
之其不推誠以見信也決矣器幣禮物所費不貲輶
車往來士氣盡索而虜邀我以必不從之事制我以
必不敢爲之謀是和卒不成而徒爲此擾擾也非直
如此而已于吾自治自疆之計動輒有害願自今以
往勿復遣使惟于國家閒暇之時明政刑治軍旅選
將帥修車馬備器械脩糗糧積金帛敵來則禦俟時
而奮以光復大業此最上策也抑臣聞朝廷根本也

藩方枝葉也。根本固而後枝葉繁。朝廷心腹也將士
爪牙也。腹心壯而後爪牙奮。惟陛下正心以正朝廷。
百官使君子小人各得其所。明是非。公賞罰。爲之本。
帝賜詔褒答而不能用。又明年帝如平江。相浚大集
師討豫。豫告急于金。請濟師。時金主吳乞買卒。國人
立太祖之孫合刺爲帝。易名亶矣。召諸將計之。蒲盧
虎曰。先帝所以立豫者。欲開疆保境。令我得安民息
兵爲屏蔽也。今豫進不能取。退不能守。而兵連禍結。
從其請勝則豫收其利。敗則我受其弊。不可許也。

歲以豫故山師嘗不利于江上矣。金主遂不許豫遣
兀木題兵黎陽。名應豫實觀釁。豫自發兵三十萬遣
子麟孫壽春趣廬州。犯合肥。姪猗取紫荊山出渦口。
犯定遠。孔彥舟趨光州。犯六安。而聲言金助師入寇。
鎮將張俊劉光世憚賊銳。請阻江爲險。朝議命岳飛
撤襄鄂兵東防江。而手札付浚。令俊光世沂中等爲
保江之計。浚上言淮南大江之屏蔽也。俊等戰淮南。
則無爲保江。令渡江則無淮南。長江之險與賊共矣。
且賊得淮南。因糧籍資。江其可保乎。岳飛爲襄陽藩

蔽飛一動襄漢何恃。願聽臣不效治臣罪。勿專制于中。帝手書報許。而光世已得旨舍廬州。趨采石矣。浚令呂祉馳詣軍。令曰。有一人一騎渡江者。斬。光世恐。乃還駐廬州。浚日夜撫激將士。形立勢具。將士競奮。豫諸道軍皆敗走。猊軍至淮東。爲韓世忠所扼。趨定遠。麟從淮西擊三浮橋。渡淮。次濠壽。張浚軍順昌。拒之。猊犯定遠。欲趨宣化。寇建康。沂中使兵二千進擊。敗之。則欲趨合肥。與麟合。至藕塘。沂中使統制吳錫率勁卒前陷陳軍。却縱大軍乘之。而自以精騎衝其

勝大呼曰賊破矣賊方駭視張宗顏忽自泗水來背
擊之賊大崩猊與數騎遁餘衆皆降麟在順昌聞猊
敗亦拔砦去孔彥舟亦解光州圍而去已二相顧以
間而隙鼎去位浚遣判官張宗元監鄂岳軍制置使
飛乞終喪還山浚分淮西爲六軍遣參軍呂祉往節
制而淮副將酈瓊以衆叛降豫于是詔罷都督府浚
安置永州秦檜者姦人也初從游御史酢游酢以爲
荀文若之流靖康中虜陷京師議欲立異姓御史馬
伸請立趙氏後檜爲中丞實首事因被執北去金主

吳乞買悅之以賜其弟撻懶遂爲撻懶使爲參謀爲行軍轉運使建炎中兀朮入寇困江中又困和尚原知中國未易以猝定也念欲和而檜自金來赴漣水軍言殺金監守者航海至朝士藉藉言檜與何鼎孫傳等同執而檜獨還又自燕至楚三千里踰河海乃至安得殺監守獨南又安得盡妻子家屬偕來者頗疑之然空語億逆而宰相范宗尹同知樞密院李綱信其靖康中大節以爲忠力薦之帝召見首奏所草興撻懶求和書以上帝大喜曰檜朴忠過人朕得之

喜而不寐誠喜聞二帝及母后消息又得一佳士也
卽拜禮尚書已遂參大政檜旣用宣言中國人惟當
着衣啗飯圖中興又曰我有二策可聳動天下或問
之檜曰今無相位不可言也語稍稍聞上因得相帝
問檜二策者何檜曰臣以謂上許河北人還金中原
人還劉豫南人還南北人還北和可得也帝時猶未
深中其說曰南人還南北人還北朕當安歸頗不以
爲然自建炎來中國大創屈憚兵數遣使議和然且
守且和亦未嘗遂忘戰而專與金人解仇議和自檜

始金在靖康中既以和誤宋得意去已中國歲使至
輒止之未嘗遣一介報聘及是韓侂冑亦以金使來
請畫江益劉豫而還西北士民之在南者與檜議適
合于是識者始知撻懶實縱檜還使入中國爲內間
主和也會與呂頤浩相傾而絀已帝傷上皇及宣和
皇后春祔高不得歸益深念欲和思檜言稍復其官
而宰臣張浚薦以爲侍讀漸親幸說用而檜日爲上
言今引日不和脫上皇及宣和皇后不能待此終天
恨豈有悔哉帝大感動會何蘄還自金寶始聞上皇

及寧德太后之喪帝號慟不食發喪遥尊宜和皇后
爲皇太后太息曰檜信愛我卽日以檜爲樞密使恩
數隆厚已倚以爲相先是王倫以所請使詣金見止
及是粘沒喝欲因以爲成謂倫曰比上遣國使來意
指多不協侍郎傳語欲議和豈江南情實乎抑侍郎
自爲此言也倫曰使事有指卽不然倫來何爲人定
者勝天天定亦能勝人今中國人心益奮天行且定
願元帥深計之粘沒喝低頭不答者久之已忽至館
中縱倫歸議和倫還爲上言金人情僞甚悉相鼎浚

以爲誕久不遣。至是始詔以爲奉迎梓宮使。復如金。當是時金業以逆豫數敗。無益于抗宋。有損于國。廢之矣。制置使岳飛宣撫韓世忠。並奏乘豫廢。擣不備。長驅取中原。機不可失。皆不報。王倫至會寧。見金主。首謝廢劉豫。次致使指而倫使金。時帝使于撻懶求助。因秦檜申意。冀得和。于是撻懶言于金主。以廢齊舊地盡與宋。且歸太后及梓宮。遣倫及其太原尹烏陵思謀太常卿石慶來報命。演行撻懶送之曰。好報江南劉豫廢。今道路無壅。可和矣。倫歸報。帝聞乃

大喜畱五日復遣謂輔臣曰先帝梓宮有還期雖待以二三年未害也惟是太后春秋高朕旦夕念引日爲歲夫是以不憚屈已冀和議之速成時廷臣有引分羹事曉譬者帝輒蹙曰朕不忍聞也群臣有力爭不當和者帝發怒檜陽曰屈已議和此人主之孝見主上卑屈中懷憤亦人臣之忠庸何傷乃獨畱請對謂上言臣條本不得虜情陽大言持兩端此何足與權大計若陛下決主和乞顓與臣議臣任其必成帝曰朕獨委卿檜曰此大事望陛下熟思又三日檜獨

對請熟思如初如是者三度帝意已確乃上書顯請和于是設疑似以傾鼎罷之然猶以公論爲患勾龍如淵達意言相公爲天下大計主和而橫議大起第擇人爲臺諫盡擊去則合矣檜大喜卽擢如淵爲御史中丞使劾異議者而王倫以金使至以詔諭江南爲名欲帝廷拜受國書下朝議于是從官張燾晏敦復魏玘尹焞梁汝嘉蘇符薛徽言李彌遜御史方廷實館職胡瑄朱松張擴凌景夏常明從官馮時中許忻趙雍等皆以國大體爲辱不可和陛下一屈已則

上下離心國何以自立異時予奪在彼失信在彼
何以自存樞密院編修官胡銓言天下者祖宗之天
下也陛下所居之位祖宗之位也奈何以祖宗之天
下爲犬戎之天下以祖宗之位爲犬戎藩臣之位陛
下一屈膝則祖宗社稷之靈盡汚夷狄祖宗數百年
之赤子盡爲左袵朝廷宰執盡爲倍臣天下士大夫
皆當裂冠毀冕變爲胡服異時豺狼無厭之求安知
不加我以無禮如逆豫旋立旋廢也哉夫三尺童子
至無知也指犬豕而使之拜則怒今醜虜則犬豕也

堂堂大朝乃欲屈萬乘之尊下穹廬之拜將三軍之士不戰而氣已索矣夫魯仲連所以義不帝秦者非惜夫帝秦之虛名惜天下大勢有所不可也顧斬王倫秦檜孫近三人頭竿之藁階然後羈留虜使責以無禮徐興問罪之師則三軍之士不戰而氣自倍不然臣有赴東海而死耳竊能處小朝廷求活耶當是時中外臣謹議甚衆雖帝亦頗慚憤不堪也檜患之用勾龍如淵計遣王倫說金使言天子方諒陰不當出受書檜以攝冢宰請館受書命省吏代百官朝服

導以從遂納書禁中已報命命直學士魯開草國書
檜溫言慰之曰主上虛執政待君矣開曰儒者所爭
在義苟非義高爵厚祿非願也願開所以事敵之禮
檜曰若高麗之于本朝耳開曰主上以中華正統當
天位公爲相當尊主庇民奈何自卑辱至此乎引古
誼折之檜怒曰侍郎知故事我獨不知今聖意已定
適何言公自取大名去如檜但欲委曲濟國事耳
使王庭見檜質責之曰公不思東都抗節存趙時耶
而忍忘此虜也罷知潭州史館修撰趙如圭手書抵

檜責以曲學倍師忘仇辱國且日公不喪心不病狂
奈何爲此必遺笑萬世矣于是爭者並斤外而編修
銓以鼓衆劫持監廣州都鹽倉宜興進士吳師古鏡
銓書于木朝士陳綱中以啓事賀銓師古流袁州剛
中謫安遠丞死焉故相提舉洞霄宮李綱大將韓世
忠皆疏爭世忠言金以劉豫相待義當與決戰兵勢
最重處臣請獨當之皆不省而下詔言金盡割河南
陝西故地歸國又許還梓宮及太后諭中外然其時
爭者亦獨言虜謬爲和以欺我和終不可成梓宮終

不可復、太后終不可得歸、而不知金、憚中國將武臣、力實欲和、而倫實得其要領以來也、始與檜議時、猶欲以中原地與齊、爲北人還北、及豫敗、郈知中國難制、欲盡舉而委之、至是金使歸、見舉朝交爭得所、錢編修銓封事讀之、歎以爲國有人焉、未易輕也、于是和益決、許歸東西南三京、壽春府、亳州、曹州等州、及陝西、京西諸州地、以爲和、九年春、以金和肆、命王倫爲交割地界使、詣金遣周聿宣諭陝西方、廷寶宣諭三京、史館修撰范如圭入對、言兩京版圖既歸矣、

九廟八陵咫尺在望而祠告之使未遣其何以慰神靈萃民志乎帝泣然曰非卿不聞此言卽日遣判宗正事士儼兵侍郎張燾詣河南告祠修葺士儼出蔡穎百姓夾道迎且喜且泣曰不圖今日復爲宋民爭導入栢城時自永昌陵而下皆發掘士儼燾歷榛莽隨宜葺治還帝問諸陵何似燾不對但垂涕言萬世不可忘此讐桎患之出知成都而士儼封延安郡王于是和議大定群臣加爵賞有差明年金撻懶與蒲盧虎謀反皆伏誅于是兀朮以二人者陰與宋結主

割地誤國也排之且欲以伐宋爲已功遂盡皆前議
拘王倫河間倫不屈死而副使還責歲幣責奉正朔
責更誓命而軍分道入寇陷前所歸河陝州郡師驟
發遠近震恐檜以其言不讐乃大懼意帝必且召故
相張浚遣其黨馮楫嘗帝意中檜夙昔言深怒浚
勃然曰寧覆國決不用此人檜乃大喜已又遣其黨
參政王次翁說帝言曩國是無主事小變則更用他
相又變又復更後來者未必賢而排黜異已歷歲月
紛紛不能定願深以爲戒帝深然之于是眷倚檜不

袁檣乃上疏言德無常師王善爲師臣昨見捷懶王
割地講和之議甚堅故贊陛下取河南故疆今兀木
旣戕捷懶事幾已變顧陛下至江上督六師親征時
兀木自黎陽趨河南撒離喝出河中趨陝西分道入
寇東京畱守孟庾南京畱守路允迪以城降權西京
畱守李利用棄城走河南南州縣皆陷撒離喝入同州
趙永興軍遂進據鳳翔四川權宜撫胡世將在河池
倉卒召請諸將議孫渥言河池不可守必退師吳璘
厲聲折之曰渥儒語沮軍可斬也璘請以百口保破

敵世將指所居帳曰吾必死于此遣諸帥據渭南要害金犯石壁砦璘遣姚仲等破走之撒離喝使鶻眼郎君衝璘軍璘使統制李師顏以驍騎擊敗之又進拔虜所築三城獲其戍將撒離喝自以師來戰百通坊又大敗而金困于隴方金歸東京時詔護軍劉錡充東京副留守將所部軍攜孥行自臨安涉江絕淮抵渦口方食忽暴風拔所坐者輶錡曰此賊兆也主暴兵卽下令兼程前已聞金敗盟南下乃舍舟遵陸抵順昌諜者言東京已降金不守矣順昌守陳規入

問計錡曰君城有糧否有之吾與君共守規曰有米數萬斛錡曰可矣乃歛兵入城爲守禦計部將請以步騎遮老稚順流還江南以精銳爲殿宜可達部將許夜叉清者奮呼曰太尉奉命守留京軍士扶老稚而來避南走棄父母妻子則不忍俱行則難達敵驕而從將于何避之不如戰也錡大喜曰信吾本赴官東京陷而吾全軍乃在此則死也今有城可守糧可食奈何去之敢言去者斬乃鑿舟沉之寘家寺中門積薪設守曰脫不利卽燔吾家于是士咸奮爲戰牛

僭婦人礮刀劍爭呼躍願死敵時守佛闕然鎬取車
輪轅埋城上撤民戶扉周蔽之傳城築羊馬垣穴垣
爲門而清野以待敵凡六日粗畢而金游騎已涉潁
抵城下矣擒敵將詰之云韓將軍營沙窩距城三十
里而軍鎬夜遣千餘人擊殺之厥明金烏祿以兵三
萬與僞龍虎大王者合進薄城鎬大開諸門延之虜
疑不敢近許清等蔽垣爲陣金人縱射矢皆自垣端
軼著于城或止中垣上而鎬用破敵弓翼以神臂弩
自城垣門射之射命中敵小却則以步騎蹙諸河破

其鐵騎數千金氣奪乃移砦東林去城二十里銷募壯士五百薄募斫其營金復却復夜募百人往斫之請衛枚銷笑曰無以爲也命折竹爲器如市井兒爲戲者人持一以爲號抵金營是夕天欲雨電光燁燁見辨髮者輒殲之電止則匿不動敵大亂百人者聞吹器聲卽聚金人益不測于是終夜自相擊積屍盈野明日退軍老婆孌于是諸將言今戰屢捷而衆不敵宜乘勢具舟楫南歸無遺大敵禽規口朝廷養兵十五年正爲緩急用况敵氣正挫軍勢稍振何謂

去乎規已分必死軍有進無退也。錡曰府公文人猶
誓以死守况汝曹耶。且敵營近兀木非久必且至。軍
一動卽蹂藉死耳。死不足惜而敵侵軼兩淮震驚宮
闕如誤國事何。吾必死于此。衆乃頓首曰惟太尉命。
時兀木將十萬衆軍東京矣。聞順昌失利大恚卽索
靴上馬麾所部畢從過淮寧救宿。畱治攻具備糧糗。
獲錡所遣者謀問帥何如。人謀如錡。夙戒曰太平邊
帥子耳喜聲伎朝廷以兩國講好因令守東京幾母
生事。兀木喜置驚車砲諸攻具不用而械二人者以

歸人各以文書一卷繫械端錡懼寇軍心立焚之于
是元木不七日至賊下責諸將喪師衆皆曰南朝用
兵非昔比元帥臨城行自見元木不信曰彼邊帥子
喜聲伎何知兵會錡使約戰元木怒曰劉錡何敢與
我戰以吾力視順昌城直用靴尖趯倒耳使者曰太
尉非但請與太子戰且謂太子必不敢濟河願獻浮
橋五所以濟師濟而戰能否可決也元木喜笑曰諾
乃下命明日府治會食遲明錡果爲五浮橋于潁河
上而潛遣人毒潁水上流及草中戒軍士雖渴死毋

河飲飲者斬虜旣陳衆請先擊其韓將軍者軍鋒曰
擊韓雖利然兀木長勝兵力乃全不可當也法當先
擊兀木兀木破韓不戰走矣時天大暑敵遠來不解
甲者七晝夜慙矣鎗軍皆番休更食羊馬垣下坐餽
如平時敵晨氣盛鎗按兵不動比午敵人馬饑渴食
水草輒病益困乏逮未申間忽遣數百人出西門接
戰俄以數千人出南門以銳斧犯之統制趙樽韓直
被數矢血戰戰疾力士殊死鬪敵所爲柈子馬號長
勝軍者專以攻堅戰酣然後用鎗引卒入陷陳縱刀

斧亂斫之敵大敗走委車旗器甲如阜是夕平地水深者丈餘兀木板營遁還汴不敢復窺淮初河北軍有告官軍曰我輩故左獲軍也無鬪志可殺者兩翼楞子馬爾故疾力專擊之而勝捷聞授武泰軍節度使進官撫判官是役也騎兵不盈三萬出戰僅五千人敵十萬衆以敗歸營中終夜有聲城中肅然卽鷄大無聲也又以逸待勞故勝洪皓在燕密奏順昌之捷金人震恐喪魄燕之重寶珍器悉徙而北意捐燕以南棄之而師命不繼可惜也哉先是金歸河南地

時宣撫使飛言今日之事可危而不可安可憂而不可賀可訓兵飾士備不虞而不可論功行賞貽敵人笑帝溫詔慰諭已金敗盟南下攻世毫來告急帝手札趨飛往援日設施之方一以委卿于是飛部分諸將所從入命牛皐孫汝穎李寶自光蔡梁興渡河糾合忠義社規河東又遣兵東援劉錡西援郭浩而自以其軍長驅向中原伐金于是兀朮議以爲諸將獨飛不可當欲糾合精銳誘致飛必殺之于是召所名健聞僞龍虎大王蓋天大王及韓常等兵逼鄆城初

兀木以勁軍被重鎧而爲索貫三人馬爲聯令不得
獨進退而致死號楞子馬所至莫能當至是以萬五
千騎來飛遣子雲領騎兵直貫其陣戒之曰不勝斬
汝矣而令士卒率以麻札刀入陷陣曰勿仰視第斫
其馬足戰旣合卒縱楞子一馬仆二馬擊不能行奮
擊大破之兀木拊膺大慟曰吾自海上起兵定中原
獨以楞子馬決勝今已矣大恚恨復益兵以來部將
王剛以五十騎前覘敵遇之卽前奮斫其將已戰再
捷飛謂雲曰賊屢敗必還攻穎昌汝必速往旣而敵

果至雲以八百騎挺戰又敗之與所集大師鏖戰
疾力大敗之兀木遁還汴飛進抵朱仙鎮距汴京四
十里而軍檄陵臺令瞻掃諸陵葺治之于是山砦諸
豪傑爲朝廷守者皆自拔來歸金人動息山川險要
具得其要害盡磁相澤潞晉絳汾隰之境皆期日與
官軍會所揭旗皆以岳爲號父老百姓爭挽車牽牛
載糗糧以餉軍頂盆焚香候師者載路自燕以南金
號令不行金將烏陵思謀素號勇黠亦不能制其下
第諭之日毋輕動待岳家軍來卽降耳金將來降者

踵至飛大喜謂諸將曰金破必矣當直抵黃龍府與諸君痛飲耳兀木連破郟憚中國甚又悔已爲兵端業欲和以莫將又畱金縱之歸潛以書與檜令王和檜度帝意惟怯顧和遂甘心爲兀木間于是諷臺臣請召諸將班師而令金南侵淮西陷金商以脅和臺臣請召岳飛班師飛奏金人銳氣沮喪棄輜重而北豪傑向風士卒用命時不可再機難輕失幸上裁決檜知飛志銳不可回乃先撤張浚楊沂中等軍而楊言飛孤軍不可畱乞班師至一日遣十二金字牌趣

之還飛憤惋泣下東向再拜曰十年之力廢于一日
乃班師民遮馬慟哭曰我等載香盆運糧迎官軍金
人具知之向公去我輩無噍類矣飛亦泣不自勝取
詔示之曰吾不得擅留也哭聲震野飛留五日待其
徙從而南者如市亟奏以漢上六郡閒田處之飛既
歸所得州縣旋復爲金有乃力請解兵柄不許已自
廬入覲帝問之第拜謝謝無功而已初兀朮爲飛所
困欲簽軍河北以抗飛無一人應者乃慟哭欲棄汴
去有書生叩馬請留者曰太子無走岳少保且退矣

兀朮叱曰去岳少保以五千騎破吾五十萬師汴人
日夜望其來何謂退也生日自古未有權臣在內而
大將能立功名于外者岳少保身且不免何功之有
兀朮悟乃畱不去十一年兀朮將和陷壽春渡淮入
廬州詔諸將往援王德復和州邵隆復商州楊沂中
劉錡復廬州復奉詔班師而廢于是檜陰設間爲帝
言金不足患韓世忠張俊岳飛三大帥皆握重兵分
鎮植根固後且難制此國之大患飛奉詔救淮遷延
不肯行帝至降玉札敦諭乃移軍世忠較有告其陰

乃上書索較必得之此何可使哉帝意疑多忌以爲然乃用其黨王次翁計以諸將連捷召並赴行在論功賞豐宴犒待之世忠俊先至飛後待之者七日至乃除世忠俊樞密使飛副使諸禮恩賜自倍然實奪之權三宣撫司皆罷所部兵悉隸御前營已又加楊沂中開府儀同三司王德清遠軍節度使罷其軍已又罷淮西宣府判官劉錡于是中國之武衛盡撤初飛以恢復爲已任檜遂相鼎飛對客太息讀脩奏憲曰君臣大倫根于天性豈以大臣而忍爲面諛耶

檜聞深銜之而兀木恨飛甚遺檜書曰必殺飛和乃
成檜亦以飛不死終梗和竟甘心飛而和乃堅定
嗚呼國有虎臣敵國之讐而固社稷之衛也有之可
以戰可以守而亦可以和今徵韓岳劉吳卽身航海
祈請求延宗祀豈可得哉乃檜媚嫉以惡之翦國之
衛報敵之讐斷喪其戰守之具以爲和謂檜爲女真
內間也諒矣先是金國書每許歸地而持梓宮太后
事不發啗中國邀之至是乃遣使與魏良臣偕來許
歸梓宮太后獨更前議以淮水爲界求割唐鄧二州

及陝西餘地增歲幣銀絹各二十萬于是帝謂虜使
曰朕有天下而養不及親故屈已請和今信誓獨明
言歸我梓宮太后足矣不然朕不憚用兵命何鑄以
發書樞密院事奉表以稱臣往帝召至內殿諭之朕
北望庭闈無淚可揮卿見金主言慈親在上國一老
人耳在本國則所繫甚重以至誠說之庶彼有感于
是金許歸三梓宮及太后而徽宗皇帝顯肅皇后鄭
氏及懿節皇后邢氏之喪至自金帝易總服奉安龍
德宮已太后至帝迎謁臨平見后相抱持而哭哀動

左右至臨安奉居慈寧宮而淵聖在金帝恐得歸勢
兩大不復有所請奉迎意矣太赦封秦檜太師魏國
公于是檜倚金虜自固權重于天子天子不能制縉
紳荼毒彌慘矣至二十四年檜死而沈該万俟卨湯
思退之輪相繼秉國祖持和議根固波漫當是時金
完顏亮已弑其主亶自帝爲淫虐嗜兵矣東平進士
梁勛言金必叛盟宜爲備帝怒曰講和本朕志自斷
檜獨能贊之成何得以檜亡故橫議耶竄遠州國子
司業黃中使還言金人治汴京臣見其營表宮寢府

寺畢備此必欲徙都徙都汴則壯士健馬不數日及境矣宜早備思退怒謫官禮侍郎孫道夫使還言金詰中國失禮語甚厲計必且稱兵帝始詫曰朝廷待之厚彼何名爲兵端道夫曰彼身弑其君而奪之位欲興兵豈問名哉該思退怒貶綿州前張浚時起判洪州以母喪歸葬念天下事二十年爲秦檜敗壞邊備蕩弛又聞金亮暴恣勢必復用兵自以嘗爲大臣常同國休戚乃䟽言自昔聖賢亦嘗用和爲生利天下之大權矣湯事葛而終以滅葛文王事昆夷而終

制昆夷○彼皆翕之于始○而張之于終○汲汲乎修德紀政○以生利爲心○而未嘗以和爲可恃也○惟石晉不然○桑維翰始終主和○其言未嘗不以養兵息民觀釁而動○爲說然夷考其所爲賞罰無章○設施繆戾○權移于下○政私于上○一時用事之臣○厚賦歛果誅戮播毒于百姓○而契丹凌侮日甚○後嗣不勝其忿起而圖之○數萬之師○無一夫北向○發一矢爲用者○遂以破滅○至于今○爲天下嗤笑○我祖宗時○與虜通和○勢敵力均○而國家取兵于西北○取財于東南○文武之才○兼收並用○于

天下得以持久。然靖康之變。亘古未有。論者猶恨夫
恃和爲安。而不顧其難矣。今天下幾何。譬則中人之
家。盜據其堂室。安居飽食。以伺吾隙。陛下獨以太母
爲重。幸徽宗皇帝梓宮之亟還。而以和爲之權用事
之臣。乃肆意縱欲。剪除忠良。以聽命于虜。而陰畜其
邪心。方國家閒暇之時。怠傲是圖。德政俱廢。而專于
異已之去。分引黨與。布列要地。聚歛珍寶。以厚其私。
室坐失事。幾者二十年。身死之日。天下酌酒相慶。下
至田夫野老。亦莫不舉首加額。以其違天背人不忠。

于君而重惡之也。○今事勢極矣。○後此數年。民力益殫。○財用益乏。○健卒益老。○忠臣烈將。○淪沒益盡。○不知陛下將何以待之。○願鑒石晉之敗。○法商湯周文之德。○而用勾踐臥薪嘗膽之心。○以保國社。○稷幸甚。○該思退。○離大。○怒。○諷臺諫。○論劾復勒還永州。○紹興三十一年。○金王亮。○怒。○宋宗室之在國者。○百三十餘人。○遣使發嫚語爲兵。○端嘗密遣畫工于奉使中。○俾寫臨安湖山宮館爲屏。○而圖已之像于吳山絕頂。○題詩其上。○有立馬吳山第一峰之句。○以示必滅宋之意。○分諸道兵爲三十二軍。

置左右大都督及三道都統制總之命其后徙單氏
及僞太子光英者居守命完顏鄭家將水軍繇海道
趨臨安而自將軍六十萬號百萬自清河口入淮中
外大震帝內顧諸宿將無在者邊僻蕩弛士利兵頓
驚惶失措相陳康伯言虜違天背道離巢穴數千里
爭一旦之決是且將自焚况彼曲而我奮惟陛下及
其鋒而用之士氣自備虜無足憂者于是召故相浚
判建康詔故帥劉錡制置淮東浙西軍命三衙大帥
楊存中等及侍從臺諫于都堂議兵康伯專旨曰今

日更不問和與守直問戰當何先因草檄諭六軍軍士爭奮願北首死敵思退該勸帝幸閩蜀康伯力沮之一日驟降手詔放百官康伯焚詔附中使奏曰百官散王勢孤矣不可乃決策親征時虜起倉卒朝議洶洶朝列多津遣其家屬歸藉者康伯獨迎其家來與同難帝召楊存中就康伯議康伯延之入解衣置酒意氣自若帝聞之稍寬諸羽書警奏應手裁決一時言兵事者得展盡底蘊人恃以安先是禮侍郎虞允文以工尚書使金見金方運糧造舟度勢必南牧

請申警淮海之備不聽除直學士院及敗盟楊言
襄漢詔成閔制置湖湘允文曰敵必規行都獨爲虛
聲垂我分我兵今宜急備淮不聽亮至汴允文復言
日閔不宜遣而遣今約程尚在江池間急宣令到池
者駐池到江者駐江若敵兵出上流則荆湖之軍捍
于前江池之軍援于後固可防襄漢若出淮則池軍
出居巢江軍出無爲又可爲淮援是一軍而兩用之
也又不聽而亮果自渦口渡淮先是制置使劉錡防
淮東王權防淮西會錡以疾病不能軍還鎮江權棄

廬和道詔成閔代錡李顯忠代權將而允文以督府參謀官奉命趣顯忠赴軍且犒師比至江亮已悉大軍臨采石欲渡矣築高臺臨江對植絳旗二繡旗二中建黃屋亮居坐其下謀者言日之夕刑白馬祭天與衆盟以厥明祭江約晨炊玉麟堂矣先濟者重賞時敵兵號四十萬我師僅萬餘甲士解鞍束甲坐采石道旁權旣去顯忠未來無王者允文至謂坐待顯忠則誤國遂立招諸將勉以忠義日金帛誥命皆在此有功者賞皆應日諾請效死或危之日公受命督

戰他人壞之公顧任其咎乎允文叱之曰敵過江社稷危在旦夕吾安所避咎命諸將列大陣不動分戈船爲五一駐中流二並東西岸行藏精兵以待戰又二藏洲汊備不測部分甫畢敵舟數百艘絕江來瞬息抵南岸者七十艘矣薄我軍軍小卻允文入陣後撫時俊背日汝膽畧聞四方今立陣後則兒女子耳俊卽揮雙刀出土殊死戰日暮未退有潰軍自光州至允文授以旗鼓令從山後轉出敵後敵疑伏兵起大駭遁允文令勁弩追射大敗之允文夜犒士謂之

日敵明必復來然喪氣可擊也夜半部分海舟扼土
流別遣兵截楊林口敵果至復夾擊大破之焚其舟
三百而敵遣僞詔來諭王權似有宿約者允文曰此
反間也復書言權已寘典憲新將李顯忠也顧一戰
決雌雄亮得書大怒遂焚龍鳳舟斬梁漢臣及造舟
者二人趨瓜州是役也徵允文于捨攘呼吸間以其
身抗難幾殆哉時亮所遣者舟師出海口泊陳家島
都統制李寶與其子公佐引舟師至膠西石臼島逆
擊之與虜舟相距咫尺時北風大作不利南寶禱于

石曰忽神氣自施樓來聲如鐘風遂南衆大喜氣自
倍各操刀弩待戰虜操舟皆中原遺民恐虜見則給
虜兵入舟中使意解而寶風駛舟疾猝薄之鼓聲雷
動海波起立虜大驚方舉石舉帆而帆皆細纒相揉
聚一隅窘束不得展寶以火箭射之烟焰頓發頃刻
延燒者數百艘火所不及者欲前聞寶叱壯士躍入
舟以短兵擊刺斬其帥完顏鄭家等六人獲統軍符
單及器械糧餉以萬計餘不能舉者畢焚之火不滅
者四晝夜亮舟師盡焉初亮以江南收鹿柔易折而

已擁強兵百萬以爲宋可平吞也。旣扼采石不得渡，而舟師又大敗。恨趨揚州，時虜屯重軍除河，造三關，儲水深數尺，又塞瓜州口。楊樸中成閔邵宏淵諸軍集京口，按之衆不下三十萬，而海船不滿百。毛勝半之，允文曰：「江遇風必使我船無風，使戰艦戰艦必不足用，急聚材箔鐵修爲船爲戰艦，且檄平江令以江舟來清師。」舟旣具，亮至瓜州，允文與楊存中臨江按視之。命戰士踏車船，圓轉周金山者三如飛。爲新敵相顧，船檣亮笑曰：「紙船耳。」一將前跪言：「南軍。」

也。未可輕亮。怒杖五十。還揚州。當是時。金葛王烏祿
已卽位。遼陽改元。肆赦矣。亮聞大驚。懷謀還汴。李通
曰。不可。今深入敵境。聞內變。還衆散于前敵。乘于
後危道也。卽畱兵渡江。而大駕北。諸將亦且解體。今
獨宜遣燕以北。及遼陽諸軍。徙闕者。早渡江。而歛舟
焚之。以絕其歸望。然後陛下以其間。還汴。庶江南有
定。而遼陽亦指日誅矣。亮曰。善。乃駐瓜州。勒諸將。三
日必濟江。不者盡殺之。軍士多亡去。乃下令。軍士亡
者。殺其蒲里衍。蒲里衍亡者。殺猛安。猛安亡者。殺總

管諸皆虜較名又令運鴉鵂船于瓜州期必濟繇是
軍中人自危思亂夜相與言前渡淮者成擒矣今
江旂未易渡卽渡江無爲也聞遼陽新天子卽位有
君矣不若相與行大事然後與吾衆北還黎明薄亮
營亮聞亂意宋兵旂至攬衣起箭人帳中取視之愕
然曰我兵也左右曰避避亮曰避將焉往方取弓中
飛矢仆地衆從入刃之手足猶動繫而燔之收其妃
嬪及謀臣通等皆殺之是日急使人還殺僞太子光
英于汴退軍三十里請輸平始亮之南也惟制置使

錡必生致用之下令有敢言錡姓名者死時宿將皆
死枚舉南朝諸將問孰敢當者皆隨姓名答如響至
錡無應者金主曰吾自當之蓋爲敵所憚如此錡建
大將旗鼓至楊州軍容肅然觀者歎息駐清河扼師
會疾病而部將王權違節制棄廬州大恨之適虞允
文破虜采石來入問疾錡慷慨執允文手相府流涕
曰疾何必問但朝廷養兵三十年而大功乃屬公儒
生愧死無地矣無何卒錡在揚州遣善泅者鑿沉其
糧運晝燔城外居民屋虜無所棲息虜所過大木上

輒白書完顏亮死于此金主意多忌見而惡之遂屯
龜山人衆不可容致大變亦其功云時故相浚在潭
州召判建康浚卽日行有人士自江東來者言虜方
焚采石烟焰漲天江中無行舟宜少需毋進浚愀然
曰浚被命攜二子來赴君父之急今直前來乘輿所
在耳獨以小舟下遇大風幾殆過池陽聞采石捷李
顯忠已將兵屯江上矣卽渡江勞師激賞之一軍見
浚至皆喜以爲從天而下龍驤呼增氣浚至建康請
臨幸帝至建康浚迎見道左衛士皆以手加額喜其

復用而悲其久處瘴癘形容之瘠也。當是時金烏祿
改名雍卽位大赦散南征之衆遣使來聘告卽位欲
用舊禮受國書相康伯不可邀宰相代受書又不可
遣館伴使直前取書上而工侍郎張闡請嚴遣使正
書儀於是遣洪邁報聘始用敵國禮帝手札賜邁言
祖宗陵寢隔濶三十年不得時汛掃祠祭也心痛之
若彼能以河南地見歸者復屈已何憾蓋意終憚兵
會金主仁明急內治帝亦內禪竟成和而定孝宗受
禪慨然有匡復之志賜手書召前相浚入朝咨謨畫

至引見帝改容慰薦日聞公名久今朝廷所怙恃惟
公賜坐已縱問浚見帝英武語兩宮北狩入陵廢隔
兆民塗炭卽痛憤見詞色因力陳和議之非勸堅圖
恢復加少傅封魏國公除江淮東西路宣撫使而參
政浩以潛邸直講得政自請城采石瓜州浚言不守
淮守江是示敵以弱怠戰守者之氣也請城泗州浩
不悅遂隙督府措置輒從中沮撓海州之捷抑其賞
不行浚議招山東淮北人給廬舍給牛種營田淮右
壯軍實繫中原人心而浩言根餽不給不當廣招納

自○困○浚○請○帝○幸○建○康○而○浩○持○郾○臨○安○爲○便○安○浚○以○淮○
北○廣○漠○餉○不○繼○坐○困○也○規○東○屯○田○圩○貽○楚○泗○扼○清○河○
西○屯○田○豫○壽○扼○渦○潁○又○多○募○舟○船○于○東○海○規○燕○薊○而○
浩○以○糜○國○帑○令○罷○遣○浚○上○書○爭○曰○國○家○南○渡○來○兵○勢○
單○弱○賴○陝○西○及○山○東○北○人○不○忘○本○朝○衆○歸○附○而○始○強○
諸○良○將○精○兵○往○往○皆○時○之○歸○正○人○也○以○能○扞○敵○力○戰○
者○三○十○餘○年○一○旦○絕○之○卽○中○原○之○人○心○盡○失○人○心○既○
失○變○爲○寇○讐○將○內○爲○虜○用○外○爲○我○寇○害○豈○有○極○哉○又○
渡○淮○自○歸○者○旣○絕○彼○之○動○息○我○何○自○知○我○之○間○諜○干○

何從遣夫中原之人本吾赤子。陷虜望歸。譬亡子之在道路。一旦得脫身而來。冀獲安全。而爲父母者拒戶。棄絕。使不得衣食。如情理何。是棄民也。且自用兵來。大軍以奔命疾疫死亡十四五。陛下命諸將招募以充。若淮北人不至。卽募止江浙。異時招江浙人。一卒之費。歲不下百緡。而柔脆不任戰。將軍旅日削。大事去矣。帝感悟。得不能已。有古召宣撫判官陳俊卿。及浚于栻赴行在計事。帝見俊卿等。問俊飲食顏貌。曰。朕倚魏公如長城。不容浮言搖奪。對近臣言。稱魏

公不名蓋信倚如此時尚書允文宜論川陝與大將
吳璘議經畧中原而浩建議言德順地阻遠難守棄
之便允文疏爭曰恢復莫先于陝西陝西三路新復
州郡又繫于德順之存亡一旦棄之則西和成潛窺
蜀之路愈多矣浩持不聽于是德順棄而秦鳳熙河
永興三路新復州軍皆陷允文還入對以蜀畫地極
陳其利害甚辨帝太息曰此史浩誤朕也于是罷浩
相而倚浚益堅當是時帝新卽位諸宿將已盡無卓
然任戰者又金王賢政修明國無釁而浚銳意圖恢

復好先用罔有雄志而短于知人。又欲及金未發先攻之。于是詔出師而三省樞密院皆不豫聞。欲阻其成。浩激相康伯曰。吾屬俱兼右府而師出。不知安用彼相。康伯稱病去。會顯忠宏淵亦獻禱虹縣靈壁之策。帝命先圖二城。乃遣顯忠出濠州趨靈壁。宏淵出泗州趨虹縣。于是顯忠自濠梁渡淮至健溝。金右翼都統蕭琦用拐子馬來拒顯忠。與之力戰。遂復靈壁。顯忠入城。宣布德意。不戮一人。于是中原歸附者接踵。宏淵圖虹。久不下。顯忠遣靈璧降卒開諭禍福。金

守將出降宏淵耻功不自己出會有降千戶訴宏淵之卒奪其佩刀顯忠立斬之繇是二將不協未幾蕭琦復降于顯忠顯忠兵傳宿州城金人來拒顯忠大敗其衆追奔二十餘里宏淵至謂顯忠曰招撫真關西將軍也顯忠閉營休士爲攻城計宏淵等不從顯忠引麾下楊椿等上城開北門不踰時拔其城宏淵等殿後趣之始渡濠登城城中港戰又斬獲數千人遂復宿州中原震動捷聞帝手書勞張浚曰近日邊報中外鼓舞十年來無此克捷旣而宏淵欲發倉庫

犒卒顯忠不可移軍出城止以見錢犒士士皆不悅
詔以顯忠爲淮南京東河北招討使宏淵副之金紇
石烈志寧自睢陽引兵攻宿州李顯忠擊却之金孛
撒自汴率步騎十萬復來攻顯忠請宏淵併力夾擊
宏淵按兵不動顯忠獨以所部力戰俄而敵大至顯
忠用克敵弓射却之先是浚後書令宏淵聽顯忠節
制淵不悅已而復令顯忠宏淵同節制于是悉無體
統矣宏淵又耻前功不自己出及是役固利顯忠敗
且顧衆曰當此盛夏搗扇清涼且猶不堪况烈日披

甲苦戰乎人心遂播無復鬪志至夜中軍統制周宏
鳴鼓大譟陽爲敵兵至與邵世雍劉忱恪以所部兵
遁顯忠移軍入城統制張訓通張師顏等以顯忠宏
淵不協各遁去金人乘虛復來攻城顯忠竭力捍禦
敵始遇却顯忠嘆曰若使諸軍相與犄角自城外掩
擊則敵兵可盡敵帥可擒河南之地指日可復矣宏
淵又言金添生兵二十餘萬儻我兵不返恐不測生
變顯忠知宏淵無固志勢不可孤立歎曰天未欲平
中原邪何沮撓如此遂夜引還至符離師大潰是舉

所喪軍資器械殆盡幸而金不復南時張浚在盱眙
顯忠往見浚納印待罪後以劉寶爲鎮江諸軍統制
遂還楊州上䟽自劾帝以符離師潰乃議講和士大
夫主和者皆議張浚之非帝賜浚書曰今日邊事倚
卿爲重卿不可畏人言而懷猶豫復召浚子杓入奏
事浚附奏曰自古有爲之君腹心之臣相與協謀同
志以成治功今臣以孤蹤動輒掣肘陛下將安用之
因乞骸骨帝覽奏謂杓曰朕待魏公有加雖乞仕之
章日上朕決不許已而以湯思退同平章事思退力

主和議金統石烈志寧以書來求唐鄧海泗四州之地及歲幣帝以書示督府浚言金強則來弱則止不在和與不和陳康伯等皆欲和使我軍民得休息爲自治之計工部侍郎張闡獨曰彼欲和畏我耶愛我耶直欵我耳力陳六害不可許帝曰朕意亦然姑隨宜應之乃遣盧仲賢報書戒以勿許四郡而恩退許之仲賢至宿州金僕散忠義懼之以威仲賢惶恐言歸當稟命忠義遂書四事一欲通書稱叔侄二欲得四州地三欲歲幣之數如舊四欲歸彼叛臣及歸正

人仲賢至行在帝大悔命廷臣議金師所言四事其說不同帝曰四州歲幣可與名分歸正人不可從也初王之望爲都督府參贊入朝爲帝言竊觀天意南北之形已成未易相兼我不能絕淮而北猶敵之不能越江而南也獨移攻戰之力以自守則固自守固然後可隨幾變制之思退悅其言奏遣之望復如金議和浚發憤上書言自秦檜王和懷逆成金亮之禍而大罪未正故使其黨得復出爲惡臣聞立大事者以得人心爲本今內外之議未決而遣使之命已下

矢中原將士四海傾慕者之心人心既失如水一覆
不可復收臣竊憂之且請帝幸建康圖進取帝乃詔
之望等待命境上而令胡昉如金師諭四州不可割
之意昉至金而執詔王之望以幣還謂浚曰和之不
成天也自此事當歸一矣思退爲奏以危言搖之且
請宗社大計奏稟上皇然後行帝怒批牘尾曰金無
禮如此卿猶欲議和今日敵勢非秦檜時比卿議論
秦檜不若思退大慚忿而忌浚益深已浚以右相復
開府出督遣魏勝守海州戚方守濠州郭振守六合

陳敏守泗州。招徠山東淮北歸正人。實建康鎮江兩軍凡萬二千人。招淮南壯士及江西群盜實萬勝營。又萬餘人。治高郵。集縣兩城。修滁州關。增江淮戰艦。集水軍淮陰。馬步軍壽春爲防守。其可因水爲險者。皆爲積水。櫃深之。諸賊守備益設。于是淮北來歸者不絕。山東豪傑悉願受節度。浚以蕭瑀契丹望族。沈勇有謀。令盡領降衆。且以檄諭契丹。約爲援。金懼敵兵退。而思退陰謀必逐浚。以帝眷浚者。倚浚終可任。愾復而兩淮備禦爲足恃也。令之望過淮。卽驛奏兵。

少糧乏盛毀兩淮諸守備爲無實委四萬衆守泗州
爲非計正言檣木以諂龍大淵得進又仲賢姻黨因
詆浚跋扈費國論罷督府參議官馮方提之錢端禮
宣諭兩淮卽疏言兩淮各守備守未必備各治兵兵
未必精帝不能無惑而浚留平江八疏乞骸骨乃判
福州旣去思退急和成罷築壽春城散萬勝營兵輟
修海船毀折積木櫃及撤海泗唐鄧之戍凡浚所經
畫備禦者畢罷而諷尹穉言乞置獄逮不肯撤備及
棄地者二十餘人論罪示必和擢穉諫議大夫而國

是大變已帝遣思退督江淮思退怯當難又恐去帝左右事中變辭不行而陰遣孫造諭敵以重兵協和金僕散忠議遂與紇石烈志寧分兵自清河攻楚州魏勝戰死楚州陷金入濠州都統制王彥棄昭關走朝議欲舍淮保江都督楊存中持不可乃已于是言者論思退主和撤備之罪落職竄永州太學生張覲等伏闕上書論思退之望稽姦邪誤國及鈞致敵人罪乞斬以謝天下思退聞憂悸道死于是帝召陳康伯爲尚書左僕射虞允文簽書樞密院事欲復有爲

而魏杞至自金正敵國禮損歲幣訂不還歸正人報
和矣○初○僕○散○忠○議○執○胡○昉○以○書○進○金○主○金○主○雍○仁○恕○
意○兼○愛○南○北○欲○寢○兵○覽○書○曰○人○何○罪○卽○遣○還○令○諭
中○國○以○善○意○而○令○元○帥○府○邊○事○從○宜○措○畫○詔○遣○宗○正
少○卿○魏○杞○復○使○金○帝○面○諭○之○曰○今○遣○使○一○正○名○二○退
師○三○減○歲○幣○四○不○發○歸○附○人○正○名○謂○不○稱○臣○稱○叔○侄
也○杞○呈○所○條○十○七○事○擬○問○對○以○上○帝○隨○事○盡○可○陛○辭
奏○曰○臣○將○命○出○疆○豈○敢○不○免○虜○萬○一○無○厭○願○速○加○兵
帝○善○之○杞○行○次○盱○眙○僕○散○忠○義○遣○趙○房○長○問○杞○所○以

來之意求觀國書杞曰書御封也見國主當廷授不
可開忠義疑國書不如式不聽行久之乃得行既至
金館伴張恭愈以國書稱大宋脇杞去大字杞不可
見金主具言今天子神武才傑奮起人有敵愾心北
朝用兵何能保必勝所爲欲和者以兩國各懲其忿
保宥其赤子也和則兩國共其福戰則兩國共其禍
金君臣環聽拱竦金主許損歲幣許不發歸正人許
不稱臣稱叔侄而命元帥府罷兵分戍卒正敵國而
還帝性本英武沮于群議而講和然中介然以復讐

爲心修建康行宮汰冗兵置制國用司以宰相兼領
措置兩淮營田詔訓習水軍而宮中臺苑未嘗一修
葺上皇過宮每徘徊瞻視爲興歎也宣撫吳玠卒于
蜀帝重蜀輟知樞密院允文出撫蜀御正殿宴遣之
且親書九事以戒令建節以出每大閱常親御甲冑
習騎射嘗射弩傷目不視朝相俊卿進曰陛下未忘
騎射者志恢復也然誠任智謀之士爲腹心任雄武
之將爲爪牙明賞罰以作士氣恢信義以懷歸附則
英聲義烈不出于尊俎之間而敵人逡巡震疊于千

萬里之外。豈必馳射于百步之內。爲快哉。帝深納之。
甫定和。相允文白遣使如金。求鞏洛山陵相俊卿爭
之日。陛下痛念祖宗思復故疆。甚幸。然事須萬全。今
和甫成。而忽生事端。失所圖。將爲敵國笑。臣不敢阿
意。帝不聽。出判福州。使金不得請。覆以渝信。誓歸過。
使再往。金王謂之曰。今少主旅視在此。未葬也。汝國
棄不請。顧請鞏洛山陵乎。誠不請。朕當爲爾國葬之。
于是金葬欽宗皇帝于鞏洛。以一品禮。中國自屈先。
是起居郎張栻入朝。帝以其爲魏公浚子。王恢復也。

謂之曰卿比知敵國事乎。栻對曰不知也。帝曰金饑
僅連年盜賊四起可乘也。栻對曰金人之事臣雖未
知。境內之事臣實知之。帝問何也。栻曰臣竊見比年
諸道多水旱。民貧日甚。而國家兵弱財匱。官吏誕謾
不足信。正使彼實可圖。臣懼我未足以圖之也。帝爲
默然。栻出奏劄讀之曰。陵寢隔絕。誠臣子不忍言之
至痛。今未能奉辭以討之。又不能正名以絕之。乃欲
卑辭厚禮以求于彼。于大義固已未盡。而論者猶以
爲憂。則淺陋畏怯固已甚矣。然竊揆其意。或亦見我

未○有○必○勝○之○形○而○不○能○不○憂○也○蓋○必○勝○之○形○當○在○于○
早○見○豫○定○之○時○而○不○在○兩○陣○決○機○之○日○今○但○當○下○哀○
痛○之○詔○明○復○讐○之○義○顯○絕○虜○人○不○與○通○使○然○後○通○內○
修○外○攘○進○戰○退○守○爲○一○事○且○必○治○其○實○不○溺○其○文○使○
必○勝○之○形○隱○然○可○見○雖○淺○陋○畏○怯○之○人○亦○且○奮○耀○而○
爭○効○矣○帝○歎○息○褒○諭○以○爲○前○此○未○始○聞○也○以○忒○劄○宣○
示○時○建○康○府○通○判○辛○棄○疾○進○美○芹○十○論○畧○曰○今○日○之○
勢○朝○廷○一○于○持○重○以○爲○成○謀○虜○人○利○于○嘗○試○以○爲○得○
計○故○和○戰○之○權○常○出○于○敵○而○我○特○從○而○應○之○是○以○燕○

山之和未幾而京城之圍急城下之盟方成而兩官
之待遠秦檜之和反以滋逆亮之狂彼利則戰然則
和詭譎徂詐我實何有惟是張浚符離之師甫有生
氣雖勝不慮敗事非十全然計其所喪方諸旣和之
後投間蹂躪猶未若是之酷而不識兵者徒以勝不
可保之爲害而不悟夫和不可恃爲膏肓之大病亟
遂辭舌以爲深戒臣竊謂恢復自有定議非符離小
勝負之可懲而朝廷公卿過慮不言兵之可惜也古
人言不以小挫而沮吾大計正以此耳夫用兵之道

形與勢二不知而一之則沮于形眩于勢而勝不可圖且坐受其蹙矣何謂形大小是也何謂勢虛實是也土地之廣財賦之多士馬之衆此形也非勢也形可舉以示威不可用以必勝自今論之虜人雖有巖巖可畏之形而無矢石必用之勢其舉以示吾者特以威而疑我也謂欲用以求勝者固知其未必能也彼欲致疑吾且信之以爲可疑彼未必能吾且意其或能是未詳夫形勢之辨耳臣請得而條陳之虜人之地亦東薄于海西抵于夏南抵于淮北極于蒙地

非不廣也。虜人之財，發兵于民而無養兵之費，靳恩于郊而無泛恩之賞，又輔之以歲幣之相，仍橫歛之，不恤則財非不多也。沙漠之地，馬所生焉，射御長技，人皆習焉，則其兵又可謂之衆矣。以此之形時出而震我，亦在所慮，而臣獨以爲不足恤者，蓋虜人之地雖各分，其實易分。惟其無事，兵劫形制，若可糾合。一有驚擾，則忿怒紛爭，割據蜂起。辛巳之變，蕭賜巴反于遼，開趙反于密，魏勝反于海，王友直反于魏，耿京反于齊，魯親而葛王又反于燕，其餘紛紛所在而

是此則已然之明驗。是一不足慮也。虜人之財雖名爲多。其實難恃。得吾歲幣。惟金與帛。可以備賞。而不可以養士。中原廩窖。可以養士。而不能保其無失。蓋人而官其積。常賦供意。民粗可支。意外而有需。公實取一。而吏七八之民。不堪而叛。叛則財不可得。而反喪其資。是二不足慮也。若其爲兵名之日多。又實難調而易潰。且如中原所簽。謂之大漢軍者。皆其父祖殘于蹂踐之餘。田宅罄于槌剝之酷。怨憤所積。其心不一。而沙漠所簽者。越在萬里之外。雖其數可

以百萬計。而道里遼絕。資糧器甲。一切取辦于民賦。輸調發非一歲而不可至。始逆亮南寇之時。皆是誅脇酋長。破滅資產。人乃肯從。未幾中道竄歸者已不。容制。則又三不足慮也。又况虜廷今用事之人。雜以契丹。中原江南之士。上下猜防。議論齟齬。非如前日粘罕兀朮輩之叶。且骨肉間僭弑成風。如聞僞許王以庶長出守于汴。私收民心。而嫡少嘗暴之于父。此豈能終以無事者哉。我有三不足慮。彼有三無能爲。而重之以有腹心之疾。是殆自保之不暇。何以謀人。

韓○聞○古○之○善○用○兵○者○非○能○務○爲○必○勝○而○能○謀○爲○不○可○
勝○蓋○不○可○勝○者○乃○所○以○徐○圖○必○勝○之○功○也○我○欲○勝○彼○
亦○志○于○勝○誰○肯○處○其○敗○勝○敗○之○情○戰○于○中○而○勝○敗○之○
機○未○有○所○決○彼○或○以○兵○來○吾○敢○謂○其○張○虛○聲○以○耀○我○
乎○彼○或○以○兵○遁○吾○敢○謂○其○非○匿○形○以○誘○我○乎○是○皆○未○
敢○也○然○則○如○之○何○曰○權○然○後○知○輕○重○度○然○後○知○長○短○
定○故○也○他○人○有○心○于○忖○度○之○審○故○也○能○定○而○審○敵○情○
雖○萬○里○之○遠○可○坐○察○矣○今○吾○藏○戰○于○守○未○戰○而○嘗○爲○
必○戰○之○待○寓○勝○于○戰○未○勝○而○嘗○有○必○勝○之○理○彼○誠○虛○

聲以耀我。我以靜應而不輕動。彼誠匿形以誘我。我
有素備而不可以乘勝。敗既不能爲吾。亂則固神閒
而氣定矣。然後徐以吾之心度彼之情。吾猶是彼亦
猶是。南北雖有異慮。休戚豈有異趨哉。虜人情僞。臣
嘗熟論之矣。譬如獐狗焉。心不肯自閑。擊之則吠。吠
而後却呼之。則馴。馴必致醬。蓋吠我者忌我也。馴我
者狎我也。彼何嘗不欲戰。又何嘗不言和。惟其實欲
戰而乃以和狎我。惟其實欲和而乃以戰要我。此所
以和無定論而戰無常勢也。尤不可以不察。曩者兀

木之死固嘗囑其徒使與我和曰韓張劉岳皆習兵
恐非若輩所敵則是其情真欲和矣然而未嘗不進
而求戰者計出于忌我而要我也劉豫之廢亶常慮
無以守中原則請割三京亶之弑亮常懼吾有問罪
之師則又謀割三京而還梓宮亮之殞亶又嘗緩我
追北之師則復謀割白溝河以丈人行事我是其情
亦真欲和矣非詐也未幾亶之所割視吾所守之人
非其敵則不旋踵而復取之亮之所謀窺吾遺賀之
使知其無能爲則中輟而萌辛巳之逆亶之所謀倍

有班師之失。無意于襲。則又反覆而有意外之請。夫
既云和矣。而復中輟者。蓋用其狎而謀勝于我也。今
日之事。揆諸虜情。是有三不敢必戰。三必欲嘗試。何
以言之。空國之師。商監不遠。彼必不肯再用危道。萬
一猖獗。特不過調沿邊戍卒而已。戍卒豈有能必其
勝。此一不敢必戰也。海泗唐鄧等州。吾旣得之。彼用
師三年而無成。則吾有攻守之士。而虜人已非前日
之比。此二不敢必戰也。契丹諸胡。側目于其後。中原
之士。脆脫于其前。令之雖不得從。從之未必不反。此

三○不○敢○必○戰○也○有○三○不○敢○必○戰○之○形○懼○吾○之○窺○其○弱○
而○絕○歲○幣○則○其○勢○不○得○不○張○大○以○要○我○此○一○欲○嘗○試○
也○貪○而○志○欲○得○其○求○不○能○充○其○所○欲○心○惟○務○于○僥○倖○
謀○不○暇○于○萬○全○此○二○欲○嘗○試○也○且○彼○誠○欲○戰○耶○則○必○
不○肯○張○皇○以○速○我○之○備○如○逆○亮○始○謀○南○寇○之○時○劉○麟○
蔡○松○年○一○探○其○意○而○導○之○則○麟○逐○而○松○年○鳩○惡○其○露○
機○也○今○誠○必○戰○豈○欲○人○遂○知○之○乎○彼○誠○不○敢○必○戰○耶○
貪○殘○無○義○忿○不○顧○敗○彼○何○所○卹○以○母○之○親○兄○之○長○一○
忤○其○意○一○利○其○位○亮○猶○弑○之○何○有○于○我○况○今○汧○海○造○

艦○汧○淮○治○具○包○藏○禍○心○有○隙○皆○可○投○敢○謂○之○終○遂○不○
戰○乎○大○抵○今○彼○雖○無○必○敢○戰○之○心○而○吾○亦○不○可○不○防○
其○欲○嘗○試○之○舉○彼○于○高○麗○西○夏○氣○足○以○吞○之○故○于○其○
使○之○至○也○坦○然○待○之○而○無○他○惟○吾○使○命○之○去○則○多○方○
腆○鮮○曲○意○防○備○如○人○見○牛○羊○未○嘗○作○色○而○遇○虎○豹○則○
厲○聲○奮○臂○以○加○之○此○又○足○以○見○其○深○有○忌○于○我○也○彼○
知○有○忌○我○獨○無○忌○哉○我○之○所○忌○不○在○于○虜○欲○必○戰○而○
在○于○虜○幸○勝○以○踰○淮○而○遂○守○淮○以○困○我○則○吾○受○其○病○
矣○今○之○議○者○皆○痛○懲○往○者○之○事○而○劫○于○積○威○之○後○不○

推項藉之亡秦而猥以蔡謨之論晉者以藉口是猶懷千金之璧不能幹營低昂而搖尾于販夫懲蝮蛇之毒不能詳覈直僞而褫魄于雕弓亦已過矣故願姑以光復舊物自期不以六朝之勢自卑精心強力日與二三大臣講求古今南北之勢知其不侔而不爲之惑則臣固常爲陛下言自治之策今之所以自治者不勝其多也官吏之盛否民力之優困財用之豐耗士卒之強弱器械之良苦邊備之廢置此數者皆有司之事陛下亦次第而行之臣不能悉舉也願

今有大者二陛下知之而未果行大臣難之而不敢
發者一日絕歲幣二日都金陵臣聞今之所以待虜
以緡計者二百餘萬以天下之大而爲生靈社稷計
曾何二百餘萬之足云臣不爲二百餘萬緡惜也錢
塘金陵俱在大江之南而其形勢相去亦無幾矣豈
以爲是數百里之遠而遠有強弱之辨哉臣不爲數
百里計也然而絕歲幣則財用未可以遽富都金陵
則中原未可遽復是三尺童子之所知臣之區區以
是爲言者蓋古之英雄撥亂之君必先內有以作三

軍之氣外有以破敵人之○心○故○曰○未○戰○養○其○氣○又○曰○
先○人○有○奪○人○之○心○今○則○不○然○待○敵○則○恃○驕○好○于○金○帛○
之○間○立○國○則○借○形○勢○于○湖○山○之○險○望○實○俱○喪○莫○此○爲○
甚○使○吾○內○之○三○軍○習○知○其○上○之○人○畏○怯○退○避○之○如○此○
以○爲○夷○狄○必○不○可○敵○戰○守○必○不○可○恃○雖○有○剛○心○勇○氣○
亦○銷○鑠○委○靡○而○不○振○臣○不○知○緩○急○將○誰○使○之○戰○哉○借○
使○戰○其○能○必○勝○乎○外○之○中○原○民○心○以○爲○朝○廷○置○我○于○
度○外○謂○吾○無○事○則○知○自○備○而○已○有○事○則○將○自○救○之○不○
暇○向○之○祖○臂○疾○呼○而○促○逆○亮○之○斃○爲○吾○嚮○應○者○它○日○

必無若是之捷也。如是則敵人將安意肆志而爲患。今絕歲幣都金陵其形必至于戰。天下有戰形矣。然後三軍有所怒而思奮。中原有所恃而思亂。陛下間取其二百餘萬緡者以資吾養兵賞勞之費。豈不爲朝廷之利乎。然此二者在今日未可遽行。臣觀虜人之情玩吾之重戰而所求未能充其欲。不過一二年必以戰而要我。苟因其要我而遂絕之。則彼亦將自沮而權固在我矣。議者必曰。朝廷全盛時西北二虜亦不免于賂。今我有天下之半而虜倍西北之勢。

雖欲不賂得乎臣應之曰是趙之所以待秦也昔者秦攻邯鄲而去趙將割六城而與之和虞卿曰秦之攻趙也倦而歸乎抑其力尚能進且愛我而不攻乎王曰秦之攻我也不遺餘力矣必以倦而歸矣虞卿曰秦以其力攻其力所不能取倦而歸王又以其力之不能攻以資之是助秦自攻也臣以爲虞卿之所○以○謀○趙○者○是○今○日○之○勢○也○明○知○天○下○之○必○戰○則○出○兵○以○攻○人○與○坐○而○待○人○之○攻○也○孰○爲○利○戰○人○之○地○與○退○而○自○戰○其○地○者○孰○爲○得○均○之○不○免○于○戰○莫○若○先○出○兵○

以戰人之地。今日中原之地其形易其勢重者果安
在我。曰山東是也。不得山東則河北不可取。不得河
北則中原不可復。此定勢非臆說也。方今山東者虜
人之首而京洛關陝則其身其尾也。縣泰山而北不
千二百里而至燕燕者虜人之巢穴也。自河失故道
河朔無濁流之阻所謂千二百里者從枕席上過師
也。山東之民勁勇而喜亂虜人有事常先窮山東之
民天下有變而山東亦常首天下之禍至其所謂備
邊之兵較之他處山東號爲簡畧且其地于燕爲近

而其民素喜亂彼方窮其民簡其備豈真識天下之勢也哉今夫二人相搏痛其心則手足無強力兩陣相持謀與營則士卒無鬪心故兵出沐陽則山東可指日而下山東已下則河朔必望風而震河朔已震則燕山者臣將使之塞南門而守請試言其說虜人列屯置戍自淮陽以西至于汧隴雜女真渤海契丹之兵不滿十萬關中洛陽京師三處彼以爲形勢最重之地防之爲甚深備之爲甚密可固其重大爲之名以信之多爲旌旗金鼓之形陽爲志在必取之勢

已震關中。又駭洛陽。又聲京師。彼見吾形。忌吾勢。必
以十萬之兵。而聚三地。且沿邊郡縣。亦必皆守。而後
可。是謂無所不備。則無所不寡。如此。則燕山之衛兵。
山東之戶民。中原之簽軍。精甲銳兵。必悉舉。以至吾
乃。以形聳之。使不得遽去。以勢留之。使不得遂休。則
山東之地。固虛邑也。山東雖虛。竊計青密沂海之兵。
猶有數千。我以沿海戰艦。馳突于登萊沂密淄濰之
境。彼數千兵者。盡分于屯守矣。山東城虛。盜賊必起。
吾誘群盜之兵。使之潰裂四出。而陛下徐擇一驍將。

以兵五萬步騎相半鼓行而前不三日而至堯鄆之
郊臣不知山東諸郡將誰爲王師敵哉山東已定則
休士秣馬號召忠義教以戰守然後傳檄河朔諸郡
徐以兵躡其後此乃韓信所以破趙而舉燕也天下
之人知王師恢復之意堅虜人破滅之形著則契丹
諸國如窩幹鵠巴之事必有相軋而起者此臣所以
使燕山塞南門而守也然海道與三路之兵將不必
皆勇士不必皆銳蓋臣將以海道三路之兵爲正而
以山東爲奇奇者以強正者以弱弱者牽制之師而

強者必取之兵也。古之用兵者，唐太宗其知此矣。嘗曰：吾觀行陣形勢，每戰必使弱常遇強，強常遇弱，敵遇吾弱，追奔不過數十百步；吾擊敵弱，常突出自背，反攻之以是必勝。然此特太宗用之于一陣間耳。臣以爲天下之勢，避實擊虛，不過如是。苟曰不然，必將驅堅悉銳，繇三路以進，寸攘尺取，爲恢復之謀。則吾兵爲虜弱久矣。驟而用之，未嘗不敗。近日符離之戰，是也。假設陛下舉而取京洛，再舉而復關陝，彼將南絕大河，下燕冀之甲，東逾泗水，潛山東之粟，陛下

之將誰與守此曩者三京之役是也借能守之則河北猶未病河北未病則雖雄猶未決也以是策之陛下其知之矣然當時惟以正敵國爲講和之美圖恢復雪耻置之不問遣使通賀往來不絕豈不深可歎哉若孝宗者難免莊公之責矣寧宗開禧元年韓侂胄輟政金爲蒙古所蹙北鄙阻鞞等部歲擾之兵北財匱而群盜蠭起蘇師旦者故平江兵馬幹轄也侂胄知平江時悅之川爲腹心及是樞密都承旨獻計言當立蓋世功名以自固侂胄問之則曰莫如恢復

于是聚財募士規蹙金而恢復之議起會安豐守厲仲方言淮北流民願歸附幸招納而安撫使辛棄疾入見帝言金必且亡顧飭兵以待變當是時南北和好者四十年武備凋圯賢士大夫忠力者盡屏棄諸頑頓嗜利之人逢侂冑致位者實恒怯不任兵吳挺子曦以世守蜀有功爲藩屏而身閒行都不得意賂侂冑請帥蜀自效侂冑喜許之知密院何澹持不可侂冑怒其持異也罷奉祠命許及之守金陵費士寅鎮興元皆懼辭不行遂皆罷錢象祖執用兵爲不可

以避事亦罷而肘腋盡散。勑國用司覈中外財賦爲兵費。令陳自強主之。務培克而州縣騷動。遣將攻宿唐。蔡州皆敗。而金完顏匡出唐鄧。陷光化。棘陽。破信陽。圍德安。胡沙虎自清河渡淮。圍楚州。僕散揆出潁。壽。陷安豐。軍圍和州。紇石烈子仁出渦口。陷除。入真州。程松爲四川宣府使。東川軍屬焉。曦爲副使。屯河池。西川軍屬焉。而命曦聽松節制。松始至。欲以執政禮見。曦責庭參。曦聞之。及境而反。不見也。松用西川軍千八百人。自衛。曦抽摘去。而松營不悟。金攻鳳州。

召曦援曦謬許之而潛以階成和鳳獻金以求對莫
覺也金師迫救不至松惶躍跳身走自閬順流至重
慶書抵曦求裝齋東歸曦匣封致之松望見大懼疑
其爲劍也亟逃走使者追與之乃金寶也受之喜過
望兼程出陝西向掩淚曰吾今始獲保頭顱矣而曦
稱蜀王反侂冑怒竄松澧州蘇師且以始謀誤罷官
藉家竄韶州初北伐議起工尚書傅伯成爭之日今
天下之勢如漏舟百鍊千孔兢兢防危然且懼沉覆
乃欲檄幸行險圖背人之所難乎宜撫使丘宿日中

原淪陷且百年在我固不可一日忘然獨非常之舉其必有誇誕貪進之人攘臂以僥倖而勝負未可期脫其不捷則首事之禍孰爲任之侂冑意方銳不聽及是金攻淮南急詔以宥簽書樞密院事督江淮軍或勸宥棄廬和守江宥曰吾當與淮南同存亡益增兵守淮當時金苦軍國敝厭兵命其帥僕散揆者示通和端宥以聞侂冑方悔前謀聞之喜遣使報金許爲和時督師宥以金指侂冑爲首謀請移書暫免繫銜侂冑怒罷之以張巖代帥而募可報金軍者或薦

方信孺自蕭山丞召赴都命之信孺曰開鑿自我設
金人問首謀當何以應之佗曳嬰然無以應命假朝
奉郎樞密院參謀持巖書以往示不遽出朝旨也至
濠州金帥紇石烈子仁欽示強寘之獄露刃環守之
絕薪水以五事要之信孺曰反俘歸幣可也縛首謀
千古無之稱藩割地非臣子敢言子仁怒曰若不望
生還耶信孺曰吾將命出國門時已置生死度外矣
傳至汴見金相完顏宗浩宗浩坐帳中左右陳兵夾
戶待召見備之堅以五事爲要信孺辨對不少屈金

不能難受報書需後議侂冑急和成以林拱辰爲通
謝使與信孺持國書往許通謝錢百萬緡宗浩以中
國恇怯可震也會蜀取大散關不成約而還侂冑以
求和不得怒信孺使無當召問敵何言信孺言敵所
欲五事割兩淮一增歲幣二索犒軍錢三索歸正人
四其五不敢言侂冑再三詰之信孺徐曰欲得太師
頭耳侂冑大怒奪三秩放臨江軍忠用史彌遠計殛
殺侂冑函其首送金師易淮陝侵地金懸其首于通
衢後漆之藏諸軍器庫遂罷兵遣使來歸大散關乃

濠州和議復成

初蒙古奇渥溫鐵木真之先有曰孛端義兒母阿蘭
果火生二子而寡居又一乳生三子孛端義兒其秀
子也其後子孫蕃衍不相統攝各自爲部居烏桓北
與畏羅乃蠻九姓回鶻故城和林接壤世奉貢遼金
而總隸于韃靼至也速皆并吞諸部勢愈盛大攻塔
塔兒部長鐵木真還次于盤陀山而生子因以鐵木
真名之紹興十七年也速該死鐵木真年幼其部衆
多歸于族人泰赤烏部赤烏合七部人凡三萬攻之

鐵木真率部人爲十三翼大戰泰赤烏等敗去泰赤烏部遂微末幾塔塔兒部叛金鐵木真自幹難河帥衆會金師同滅之以功授鐵木真爲察兀秃魯猶中國之招討使也鐵木真以乃蠻部強盛事之甚謹乃蠻反侵掠之鐵木真乃大會屬部議伐乃蠻諸部悉潰鐵木真益以強盛金章宗太和六年宋寧宗開禧二年遂攻西夏大掠而還至是自號爲成吉思可汗先是金主遣衛王允濟往靖州受鐵木真之貢允濟奇其狀貌歸言于金主請以事除之金主不許鐵木

真聞而憾之。嘉定三年，金主元濟嗣位，有詔至蒙古，傳言當拜受。蒙古怒，遂與金絕。金主乃命平章千家奴參知政事完顏胡沙虎以禦蒙古，至烏沙堡未及設備。蒙古兵奄至，拔烏沙堡，乘勝破白登城，遂攻西京。凡七月，胡沙虎懼，以麾下棄城突圍逃去。蒙古主以精騎三千馳之，金兵大敗，遂取西京及桓撫州。金主命招討使完顏九斤監軍九斤萬奴等率兵號四十萬，駐野孤嶺，以備胡沙虎。率重兵爲後繼，遣麾下明安問蒙古舉兵之故。明安反降于蒙古，以虛實告。

之蒙古遂與九斤等戰金兵大敗蒙古遊奕至都城
下金主欲南奔汴會衛卒誓死迎戰蒙古兵損折頗
多遂襲金群牧監驅其馬而去金主乃止六年胡沙
虎殺金王永濟而立昇王珣自爲太師十月蒙古兵
至懷來金將木虎高琪之敗績僵尸四十里高琪還
兵遂殺胡沙虎蒙古乘勝至古北口金兵保居庸不
能入蒙古主乃留將薄察等頓兵拒守而自以衆趨
紫荆關敗金兵于五回嶺拔涿易二州分命遮別將
兵反自南口攻居庸關破之山北口與薄察軍合蒙

古王自將與子拖雷縣中道破淮莫清滄景獻河間
潰隸濟南等郡引兵復自大口以過中都時中原諸
路之兵皆會往山後防遏悉會鄉民爲兵上城守禦
蒙古盡驅其家屬來攻父子兄弟往往遇呼相認縣
是人無固志故所至郡邑皆下凡破金九十餘郡兩
河山東數千里惟大名真定青鄆海沃順通州有
兵堅守未能破嘉定七年蒙古王還自山東屯燕城
北諸將請乘勝破燕蒙古王不從蒙古王引歸出居
庸闕取所虜山東兩河少壯男女數千萬皆殺之金

主以蒙古主和大赦其國乃議遷于汴中都益懼御
史中丞李英運糧大名救中都英至大名得兵數萬
取衆素無紀律三月英被酒與蒙古遇于霸州北大
敗盡失所運糧英死士卒殲焉慶壽永錫聞之皆潰
歸自是中都援絕內外不通時金人屢遣使來督歲
幣起居舍人真德秀上疏請絕之其畧曰女真以韃
靼侵陵徙巢于汴此吾國至憂也蓋韃靼之圖滅女
真猶獵師之志在得鹿鹿之所走獵必從之旣能越
三關之阻以攻燕豈不能絕黃河一帶之水以趨汴

使韃靼遂能如劉聰石勒之盜有中原則疆場相望
便爲隣國固非我之利也。或如耶律德光之不能卽
安中土則姦雄必將投隙而取之亦非我之福也。今
當乘虜之將亡亟圖自立之策不可幸虜之未亡如
爲自安之計。夫用忠賢修政事屈群策收衆心者自
立之本。訓兵戎擇將帥繕城池飾戍守者自立之具。
以忍耻和戎爲福以息兵忘戰爲常。積安邊之金繒
備行人之玉帛。女真尚在則用之女真。強敵更生則
施之強敵。此苟安之計也。陛下以自立爲規模則國

勢日張人心日奮雖強敵驟興不能爲我患以苟安
爲志向則國勢日削人心日偷雖弱虜僅存不能無
外憂蓋安危存亡皆所自取若夫當事變方興之日
而示人以可侮之形是堂上召兵戶內延敵也反覆
數千言帝納之遂罷金國歲幣于是金復分道入寇
然宋積弱金驟衰互有勝負不足數也十二年蒙古
張柔侵金于是祁陽曲陽等帥皆降于柔遂圍中山
府南掠金鼓城深澤寧晉諸縣縣是深冀以北鎮定
以東三十餘城望風降附宋遣使如蒙古通好十五

年金主詢卒子守緒立。理宗寶慶二年蒙古滅夏。鉄
木真凡在位二十二年卒。後廟號太祖。子窩闊台立。
真德秀上殿劄子曰。臣觀韃靼之在今日。無異昔者。
女真方興之時。一旦與吾爲隣。亦必祖述女真已行
之故智。蓋女真嘗以燕城歸我矣。今獨不能還吾河
南之地。以觀吾之所處乎。受之則享虛名而召實患。
不受則彼得以陵寢爲詞。假大義以見攻。女真嘗與
吾通好矣。今獨不能卑詞遣使以觀吾之所答乎。從
之則要素無厭。豈能滿其溪壑之欲。不從則彼得藉

口以開弊端。黠虜之情必出于此。不可不豫圖。所以
應之也。曩者虜在燕南。吾以歲時聘問。已非獲已。彼
既播越而南。獨不可遷延其詞。俟復燕山。然後玉帛
往來如故。廼使大宋臣子。拜犬羊于祖宗殿廷之下。
其誤一也。歲幣之弗遣。是矣。然不以還燕爲詞。而諉
曰。漕渠之乾涸。使殘虜得以移文督責。中原豪傑聞
之。寧不以寡謀見哂乎。其誤二也。並邊遺民。皆吾赤
子。窮而歸我。當是緩懷。疆吏非人。唯知拒却。固已絕
中原之望。甚者爲盜賊戮之。焚之。召隣國之侮。開邊

鄙之○際○結○遺○黎○之○怨○逆○上○帝○之○心○孰○甚○于○此○其○誤○國○
三○也○積○此○三○誤○而○吾○國○之○威○靈○氣○餒○索○然○矣○今○庸○人○
之○論○二○不○曰○虜○未○遽○亡○猶○可○倚○爲○屏○蔽○則○日○中○原○方○
擾○未○暇○窺○我○江○淮○凡○此○皆○誤○國○之○言○不○可○不○察○也○虜○
之○必○亡○無○愚○智○舉○知○之○臣○不○復○重○陳○若○昔○五○胡○之○亂○
江○左○粗○安○者○蓋○以○群○醜○並○爭○莫○能○相○一○故○吾○江○表○得○
以○偷○旦○夕○之○安○及○符○堅○旣○滅○慕容○旋○起○吞○晉○之○謀○元○
魏○已○并○諸○胡○遂○萌○飲○江○之○志○今○新○虜○賜○張○盡○有○河○朔○
而○楊○劉○群○盜○又○往○往○服○從○臣○恐○與○五○胡○角○立○之○勢○懸○

殊未可爲江左苟安之計。或又以爲安邊所儲待日。豐以此餌敵。何患不濟。臣竊謂不然。夫金繒遺虜。雖後世偃兵息民之權宜。然用之于國勢盛強之時。則足以示恩而不至于召侮。景德之事是也。用之于國勢委靡之時。則適以召侮而不足示恩。宣和之事是也。倘不思自強其國而倚賂遺以幸一日之安。臣知其非策矣。今國家幅員萬里。貢賦雲集。帶甲百萬。江漢爲池。而中外有司。忠誠憤激者少。委靡頹惰者多。一聞赤白囊至。則相顧失色。不知所爲。國家平時不

愛名器爵祿以寵士大夫。一旦有急。未見有毅然以
戮力王室自任者。此臣之所以大懼也。紹定四年。蒙
古侵金。使速不罕來假道。秋七月至汴州。統制張宣
殺之。拖雷聞速不罕死。曰。朱自食言。背盟棄好。今日
之事。曲直有歸。其後虜遂得藉口而數啓矣。識者以
爲基禍之始。至五年。蒙古再遣王機來京湖議夾攻。
金史嵩之以聞。朝臣皆以爲可遂復讐之舉。獨趙范
不喜。曰。宜和海上之盟。旣初甚堅。迄以取禍。不可不
鑒。帝不從。命嵩之以報使許之。嵩之乃遣鄒伸之往。

報蒙古許俟成功以河南地來歸先是蒙古主鐵木
真臨卒謂左右曰金精兵在潼關南據連山北限大
河難以遠破若假道于宋宋金世讐必能許我則下
兵唐鄧直搗大梁金急必徵兵潼關然以數萬之衆
千里赴援人馬疲弊雖至弗戰破之必矣至是窩闊
台卒用其計而宋不知蒙古猶女真之故智也六年
蒙古都元帥塔察兒使王猷至襄陽約攻蔡州史嵩
之先以兵會伐唐州金將烏古論黑將戰死城遂降
官軍駐于息州之南息州刺史烏古論忽魯懼請益

兵爲備金主以參知政事扶櫓不與簽書樞密
本魯中娖室帥忠孝軍五百往將行金主諭之曰
兵所以常取勝者恃北方之馬力就中國之技巧工
我實難與之敵至于宋人何足道哉朕得甲士三千
縱橫江淮間有餘力矣以忽魯畏縮命夾谷九任代
之已遣完顏阿虎帶來乞糧將行金主諭之曰宋人
負朕深矣朕自卽位以來邊臣有請西征者未嘗不
切責之近淮陰來歸彼多以金帛爲贖朕若受財是
貨之也付之全城秋毫無犯清口臨陣生獲數十人

悉以資糧遣之。今乘我疲弊，據我壽州，誘我鄧州，又攻我唐州，彼爲謀亦淺矣。蒙古滅國四十，以及西夏、夏亡，以及于我，我亡必及于宋。唇亡齒寒，自然之理。若于我連和，所以爲我者，亦爲彼也。卿其以此意曉之。阿虎帶至朝廷，不許。蒙古塔察兒圍金蔡州。金主拜天群臣陪從，成禮。金主戒諭之，因賜卮酒。酒未竟，邏騎馳奏敵兵數百突至城下。將士踴躍，咸請一戰。金主許之。是日分兵出戰，蒙古兵奔潰。塔察兒以數百騎復駐城東。金主遣兵接戰，又敗之。自是蒙古不

復薄城分築長壘圍之會史嵩之命孟珙江海帥師
二萬赴蒙古之約塔察兒大喜益修攻具斲木之聲
聞于城中城中益恐往往竊議投降金忽斜虎日以
國家恩澤君臣分義撫循其民且營畫禦備未嘗入
私室軍民咸奮始有固志端平元年蒙古兵以正旦
會飲歌吹之聲四望相接城中饑窘嘆息而已孟珙
見黑氣壓城上日無光降者言城中絕糧已三月鞍
靴敗鼓皆糜煮且聽以老弱互食故欲降者衆珙乃
下令諸軍銜枚分連雲梯布城下以攻之金自被圍

以來戰沒將帥甚衆至是禁近以及舍人省部祿屬亦皆供役分守四城蒙古兵鑿西城爲五門整軍以入督軍鏖戰及暮乃退聲言來日復集是夕金主集百官傳位于東面元帥承麟承麟者世祖勅里鉢之後白撒之弟也拜泣不敢受金主曰朕所以付卿者豈得已哉卿平日矯健有將畧萬一得免祚胤不絕此朕志也承麟起受璽明日卽位時孟珙之師向南門至金字樓列雲梯令諸軍聞鼓則進馬義先登趙榮繼之萬衆兢起大戰城上烏古論鎬及其將師二

百人皆降金百官稱賀禮畢亟出捍敵而南城之聲已立宋旗幟矣俄頃四面鼓譟夾攻聲振天地南面守門者棄門走西門開孟瑛招江海塔察兒之師以入忽斜虎帥精兵一千巷戰不能禦金主守緒知事急卽取寶玉置于幽蘭軒環之以革命近侍曰死便火我遂自經死忽斜虎聞之謂將士曰吾君已崩何以戰爲吾不死于亂兵之手赴汝水從吾君矣諸君其善爲計言訖赴水死將士皆曰相公能死吾輩獨不能耶于是參政李木魯小麥室等及軍士五百人

皆從死焉承麟退保于城胥守緒死帥群臣入哭奠

未畢城已陷江海入宮執參政張天綱孟琪問金主

所在天綱曰城危時自經矣是日承麟亦爲亂兵所

殺金亡于是以陳蔡西北地分屬蒙古蒙古以劉福

爲河南道總管史嵩之使孟琪等並益兵飭備經理

屯田于唐鄧州金抹撚兀典以息州來歸蒙古兵追

殺之蒙古之心于是爲惡矣彼豈能須臾忘宋而各

保分境以相安于無事者哉旣而范忠恕蔡欲乘時

撫定中原建守河據關收復三河之議朝臣多以爲

未可獨舉清之力。王其說。乃命趙范移節黃州。郭
進兵。范參議官丘岳曰。方與之敵。新盟而下。退氣盛鋒
銳。寧肯捐所得。以與人邪。我師若往。彼必突至。非惟
進退失據。開釁致兵。必自此始。且千里長驅。以爭空
城。得之當勤餽餉。後必悔之。范不聽。史嵩之亦言。荆
襄方爾饑饉。未可興師。杜杲復陳守境之利。出師之
害。皆不聽。而詔知廬州全子才合淮西兵萬人赴汴。
時汴京都尉李伯顏、李琦等爲崔立所侮。謀殺之。及
聞子才軍至。伯淵等以書約降。而陽與立謀備禦之。

策于是伯淵等誅崔立以汴降。全子才次于汴，趙葵
自除州以淮西兵取泗州，繇泗趨汴以會之。葵謂子
才曰：「我輩始謀據關守河，今已抵汴半月，不急攻洛
陽，關何待耶？」子才以糧餉未集，對葵督促益急。乃檄
鈐轄范用吉、樊辛等提兵，命徐敏子爲監軍，先令西
上。又命楊誼以廬州彊分軍繼之，各給五日糧，趨洛
陽。至城下，城中寂然無應者。至晚，有民庶三百餘家
登城投降。敏子遂帥衆入城。蒙古聞之，遂引兵南下。
敏子入洛，之明日，軍食已竭。楊誼至洛東三十里，方

散坐蓐食忽數里外有立黃紅涼繖者衆方駭異正
蒙古伏兵突起深蒿中楊訕倉卒無備師遂大潰訕
僅以身免于是在洛之師皆奪氣未幾蒙古兵至洛
城下立柵斂子與戰勝負相當士卒乏糧因殺馬而
食斂子不能畱乃班師趙葵全子才在汴又以史嵩
之糧運不繼所復州郡率皆空城無兵食可因蒙古
又決黃河水以灌官軍官軍多溺死遂皆引師南還
范以入洛陽之師敗績上表劾葵子才輕遣偏師趙
楷劉子澄參贊失計師退無律致後陣復敗詔葵子

才削一秩。措置營田邊備。時喬行簡上言曰。八陵有可朝之路。中原有可復之機。以大有爲之資。當有可爲之會。則事之有成。固可坐而策也。臣不憂出師之無功。而憂事力之不可繼。有功而至于不可繼。則其憂始深矣。夫自古英君。必先治內。而後治外。陛下視今日之內治。其已舉乎。其未舉乎。向未攬權之前。其敝凡幾。今既親政之後。其已更新者。凡幾。欲用君子。則其志未盡。仲欲去小人。則其心未盡。輩上有厲精更始之意。而士大夫之苟且。不務任責者。自若朝廷。

有禁包苴戒貪墨之令而州縣之黷貨不知盈厭者
自如欲行楷令則外出之新券雖低價而其售欲平
物價則京師之百貨視舊直而不殊紀綱法度多頽
弛而未張賞刑號令皆玩視而不肅此皆陛下國內
之臣子猶令之而未從作之而不應乃欲闔闢乾坤
混一區宇制姦雄而折戎狄其能盡如吾意乎此臣
之所憂者一也自古帝王欲用其民者必先得其心
以爲根本數十年來上下皆懷利以相接而不知有
所謂義民方憾于守令緩急豈有效死勿去之人卒

不愛其將校臨陣豈有奮勇直前之士蓄怨含憤積于平日見難則避遇敵則奔惟利是顧違恤其他人心如此陛下曾未有以轉移固結之遽欲驅之北鄉從事于鋒鏑忠義之心何繇而發况乎境內之民困于州縣之貪刻阨于勢家之兼并饑寒之氓常欲乘時而報怨茶鹽之寇常欲伺間而竊發蕭牆之憂凜未可保萬一兵興于外綴于強敵而不得休潢池赤子復有如江閩東浙之事其將奈何夫民至愚而不可忽內郡武備單弱民之所素易也往時江閩東浙

之寇皆藉邊兵以制之今此曹猶多竄伏山谷窺伺
臣望彼知朝廷方有事于北方其勢不能以相及寧
不又動其姦心此臣之所憂者二也自古英君規恢
進取必須選將練兵豐財足食然後舉事今邊面遼
濶出師非止一塗陛下之將足當一面者幾人勇而
能鬪者幾人智而能謀者幾人非屈指得二三十輩
恐不足以備馳驅陛下之兵能戰者幾萬分道而起
京洛者幾萬留屯而守唯襄者幾萬非按籍得二三
十萬數恐不足以事進取借曰帥臣威望素著以意

氣招徠以功賞激勸推擇行伍卽可爲將接納降附
卽可爲兵臣實未知錢糧之所從出也與師十萬
費千金千里餽糧士有餽色今之餽餉累日不已至
千累月累月不已至于累歲不知累幾千金而後可
以供其費也今百姓多垂罄之室州縣多赤立之帑
大軍一動厥費多端其將何以給之今陛下不愛金
幣以應邊臣之求可一而不可再可再而不可三向
後兵事未已欲中輟則廢前功欲勉強則無事力國
旣不足民亦不堪臣恐北方未可圖而南方已先騷

動矣。中原蹂踐之餘，所在空曠。縱使東南有米可運，然道里遼遠，寧免乏絕？繇淮而進，縱有河渠可通，寧無盜賊邀取之患？繇襄而進，必須負載二十鍾而致一石，亦恐未能達。若頓師千里之外，糧道不繼，當此之時，孫吳爲謀主，韓彭爲兵師，亦恐無以爲策。他日糧運不繼，進退不能，必勞聖慮。此臣之所憂者三也。願陛下堅持定爲國論，以絕紛紛之說。帝嘉納之。十二月，蒙古使王檄來言曰：「何爲而敗盟也？」二年正月，以程芾爲蒙古通好使，報之自是而後，蒙古數入寇。

于才等棄師而遁江淮迄無寧日嗟乎終始誤宋以
至于亡者和也然揆之以勢不當和于紹興之日而
不得不和于端平之間始終敵宋而不可忘者讐也
然揆之于事當仇于金之末世而不當讐于元之初
與蓋金殘宋之社稷而攘其土地此與宋不共載天
者而紹興之際兵足將材且金人新得中原而欲息
兵于劉豫則機會可乘而國氣未竭此金之所以當
讐而和之決不可講也端平之際通元人以取蔡差
快百年之憤而元人取地于金非得于宋也且其滅

國四十所。向無前。自夏及金。勢如破竹。而宋之兵殘。將老。趙蔡徐子敏。皆襍繇小才。爲理宗計者。量力自守。不失事。強順天之圖。而內修戰備。固襄淮。收蜀漢。依險圖存。念亂自保。亦或可以自延。江東之祧祀。而猥聽浮言。怒臂當輶。致探虎口。祧禍樹敵。入洛未幾。而南下之師已勞奔命矣。奈之何其不底于亡哉。開慶元年。蒙古主蒙哥自將西入蜀。命別將攻荆山。李全子壇攻海州。大弟忽必烈將大軍渡江。圍鄂州。又詔兀良合台以交廣師會鄂。圍潭州。中外大震。敕諸

路出師禦蒙古出內府銀幣犒師以相大全壅蔽不
時聞怒罷連窳斥之召吳潛相問策安出潛欲帝遠
避請遷幸帝守靖康中死守盡心薄之問卿當如何
潛失次對曰臣請以死守帝大恨嘻笑之曰卿欲爲
張邦昌乎乃卽拜賈似道右丞相兼樞密使軍漢陽
以援鄂似道度不能抗禦乃密遣朱京如蒙古軍請
稱臣割淮南漢上梓夔兩路地爲界歲納銀幣二十
萬以求成大弟初不許會蒙古主死合州大弟恐內
變不得立而似道遣京適復至乃許京解鄂圍悉師

北去時事秘中外莫測也。于是賈似道用劉整計，命夏貴殺浮卒，殿兵爲獻，而露布言諸路大捷。鄂圍解，江漢肅清，實宗社無疆之祐。天子以元師之至也驟而似道定，傾再造召入朝，詔百官郊勞。如文彥博故事，加少師，封衛國公。諸將呂文德、高達、劉整、夏貴、孫虎臣等各進官，有差忽必烈立是爲元世祖。始定都燕京，而蒙古遣其翰林侍讀郝經充國信使來告，卽位且徵前歲幣，而似道方便其客，撰福華編，頌鄂功。聞元使至，恐諸稱臣割地納幣之謀泄，乃拘之真州。

經數上書于帝及執政論和戰利害請入見及歸國
皆不報理宗聞有北使謂宰執曰北使來事體當議
似道曰和出彼謀豈容一切輕徇倘以交鄰國之道
來當令入見蒙古遣使請淮東制置司問經等安在
仍以稽留信使侵擾疆界來詰復不報而似道方欲
立威中外懼一時闕帥中不服乃遣官往諸鎮會邊
實欲污蔑之以爲名于是制置使趙葵史巖之等坐
侵盜掩匿各罷官償所侵又以攘功之謀出于劉整
恐其泄亦以邊費糾之整訴于朝不得達遂以瀘州

叛降于蒙古。蒙古以爲獲路行省。繇是益得國事。虛實而似道。不以爲虞。整爲元畫。以南重鎮在襄樊。襄樊破。浮漢入江。宋可平也。今鎮將呂文德貪利誘請賂之。置樵場。置場築堡。襄樊可得也。乃遣文德玉帶請置場許之。則又言安豐等所置場爲盜掠。顧聽築土牆護互市。文德初不許。說之者曰。樵場成。亦我之利也。文德爲請。又聽之。于是蒙古築堡于白河口。時出兵哨襄樊。江漢之險實始與我。其文德淮安人。魁梧勇悍。嘗粥薪城中。趙葵見其遺履長尺有咫。異

而訪之直文德出獵暮負虎鹿各一而歸因引爲帥
云劉整又與阿木計曰我精兵突騎所當者破惟水
戰不如宋耳奪彼所長造戰艦習水軍則事濟矣乃
造船五千艘日練水軍雖雨不能出亦晝地爲船而
習之得練卒七萬遂築圍城以逼襄陽蒙古括諸路
兵以益襄陽之師遣史天澤與宗王大臣往經畫之
天澤至呂文煥遣使餉以鹽茗天澤築長圍起萬山
包百丈楚山令南北不相通又築峴山虎頭山盡鹿
門爲一字城聯巨諸堡貯兵儲絕聲援示宋以久駐

必取襄陽之意呂文德以許蒙古盟樵場爲恨因曰
誤國家事者我也疽發背卒咸淳六年元至元七年
春正月以李庭芝爲荆湖制置大使督師援襄樊時
夏貴范文虎相繼大敗及聞庭芝至文虎貽書賈似
道曰吾將兵數萬人襄陽一戰可平但願無使聽命
于京闕事成則功歸恩相矣似道卽命文虎之兵從
中制之庭芝屢約進兵文虎但與妓妾嬖倖擊鞠飲
燕爲樂以取旨未至爲辭冬十一月詔范文虎總中
外諸軍救襄樊元將張弘範軍于鹿門以斷官軍糧

道及郢復之援言于史天澤曰今規取襄陽周于圖而緩于攻者計待其日蹙也然夏貴乘江漲送衣糧入城我無禦之者而江陵歸峽行旅休卒道出襄陽南者相繼也寧有自蹙之時乎若築萬山以斷其西立柵灌子灘以絕其東則庶幾蹙之之道也天澤從之遂築萬山徙弘範軍焉自是襄樊道絕咸淳八年至元九年正月襄陽被圍五年援兵不至呂文煥竭力拒之幸城中稍有積粟所之老鹽薪布帛爾張漢英守樊城募善泅者寘蠟書于髻中藏積草下浮水

而出謂鹿門旣築勢須自荆郢救援至隘口元守卒
見萃草多鈎致欲爲焚燬之用泗者遂被獲于是郢
鄧之路亦絕至是詔庭芝移屯郢州將帥悉駐新城
及均州河口以守要津庭芝潛于襄陽西北清泥河
造輕舟百艘聯三舟爲一舫中一舟可載左右舟虛
其底而覆之令蒙古見以謂覆舟不疑也購死士得
襄陽郢山民兵健鬪敢死者三千人求將得張順張
貴者二人厚賚禮遇之二人俱智勇冠軍素爲諸將
士所憚服因用爲都統將以行軍中號貴曰矮張順

曰竹園張二人下令曰此行誓必死敵無還心若曹
非心矢死者宜亟去毋爲敗吾事皆應曰諾于是人
自奮厲會漢水生乘順流發舟稍進團山下越二日
進次高頭港乃結方陳舟各熾炭置火鎗火炮巨斧
勁弩以前夜漏下三刻乃起可出江以紅燈爲識貴
爲首鋒將士卒前順殿之犯重圍至磨洪灘而上時
元布舟蔽江面無間可得入順等斷鐵組攢棹者數
百轉戰百二十里元兵皆披靡黎明抵襄陽城下城
中援兵絕聞順等至皆踴躍出外望勇氣百倍及收

軍獨失順。越數日有浮尸遡流上。被甲冑執弓矢直抵浮梁來者視之則順也。身中四創六矢氣勃勃如生存。諸軍驚以爲神。結冢歛葬之。張貴入襄陽文煥固畱與共守。貴恃其勇欲出擊蒙古軍。還郢乃募士能伏水中數日不食者二人。持蠟書赴范文虎于郢。求濟師。時元兵增守益密水路連鎖數十里。撒星椿環之。雖魚蝦不得渡。二人遇椿卽斷之。竟達郢。還報許發兵五千駐龍尾洲。助夾擊。期既定。貴乃別文煥東下。點視所部軍有帳前一人亡去者。則嘗有遇被

楚捷者也貴驚曰事泄矣宜亟行或彼未及知乃乘順流斷鎖破圍疾力進元兵辟易既出險夜半天黑至小新城門忽列炬如白晝則阿木劉整帥戰艦前邀擊之也貴且戰且行至勾林灘塋近龍尾洲見軍船旗幟紛披以爲郢兵來喜躍前進舉流星火視之艦卽前迎及勢近欲合則皆元兵也蓋文虎兵本無意戰前二日以風水驚自疑退三十里而軍矣又元兵得逃卒報先據洲以待貴殊不自意戰大困所部殺傷殆盡身被數十創力不支乃被執見阿木不屈

死阿木令卒四人昇貴尸至襄陽城下棄之呼曰識
矮張都統否此是也守陴者皆哭城中喪氣文煥以
賁屍附順冢葬立雙廟祀焉時夏漢水溢朝議請出
師文虎不得已將衛卒及兩淮舟師十萬軍鹿門阿
木夾江東西爲伏以待之別遣一軍趨會丹灘犯其
前文虎軍逆戰不利而虜師四合文虎驚夜遁去師
遂潰臺臣請誅文虎以正法似道庇之奪一官總兵
如故而罷督府庭芝以爲解蓋悖違如此九年樊城
陷而襄陽大困撤屋爲薪緝開會爲衣守將呂文煥

一巡城輒南望慟哭而後下賈似道度不可掩乃屢上書請行邊而陰嗾臺諫陳堅等言師臣出顧襄未必能及淮顧淮未必能及襄不若居中以運天下帝以爲然固畱之于是文煥援絕力屈而元主降詔招諭之遂山降事聞似道乃言于帝曰始臣屢請行邊陛下不之許向早聽臣出不至此今事勢如此非臣上下驅馳聯絡軍氣勢將有大憂顧聽臣出得效死帝曰師相豈可一日離左右似道乃建機速房輩樞密院漏泄兵事稽遲邊報之弊詔中外臣僚陳控御

攻守之畧以上明年度宗崩子焞卽位是爲恭宗時
元下詔數宋背盟執信使大舉入寇中外大震于是
三學生及群僚咸頌言非師相親視師不可似道不
得已開督府臨安猶願望未致行詔天下勤王軍畢
給興敷貴戚釋道田以助之已聞劉整死喜曰天贊
我也抽諸路精兵十有三萬以行金帛貨賄輜重舳
艦百餘里相接也命宰執小事專決大事關白乃後
行次蕪湖復使宋京如元軍請稱臣奉歲幣如開慶
約元人曰是好食言不許時似道命孫虎臣將精銳

軍池州夏貴以戰艦二千五百艘且江中似道將後
軍軍魯港貴常失利于鄂恐督府功臣討已罪又以
虎臣新進出已上無鬪志元伯顏令軍中作大筏數
十採薪芻其上揚言欲焚舟諸軍晝夜爲火備不虞
戰伯顏忽分步騎夾岸進麾戰艦衝擊虎臣軍舉巨
礮擊其中堅虎臣軍動阿朮以划船乘風進薄之前
鋒姜才方接戰而虎臣遽過其妾所乘舟跳身遁衆
譁呼曰步帥遁矣軍遂亂夏貴不戰而走以扁舟掠
似道船而過呼曰我師敗矣似道聞錯愕失措遽鳴

鉦收軍舳艫簸蕩乍作乍合阿朮以輕銳入擊軍大潰殺溺死者水爲赤軍資器械殆盡似道夜駐珠金沙召貴虎臣計事虎臣至撫膺哭曰吾兵無一人用命者目貴也貴嘻笑曰吾血戰當之矣似道曰今計安出貴曰今諸軍膽落安敢戰師相惟入揚州招潰兵迎駕海上吾守死淮西耳遂解舟去似道乃與虎臣單舸奔揚州明日潰兵蔽江下似道使人登岸揚旗招之皆莫應有爲惡語嫚罵之者蓋是時呂文德子師夔以江州弟文虎以安慶叛降元矣于是鎮江

寧國降興江陰諸守臣皆棄城遁太平和州無爲州
皆降元似道至楊檄列郡如海上迎駕而上書請遷
太皇太后持不許殿帥韓震復爲請下公卿雜議相
王燾不能難守靖康畫請堅蹕爲議上未下卽稱已
不能與大計乞報政不待報而遁右丞相鑑亦遁初
陳宜中以附似道得驟登政府及似道軍潰堂吏自
軍中得督府印以還宜中問似道安在吏曰不知宜
中意其已死卽上書乞誅似道正誤國之罪太皇太
后曰似道勤勞三朝安得以一敗失待大臣之禮罷

爲體泉觀使除似道諸所爲虐民之政放還諸寘謫者當是時國勢岌岌王燦與陳宜中並相不相能留夢炎自湖南入覲燦宜中皆請相夢炎而求去太皇太后曰毋籍此違難以燦老爲平章軍國重事而宜中夢炎乃並相命總督張世傑軍吳門禦元而燦請二相以一人督師二相並開府臨安名督師實不出世傑以舟師及元戰焦山敗績燦復言曰吳門去京師咫尺臣豈不知而必爲此請者以大敵在境非陛下自將則大臣出督而後氣可振也今二相並開府

陸六月之師不出督卽諸將孰統世傑以諸將心力
不齊一而敗不知國家此時尚堪幾敗耶臣旣不得
其職又不得其言乞罷平章太后以宜中故仇厲爲
名高倚重之京學生劉九臯等伏闕疏其罪宜中因
見糾爲各得遁去江西提刑文天祥勤王至臨安除
浙西江東制置使知平江以宜中未還位未之遣久
之宜中赴召至始得遣朝議擢呂師孟兵侍郎封呂
文德和議郡王欲藉以求成天祥陛辭言朝廷姑息
牽制之意多奮發剛斷之義少乞斬師孟以鑒鼓作

士氣且言本朝懲五季之亂削藩鎮權一時雖足矯尾大之弊然國以積弱故敵至一州則州破至一縣則縣殘中原陸沈實繇于此今宜分境內爲四鎮建都統其中以廣西益湖南而建閩長沙以廣東益江西而建閩隆興以福建益江東而建閩番陽以淮西益淮東而建閩楊州地大力衆約日齊奮有進無退將吾民之豪傑者伺間出其中庶敵可却也宜中以爲迂濶不報時元伯顏分兵三道右軍自建康出廣德趨獨松關左軍沿江並海道江陰趨澈浦華亭伯

顏將中軍趨常州水陸並進會臨安郡邑降破相繼
宜中獨理科舉明堂清士大夫陳乞差遣抑士人覬
覷恩例以爲功元陷廣德軍始倉皇發臨安民年十
五以上皆爲兵召文天祥平江謝枋得江西使人援
招呂師夔使行成元破獨松關臨安戒嚴時勦王師
尚三四十萬人淮東閩廣猶全境未沒文天祥與張
世傑議以爲猶可以一戰戰而捷今諸路師截其後
國猶可及守也宜中曰太皇降詔稱王師宜持重格
其議秘書監陳著上疏乞從天祥之議與其坐以待

周○曷○若○背○城○一○戰○萬○一○有○幸○則○人○心○奮○勇○且○敵○師○未○
必○真○能○智○力○不○過○乘○勝○長○驅○耳○若○小○沮○之○則○主○兵○之○
與○懸○軍○其○壯○弱○卽○異○矣○宜○中○不○聽○自○著○知○台○州○已○益○
急○乃○遣○標○岳○如○元○軍○求○稱○姪○納○幣○不○許○求○稱○孫○姪○又○
不○許○乃○求○封○小○國○稱○臣○又○不○許○使○者○泣○以○嗣○君○幼○在○
衰○經○禮○不○伐○喪○請○伯○顏○曰○汝○背○負○盟○誓○執○戮○我○行○人○
我○是○以○興○師○錢○氏○納○土○李○氏○納○降○皆○汝○國○故○事○何○多○
言○且○汝○國○得○天○下○于○小○兒○亦○失○之○小○兒○又○何○必○言○宜○
中○懼○乃○率○群○臣○入○請○遷○都○太○后○不○許○宜○中○哭○以○請○許○

之及暮宜中失不入太后怒曰吾初不欲遷而大臣
數請遷我聽遷顧欺我不扈遷耶脫簪珥投之地遂
閉閣群臣請見皆不納而元軍亭臯山宜中白太后
遣使奉傳國璽以降然中自慚是夜遁于是伯顏入
臨安元軍據江沙上而營不知潮太皇太后望于海
祝曰海有靈潮大作洗師潮三日不至伯顏以臨安
爲兩浙大都督府取太皇手詔及三省樞密院檄諭
州郡降附封府庫收史館禮院圖書及百司符印告
章罷官府及侍衛軍太后命左丞相吳堅右丞相賈

餘慶知樞密院謝堂參政家鉉翁同知劉昂並充祇
請使如元都謁元王請存趙氏後伯顏陽許祈請欲
盡宋宰執與俱北也堅老儒怯不自振餘慶自詭北
人幸國難自詡昂狎藝求容堂憚北行傾貲賂自免
獨鉉翁挺不屈以爲祈請儻可得乎未遽引決也二
月伯顏拘學士天祥與祈請使北如燕福王與芮自
紹興至伯顏慰勞之皇太后及帝請見伯顏固辭曰
未入朝不可以見而趣帝及太后北入朝是日丁丑
帝蒙塵年甫六歲福王與芮沂王乃猷度宗母隆國

夫人黃氏并庶僚三學生等皆從惟太皇太后謝以疾留帝至瓜州置制李庭芝使姜才將兵夜擣元軍冀迎駕不克吳堅等至燕祈請不得命留館中賈餘慶死家鉉翁聞國亡旦夕哭泣不飲食數日夏五月帝至燕赴上都元降封帝瀛國公方元帥迫時詔吉王昶進益王判福州信王昀進廣王判泉州駙馬都尉楊鎮爲輔行伯顏聞二王渡浙而南恐後且蔓也遣范文虎將兵亟追之都尉鎮請曰事急矣王亟以微服行我留就死緩追兵乃陽爲二王留也者止而

待二王及楊淑妃徒步匿山中七日走溫州陸秀夫
蘇劉義等追及遣人召陳宜中于清澳宜中來謁召
張世傑亦以所部來衛溫之江心寺舊有高宗南奔
時御几則相與哭几下奉益王爲天下兵馬都元帥
廣王副之發兵除吏以秀王與擇爲福建察訪使先
入閩撫吏民檄諸路同獎王室元復以太皇太后命
遣二宦者以兵百人召二王還臨安沈之江王遂入
閩將士多自歸兵稍振夏五月宜中等奉益王卽位
于福州是爲端宗改是年爲景炎元年文天祥自元

軍汎海至以爲右丞相初天祥奉使如元軍爲伯顏所留已迫之北至鎮江與其客杜詩等十二人問關夜亡入真州真守苗再成出迎喜且泣曰兩淮兵足以興復特二帥隙不能合今先約淮西兵趙建康虜必悉力扞西兵而令淮東諸將以通奉兵攻灣頭以高郵寶應淮安兵攻楊子橋以楊兵攻瓜步同日大舉灣頭楊子橋皆沿江脆兵日夜望我師至攻卽下吾自江上力薄之雖有智者不能爲虜謀矣瓜步旣舉以淮東兵入京口淮西兵入金陵要其歸路虜

可生致也。天祥大稱善，卽以書遺李庭芝與結約，而庭芝惑元反間言，密遣一丞相入真州說降信之，使再成。亟殺之。再成不忍，給天祥出城閉之外，以制司牒示之。天祥乃自真如楊自溫，自溫汎于海。至福州，拜右丞相兼樞密使。天祥以國事決于陳宜中，辭不拜，爲樞密使。使呂武募豪傑江淮，杜濬募溫州，欲還溫進取陳宜中，自以棄溫州入闕，欲倚張世傑復浙東西。自洗濯不許命。天祥開府南劍，經畧江西。元犯衢州，故相畱夢炎叛降元。徇廣州，州將黃俊

死之陷真州守苗再成死之元分道入寇犯處州帝航海至泉州招撫使蒲壽庚來謁請駐蹕張世傑不可壽庚提舉市舶三十年或勸世傑畱壽庚則海舶不令自從也世傑不聽縱之歸已而舟不具掠舟沒其貨壽庚怒殺諸宗室及士夫與淮兵在泉者叛降元宜中等奉帝趨潮州判興化軍曹澄孫叛降元知軍陳文龍死之帝舟次惠之海豐至廣州轉運使姚良臣迎帝入州治世傑不可還海駐秀山三年春元陷廣東諸郡陳瓚舉兵復興化軍文天祥提兵自梅

州出江西復雩都秋復古贛諸縣已而兵潰元陷興
化軍陳贛死之元將塔出版將呂師夔陷廣州十二
月至井澳颶風作舟敗帝驚悸而疾元襲井澳復航
海三年春二月帝舟還廣州三月駐碭州夏四月帝
崩先是陳宜中相以陸秀夫在軍中久事咨訪而行
秀夫亦悉心經贊已有隙諷言者劾罷之張世傑讓
宜中曰今何時猶動以臺諫論人乎宜中慚召秀夫
還行朝時天子播越海濱庶事疎畧楊太后垂簾對
群臣語猶稱奴每朝會獨秀夫儼然正笏立如治朝

或時于班行中潸然泣衣盡濕悲愴動左右端宗崩
群臣欲散去秀夫曰度宗皇帝一子尚在將焉置之
古人有以一旅一成致中興者今百官有司皆具士
卒數萬天未欲絕宋此獨不可與爲國耶乃與衆共
立衛王年八歲矣登壇禮畢忽有龍擎空上旣入宮
雲陰不見升礪州爲龍翔縣改元祥興太妃仍同聽
政陸秀夫爲左丞相張世傑爲樞密副使蘇劉義開
府儀同三司秀夫外籌軍旅內調工役當匆遽流離
中猶日書大學章句以勸講六月遷新會之厓山厓

山在新會南八十里距海中爲雷化犬牙與奇石山相對如兩龍潮汐所從出入也故有鎮戍時官民兵尚二十萬廣右諸郡尚有爲宋守者世傑不規城守謬以爲厓山天險可扼以自固奉帝蹕焉遣人人山伐木營行宮殿曰慈元楊太妃居之升廣州爲祥興府資糧餼于諸郡造舟楫器械至十月始罷秋八月月貫南斗有星隕于廣南初隕色紅大如箕中爆裂爲五旣墜聲殷如鳴鼓冬元分道入廣閩右相天祥敗績五坡嶺被執二年春正月帝在厓山元張弘範

繇潮陽以舟師迫厓山。或謂世傑曰：北人以舟師塞海口，則我不能進退矣。蓋先據之，幸而勝，福也；卽不勝，猶可西走。世傑以在海中，日久，士卒離心，動必散。乃曰：頻年航海，何時已乎？遂焚行朝草市，結大舶千餘，作一字陳，碇海中。艦外舳貫以大索，四周起樓柵，如城堞。奉帝居其間，爲死守計。人皆危之。厓山北淺，舟膠不可入。弘範乃繇山之東轉而南入大洋，與世傑舟遇。薄之，世傑舟堅不能動。弘範縱火，世傑命戰艦皆塗泥，縛長木拒之。舟不焚。弘範遣所親招之降。

不可遣人語厓山士民曰汝陳丞相已去文丞相已
執汝尚欲何爲士民亦不應弘範乃以舟師據海山
出騎兵斷南軍汲道士茹糗糒掬海水飲之水鹹作
嘔泄乃大困二月有黑氣出厓山弘範乃命軍中曰
宋舟潮落必東走聞樂作乃戰明晨元李恒乘早潮
退攻我舟之北世傑以淮兵殊死戰比午潮上元中
軍樂作世傑軍少懈而弘範軍驟攻其南俄一舟檣
旗仆已諸舟檣旗皆仆軍大潰會日暮海霧大作咫
尺不相辨世傑乃與蘇劉義斷維以十六舟奪港去

帝舟大且諸舟環結不得出秀夫走帝所請帝曰國事至此陛下當爲國死德祐皇帝辱已甚不可再辱卽負帝沈海中後宮諸臣從死者甚衆越七日屍浮水上者十餘萬人得帝屍及傳國之寶世傑行收兵遇楊太后欲奉以求趙氏後太后始聞帝崩拊膺大慟曰吾所爲忍死間關至此者爲趙氏一塊肉耳今無辜矣自沉死世傑葬之海濱潰衆稍集謀入廣而興作將士勸世傑登岸世傑登施樓露香祝曰我爲趙氏者至矣一君亡復立一君今又亡我所爲不死

者庶幾敵兵退後立存宗祀耳今若此豈天意耶風
愈甚世傑亦自沉死而宋亡